



MPANDA MACHOKERO

SERIES

Mawu Oyamba

M'bukuli muli nthano za ana. Nthano zina ndi zoti zinalembedwa ndi akatswiri akale kwambiri ndipo zinamasuliridwa n'kukonzedwa mwina ndi mwina, pomwe zina ndi za kwathu konkuno ku Malawi. Nthanozi ndi zazifupi koma zosangalatsa. Wolembe bukuli anaona kuti anthu ambiri sakonda kuwerenga nkhani zazitali. Choncho analemba nthano zazifupi koma zomveka bwino. Nthanozi ndi zoti zikhoza kugwiritsidwa ntchito pophunzitsa kusukulu, powerengera ana komanso pocheza. Bukuli lingathandizenso ana kuphunzira ukadaulo wopinda komanso kuseweretsa mawu m'Chichewa. Kuwonjezera apo, nthano zake ndi zokhathamira ndi nsinjiro za chiyankhulo.

Written by **Bonwell Rodgers**. *Reproduction of this book is prohibited, except with owner's permission.*

Email: Bonwellrodgers91@gmail.com

Phone: 0881813953, 0881831435

Zamkatimu

Tsamba 001	Mawu Oyamba
Tsamba 007	Nkhandwe ya Mtima Wangati Kuseri kwa Mphika
Tsamba 008	Galus Apusitsidwa ndi Chithunzithunzi
Tsamba 009	Mkango Unatenga Zonse
Tsamba 010	Dokowe Apulumutsa Nkhandwe
Tsamba 011	Mpanda Machokero
Tsamba 012	Kusamvana Pakati pa Munthu ndi Njoka
Tsamba 014	Khoswe Wam'tauni ndi Khoswe Wakumudzi
Tsamba 015	Nkhandwe Ipusitsa Khwangwala
Tsamba 017	Mkango Udwala Mwakayakaya
Tsamba 018	Bulu Komanso Galu
Tsamba 019	Khoswe Apulumutsa Mkango
Tsamba 020	Namzeze Achenjeza Mbalame Zina
Tsamba 021	Achule Afuna Mfumu
Tsamba 023	Phokoso la Mapiri
Tsamba 024	Akalulu Akumana Ndi Mavuto
Tsamba 025	Ukakwera M'mwamba Usamatukwane Pansi
Tsamba 026	Pansi pa Mtima
Tsamba 027	Njoka Yopanda Pabwino
Tsamba 028	Ntchentche Yosimbwa
Tsamba 029	Nkhandwe Ichezera Dokowe
Tsamba 030	Nkhandwe Itola Chigoba Zokongola
Tsamba 031	Timba Anatengeka Ndi Mbalame
Tsamba 032	Kudzitama Kunaphetsa Chule
Tsamba 033	Ubwenzi wa Mkango ndi Kapolo
Tsamba 035	Mleme Uchenjera Pogona
Tsamba 036	Nkhani ya Mbawala ndi Mlenje
Tsamba 037	Njoka Ipsa Mtima
Tsamba 037	Mitengo Inadzipweteketsa
Tsamba 038	Galus Akumana ndi Nkhandwe
Tsamba 040	Ziwalo Ziukira Mimba

Tsamba 041	Mlimi Agwira Gwape Atabisala
Tsamba 042	Nkhandwe M'munda wa Mpesa
Tsamba 042	Ikakuthawa Imawawa Msuzi
Tsamba 043	Hatchi Akhaulitsa Mphoyo
Tsamba 044	Mbalame Yadyera
Tsamba 045	Chizolowezi Chimabala Mwano
Tsamba 046	Munthu Atsutsana ndi Mkango
Tsamba 047	Nyerere Yanzeru
Tsamba 048	Mtengo ndi Bango
Tsamba 049	Nkhandwe Yatulo
Tsamba 050	Nkhandwe Ivala Chikopa cha Nkhosa
Tsamba 051	Galu Apezeka Modyera Ng'ombe
Tsamba 052	Fano Lathabwa
Tsamba 053	Msodzi
Tsamba 054	Mnyamata Wabodza
Tsamba 055	Mpikisano wa Pakati pa Dzuwa ndi Mphepo
Tsamba 056	Mnyamata wa Zala Zazitali
Tsamba 058	Bambo Yemwe Anakwatira Mitala
Tsamba 059	Mayi ndi Nkhandwe
Tsamba 060	Msamuko wa Kamba
Tsamba 061	Nkhanu ndi Mwana Wake
Tsamba 062	Bulu Avala Chikopa cha Mkango
Tsamba 063	Nkhani ya Mabwenzi a Pamtima
Tsamba 064	Mapoto Awiri
Tsamba 065	Ng'ombe Zinayi ndi Mkango
Tsamba 066	Mneneri Wabodza
Tsamba 067	Msodzi Agwira Nsomba Yaing'ono
Tsamba 068	Munthu Wadyera Komanso Wansanje
Tsamba 069	Khwangwala Waludzu
Tsamba 069	Munthu Wam'nkhalango
Tsamba 071	Mazira Agolide
Tsamba 071	Mbalame Yoimba Mokoma
Tsamba 073	Nkhandwe, Nkhuku Komanso Galu
Tsamba 074	Munthu Wamanja Lende

Tsamba 075	Bambo ndi Mwana Wake Apita Kumsika
Tsamba 076	Munthu Woumira
Tsamba 077	Nkhandwe ndi Udzudzu
Tsamba 078	Nkhandwe Yopanda Mchira
Tsamba 079	kalulu wa Diso Limodzi
Tsamba 080	Msonkhano wa Makoswe
Tsamba 081	Mpikisano wa Kalulu ndi Kamba
Tsamba 083	Gogo Akumana ndi Imfa
Tsamba 084	Kalulu ndi Anzake Ambirimbi
Tsamba 085	Mkango Ugwa M'chikondi
Tsamba 086	Kamtolo ka Mitengo
Tsamba 087	Mawu Omaliza a Mkango
Tsamba 089	Ubongo wa Mbawala
Tsamba 090	Nkhwazi Ibayidwa ndi Muvi
Tsamba 091	Kuwerengera Madzi a Mphutsi
Tsamba 092	Hatchi ndi Bulu
Tsamba 093	Woliza Lipenga
Tsamba 094	Katswiri Wolira Nyama Zosiyanasiyana
Tsamba 095	Nkhandwe ndi Mbuzi
Tsamba 096	Nsikidzi ndi Ana Ake
Tsamba 097	Nyani ndi Mwana Wake
Tsamba 098	Nkhuku ndi Mwala Wamtengo Wapatali
Tsamba 099	Khoswe ndi Msampha
Tsamba 100	Nkhani ya Kutha kwa Dziko
Tsamba 101	Nkhani ya Kalulu ndi Nkhandwe Yatulo
Tsamba 103	Anyamata Awiri Akumana ndi Munthu wokalamba
Tsamba 104	Chisoni Chinaphetsa Nkhwali
Tsamba 105	Chisoni Chinaphetsa Wosema Mitondo
Tsamba 106	Azimayi Anzeru
Tsamba 107	Mwana Wosamvera
Tsamba 109	Mwana Wamwano
Tsamba 110	Bambo ndi Mwana Wake
Tsamba 111	Kupulumukira Mkamwa mwa Mbuzi
Tsamba 112	Kodi Wochimwa Anali Ndani?

Tsamba 113	Mtsuko Wochucha Ndalama
Tsamba 115	Mphamvu Zobwereka
Tsamba 116	Anzeru Omwe Anali ndi Vuto Losaona
Tsamba 117	Nkhuku ndi Nkhunda
Tsamba 118	Mankhwala a Banja
Tsamba 120	Ndifera Manyazi Mkazi Wanga
Tsamba 122	Atambwali Sametana
Tsamba 125	Mutu Wodwala Kansire Adatema Kadzidzi
Tsamba 134	Angozo ndi Mwana Wawo

Nthano Zokhala ndi Maphunziro

“Tikhoza kuphunzira zambiri ngakhale kuchokera kwa nyama zakutchire. Chilichonse chili ndi pokomera, kungoti umafunika kufufuza mosamala kuti upaone pokomerapo.”

—Anatero Lewis Carrol m’buku lake lakuti, *Alice’s Adventures in Wonderland*

Nkhandwe ya Mtima Wangati Kuseri kwa Mphika

Kalekalelo Nkhandwe inapita kukamwa madzi padziwe lina lomwe linali pafupi ndi phiri. Itafika kumeneko inaima chakumtunda n'kuyamba kupha ludzu. Itamwaza maso inaona Nkhosa, nayonso ikumwa madzi kumunsi kwa dziwelo. Kenako inayamba kuganiza kuti, “Ndikhozatu kutsuka mkamwa ndi kandiwo kameneka. Nditangopeza chifukwa chabwino, ndikhoza kukaonetsa zakuda ndithu.” Ndiyeno itadya mutu inayamba kuyankhula mwaukali kwa Nkhosayo kuti, “N'chifukwa chiyani ukudetsa madzi amene ndikumwa?” Nkhosayo inayankha kuti, “Ayi, si ine. Ngati madziwo akubwera ali akuda kumeneko, vuto si ine ayi. Nokhanso mukuona kuti madziwa akuchoka kumeneko n'kumabwera kuno.” Kenako Nkhandwe ija inati, “Watero, chabwino, nanga n'chifukwa chiyani unkanditukwana chaka chatha chija nditabwera kudzamwa madzi kuno?” Nkhosayo inayankhanso kuti, “Si inenso ameneyo, inetu ndili ndi miyezi isanu ndi umodzi wokha, moti nthawi imeneyo ndinali ndisanabadwe.” Itamva zimenezi, Nkhandweyo inakwiya kwambiri ndipo inati, “Ndiliba nazo ntchito zimenezo, ngati sunali iweyo ndiye kuti anali bambo ako.” Itangonena zimenezi inathamangira kunali Nkhosa kuja n'kuimbwandira, ndipo kenako inaidya.

Phunziro: Munthu woipa sasowa chonamizira. Amachita chilichonse kuti akwaniritse cholinga chake ngakhale kupha munthu kumene.

Mafunso

1. Kodi m'nthanoyi ndi nyama iti imene ili yoipa mtima?
N'chifukwa chiyani mwayankha choncho?
2. N'chifukwa chiyani mutu wa nkhanayi ukuyerekeza mtima wa nkhandwe ndi kuseri kwa mphika?

3. Perekani chitsanzo cha munthu woipa mtima yemwe anachitira mnzake zankhanza, ngakhale kuti mnzakeyo anali wosalakwa.
4. Kodi nkhanayi ikutiphunzitsa chiyani?

Galu Apusitsidwa ndi Chithunzithunzi

Tsiku lina Galu anatola nyama ndipo anaipana n’kumapita nayo kwawo kuti akaidye mwamtendere. Koma kuti akafike kwawo, ankafunika kuwoloka mtsinje wina, ndipo kuti awoloke mtsinjewo ankayenera kudutsa pa mlatho waung’ono. Galuyo atayamba kuwoloka kudzera pamlathowo, anaona kuti m’madzi mukuoneka chithunzithunzi cha Galu atanyamula nyama kukamwa kwake. Ataona zimenezi, anaganiza kuti ameneyo ndi Galu wina. Chifukwa chosakhutira ndi nyama yomwe anali nayo, Galuyo anaganiza zolanda nyamayo kuti ikhalenso yake. Ndiyeno mwamphamvu, analumphira m’madzi muja, kuti khuvuu! Koma atangotsegula kukamwa kwake, nyama ananyamula ija inagwera m’madzi ndipo anaisakasaka koma sanaipeze. Pamenepo m’pamene anazindikira kuti Galu amaoneka mumtsinje uja chinali chithunzithunzi chake.

Phunziro: Musalole kutaya zonse zomwe muli nazo kuti mupeze zinthu zomwe mulibe. Kumakhutira ndi zomwe muli nazo.

Mafunso

1. N’chifukwa chiyani Galuyu ankafunanso kulanda nyama ya Galu amene ankamuona m’madzi, kodi anali ndi njala?
2. Kodi mukuganiza kuti Galu angachitedi zimenezi? N’chifukwa chiyani mwayankha choncho?
3. Kodi nkhanayi ikutiphunzitsa chiyani?

Mkango Unatenga Zonse

Tsiku lina Mkango unapita kosaka limodzi ndi Agalu am'tchire atatu. Nyama zimenezi zinasaka, kusaka, kenako n'kusaka koma sizinagwire kanthu. Ndiyeno mwamwayi, nyamazi zinasokolotsa Mphalapala ndipo posakhalitsa zinaigwira n'kuipha. Zitatere Agalu am'tchirewo anayamba kunena kuti, "M'pofunika kuti tonse tigawane nyamayi mofanana." Koma Mkango unabangula n'kuuza Agaluwo kuti, "Dulani nyamayi panayi!" Agalu aja anamveradi zimenezo ndipo anasenda nyamayo n'kuidula panayi. Kenako Mkango uja unaima patsogolo pa nyamayo n'kuyamba kulongosola za kagawidwe kake. Unati: "Mbali yoyambayi ikhala yanga chifukwa ndine Mfumu ya Zinyama zonse m'nkhalango muno. Mbali yachiwiriyi ikhalanso yanga chifukwa ndine ndinayambitsa ulenjewu. Pomwe mbali yachitatuyi ikhalanso yanga chifukwa ndinathamangitsa nawo nyamayi. Koma ponena za mbali yotsalayo, amene ali wolimba mtima ayerekeze kuigwira aone" Atamva zimenezi, Agalu am'tchirewo anadzuma chapansipansi ndipo kenako ananyamuka n'kumapita, kwinku atapanira michira yawo.

Phunziro: *Mukhoza kuthandiza anthu amphamvu kuchita zinazake, koma simungadye nawo zimene angapeze.*

Mafunso

1. N'chifukwa chiyani Agalu am'tchire ankathawa atapanira michira?
2. Kodi mukuganiza kuti Agaluwo ankayenera kudya nawo nyamayo? N'chifukwa chiyani mukutero?
3. Kodi nkhanayi ikutiphunzitsa chiyani?

Dokowe Apulumutsa Nkhandwe

Tsiku lina Nkhandwe inali ndi njala zedi ndipo inagwira nyama n’kuyamba kuipwepweta mwankhanza. Koma mwatsoka fupa linaima pammero, moti inkalephera kulimeza. Nkhandweyo inayamba kumva ululu woopsa ndipo inkabuula kwinaku ikupempha nyama zina kuti aithandize. Koma chifukwa cha khalidwe lake la umadyera mphoto, nyama zina zinkachita mantha, moti palibe inalimba mtima kuithandiza. Kenako Nkhandweyo inayamba kunyengerera aliyense amene inkakumana naye n’cholinga choti aipulumutse. Inkati, “Ndikupatsani chilichonse chimene mukufuna ngati mutandichotsa fupali kukhosiku.” Mwamwayi, Dokowe anavomera kuti ayesa kuchotsa fupalo, ndipo anaiuza kuti igone pansi n’kutsegula kukamwa kwake. Dokoweyo anapisa kukhosi kwa Nkhandweyo ndi mulomo wake ndipo khosi lake lonse lalitalilo linalowa m’kamwa mwa Nkhandweyo. Dokoweyo anakwanitsadi kuchotsa fupalo ndipo Nkhandweyo inayamba kupeza bwino. Ndiyeno Dokowe anauza Nkhandweyo kuti, “Tsopano popeza ndachotsa fupali, ndininkhenitu zimene munalonjeza zija. Pajatu lonjezo linadulitsa mutu wa nkukhu!” Itamva zimenezi, Nkhandweyo inamwetulira n’kuonetsa mano ake, ndipo kenako inati, “Muziyamika a Dokowe. Inuyotu munalowetsa mutu wanu mkamwa mwanga n’kuutulutsamo uli bwinobwino, popanda vuto lililonse. Ndiye mukuti mukufuna ndikupatsenonso mphoto ina kuposa imeneyo?”

Phunziro: *Munthu wadyera sayamika.*

Mafunso

1. Kodi mukuganiza kuti n’chifukwa chiyani Dokowe anathandiza Nkhandwe?

2. N’chifukwa chiyani Dokowe anauza Nkhandwe kuti imupatse zimene inalonjeza?
3. Kodi mukuganiza kuti Nkhandwe inaperekadi mphoto kwa Dokowe? N’chifukwa chiyani mukutero?
4. Tiyerekeze kuti Nkhandweyo inakana kupereka mphoto kwa Dokowe, kodi tinganene kuti inalakwa?
5. N’chifukwa chiyani tiyenera kumachitadi zimene talonjeza?
6. Kodi nkhanayi ikutiphunzitsa chiyani?

Mpanda Machokero

Kalelo, pamudzi wina panali mkamwini wina yemwe ankasakasaka chifukwa chopitira kwawo. Anthu a pamudzipo ankakhala naye bwino zedi. Koma kenako munthuyu anatopa ndi ulemu, ndipo anayamba kusakasaka chifukwa chochokera pakhomopo. Ndiye tsiku lina ana ankaphika masanje, ndipo mkamwiniyo anapita pomwe anawo anakoleza moto wawo n’kuukodzera. Anawo anayamba kulira ngati kuti wina wawatsina, moti akuluakulu a pamudzipo anatuluka m’nyumba kuti akaone chomwe chachitika. Atafunsa anawo kuti chachitika n’chiyani, anaulula kuti mkamwiniyo wawazimitsira moto wawo komanso kuti anachita kuukodzera. Akuluakuluwo anakhumudwa kwambiri ndipo anapita kunyumba kwa mkuluyo kuti akamufunse za nkhanayo. Atafika, mkamwiniyo anawalandira n’kuwalowetsa m’nyumba. Anthuwo anapepesa chifukwa chobwera mwadzidzidzi, koma mkamwiniyo anati, “Ayi, mwafika mwatha.” Ndiye kenako anawauza kuti, “Tikupunguleni mpweya!” Zitatero anthu a pamudzipo anayamba kuyala nkhanu yonse. Koma mkamwiniyo atamva zimene anthuwo ananena, anakwiya kwambiri ndipo anati: “Zoonna mmene

ndakuliramu ndingakodzere moto wa ana? Anthu inutu simukundifuna pamudzi pano. Basi ndikupita kwathu.” Kenako anamanga nsanza zake pachitenje, n’kunyamuka kumapita kwawo.

Phunziro: *Anthu ena akatopa kukhala pamalo, amachita kusakasaka chifukwa chochokera.*

Mafunso

1. Kodi vuto la mkamwiniyu linali chiyani?
2. Kodi pali umboni wanji wosonyeza kuti anthu a pamudziwu anali abwino?
3. Kodi mukuganiza kuti mkamwiniyo ankatanthauza chiyani pamene ananena kuti, “tikupunguleni mpweya”?
4. Kodi mwambi wakuti, “mpanda machokero adakodzera moto wa ana” unayamba bwanji?
5. Kodi tikuphunzira chiyani m’nkhanisiyi?

Kusamvana Pakati pa Munthu ndi Njoka

Mwana wa Mlimi wina anaponda mchira wa Njoka mwangozi, ndipo Njokayo inalusa n’kumugagada, moti anafera pomwepo. Bambo a mwanayo atamva zimenezi anakwiya zedi ndipo ananyamula nkhwangwa n’kuyamba kuthamangitsa Njokayo. Ataipeza anaponya nkhwangwayo ndipo anaidula mchira. Zimenezi zinachititsa kuti njokayo ikwiye zedi, moti inaganiza zokhaulitsa mlimiyo.

Inanyamuka n’kupita m’khola la mlimiyo n’kukaluma ng’ombe zonse, moti inasiya mlimiyo manja ali m’khosi, ng’ombe zake zonse zitafa. Koma kenako mlimiyo anaona kuti kubwezera sikuthandiza, ndipo anaganiza zokambirana ndi Njokayo kuti akhazikitse mtendere. Choncho tsiku lina Mlimiyo anauyamba ulendo wopita

kwa Njokayo atatenga kaphoso ka chakudya komanso uchi, ndipo atafika anaika zinthuzo pauna wa Njoka n'kuodira. Njoka itatuluka, Mlimiyo anati, "M'bale wanga njoka, tiye tiiwale zakale. Ndikuona kuti n'zomveka kuti unalanga mwana wanga atakuchitira chipongwe. Komanso n'zomveka kuti unapha ng'ombe zanga utakwiya chifukwa chodulidwa mchira. Komabe, popeza ndine bambo wa mwana unapha uja, sindinalakwe kukudula mchira chifukwa monga ukudziwira, imfa ya mwana imakhala yowawa kwambiri. Ndiye popeza aliyense wakhutira ndi zimene wachitira mnzake, tiye tiiwale zakale n'kuyambiranso kugwirizana." Pamenepo Njokayo inati: "Ayi, sindikufuna. Pita nazo uko zinthu zakozo! Ndikudziwa kuti sungaiwale imfa ya mwana wako, komanso ineyo sindingaiwale za mchira wanga, womwe iweyo unaudula mopanda chisoni."

Phunziro: Nthawi zina zimatheka kukhululukira munthu, koma osaiwala zomwe anakuchitira.

Mafunso

1. N'chifukwa chiyani Mlimi anatenga chakudya komanso uchi popita kukakumana ndi njoka?
2. N'chifukwa chiyani Njoka inakana kulandira mphatso zomwe Mlimiyo anapititsa?
3. Kodi zimene njokayo inachita ndi zabwino?
4. Kodi tikuphunzira chiyani m'nkhanayi?

Khoswe Wam'tauni ndi Khoswe Wakumudzi

Kalekalelo Khoswe Wam'tauni anapita kukacheza kwa msuweni wake, yemwe ankakhala kumudzi. Khoswe Wakumudziyo anasangalala kwambiri ndi zimenezi moti anamulandira ndi manja awiri. Ngakhale kuti analibe zinthu zambiri, Khoswe Wakumudziyo anayesetsa kukonzera mnzakeyo chakudya chabwino. Mwachidule tingoti anamupatsa zonse zomwe akanakwanitsa. Anamupatsa nyemba, nyama, mabanzi komanso mtedza. Ndiyeno Khoswe Wam'tauni uja anasolola mphuno yake n'kuyamba kununkhiza mosonyeza kuti chakudyacho chikumunyansa, ndipo kenako anati: "Asuweni sindimakumvetsani. Kodi mumakwanitsa bwanji kudya chakudya ngati chimenechi? Koma m'pomveka, kunoko n'kotsalira kwambiri moti simungakwanitse kupeza zakudya zonona komanso zabwinozabwino zomwe zimapezeka m'tauni. Tiyeni tipite kwathu ndikakuonetseni kukoma kwa moyo. Mukakangokhala sabata imodzi, mukaona kuti moyo womwe mukukhala kunokowu ndi wofanana ndi kukhala kundende." Nthawi yomweyo makoswe awiriwo anaupamba ulendo wopita m'tauni ndipo anafika usiku kwambiri kunyumba kwa Khoswe Wam'tauni uja. Kenako Khoswe Wam'tauniyo anati: "Ukuoneka kuti waweyeseka ndi ulendo, bwanji ndikupatseko zokhwasulakhwasula? Tabwera kuno!" Kenako anagwira mnzakeyo dzanja n'kuyamba kumukoka kupita naye kuchipinda chodyera. Kumeneko anapeza kuli zinthu zambiri zomwe zinatsala patebulo moti sanachedwensu ayi, koma kuyamba kudya makeke komanso zakudya zina zokhetsa dovu, zomwe anazipeza m'chipindacho. Koma mwadzidzidzi, anamva agalu akuuwa. Ndiyeno Khoswe Wakumudzi anafunsa kuti, "Kodi chimenecho n'chiyani?" Mnzakeyo anayankha kuti, "Aa, usaope. Amenewo ndi agalu a m'nyumba muno." Ndiyeno Khoswe

Wakumudziyo anati, “Wati ndisaope? Kwathu ndimadya mwamtenderetu ine, moti phokoso limenelo silikundisangalatsa.” Posakhalitsa chitseko chinatseguka mwamphamvu ndipo Agalu akuluakulu awiri anatulukira. Makoswe awiriwo atangoona agaluwo, anayamba kuthawa pofuna kupulumutsa miyoyo wawo. Kenako Khoswe Wakumudzi anati, “Msuweni, ine ndikupita kwathu.” Khoswe Wam’tauniyo anafunsa mnzakeyo kuti, “Bwanji, ukufuna kubwerera kumudzi nthawi yomweyi?” Koma Khoswe Wakumudziyo anati, “Inde, ndikupita. Bola ndizikadya nyemba komanso mabanzi ndili pamtendere, kusiyana n’kumadya makeke komanso zinthu zonona ndili ndi mantha.”

Phunziro: *“Ndi bwino kumadya chisoso pali mtendere, kusiyana ndi kumadya nyama uli ndi mantha.”*

Mafunso

1. N’chifukwa chiyani Khoswe Wakumudzi anapita m’tauni?
2. N’chifukwa chiyani khosweyu anabwerera kumudzi?
3. Kodi pali kusiyana kotani pakati pa Khoswe Wakumudzi ndi Khoswe Wam’tauni?
4. Kodi tikuphunzira chiyani m’nkhaniyi?

Nkhandwe Inapusitsa Khwangwala

Tsiku lina Nkhandwe inaona Khwangwala akuuluka. Khwangwalayo anali atapana nyama kukamwa kwake. Posakhalitsa Khwangwalayo anatera mumtengo wina ndipo Nkhandweyo inaganiza kuti, “Ndikhozatu kumuyeretsa m’maso ameneyu.” Kenako inanyamuka n’kupita pafupi ndi mtengowo n’kunena kuti, “Muli bwanji Mayi Khwangwala? Mukuonekatu bwino lero. Mwatchena suti yokongola

zedi, yomwenso ikugwirizana ndi kakolala koyera komwe kali m'khosi mwanuko. Mukuonekanso kuti mukhoza kuimba mwanthetemya kuposa mbalame zina zonse. Ndiponsotu mawu anu amandisangalatsa zedi, moti mungachite bwino mutandiimbira kanyimbo mumakonda kuimba kaja, . . . kamene kaja. Mukangochita zimenezi, nthawi zonse ndizikupatsani moni waulemu, monga Mfumukazi ya Mbalame zonse.” Khwangwalayo atamva zimenezi anapusitsika ndipo anatukula mutu wake n'kuyamba kuimba, amvekere khwaa! khwaa! khwaa! Koma atangochita zimenezi, nyama inali kukamwa ija inagwera pansu ndipo Nkhandwe ija inatola n'kunena kuti, “Zikomo kwambiri mayi. Zimene ndimafuna ndi zimenezi. Monga malipiro a nyama ndatengayi, ndikupatsani malangizo oti adzakuthandizeni m'tsogolo. Mukadzaona munthu akukutamandani pa chifukwa chosadziwika bwino, mudzadziwe kuti akufuna kukupondani.”

Phunziro: *Osamakhulupirira anthu achinyengo.*

Mafunso

1. Kodi ndi ndani amene anali tambwali pakati pa Nkhandwe ndi Khwangwala?
2. N'chifukwa chiyani Nkhandwe inapempha Khwangwala kuti amuimbire nyimbo?
3. Nanga n'chiyani chimene chinakopa Khwangwala kuti aimbedi nyimboyo?
4. Kodi n'zoona kuti Khwangwala analidi mbalame yokongola komanso yodziwa kuimba?
5. Kodi tikuphunzira chiyani m'nkhanayi?

Mkango Udwala Mwakayakaya

Nthawi ina Mkango unakalamba kwambiri moti unayamba kudwala mwakayakaya pakhomo la phanga lake. Mkangowo unkangokhalira kubuula tsiku lonse ndiponso unkavutika kupuma. Nyama zina za m'nkhalango zinabwera kudzazonda matendawo koma popeza Mkango ndi nyama yoopsa, zinaima chapatali ndithu. Koma zitaona kuti Mkangowo ulibenso mphamvu komanso kuti moyo wake wangotsala madzi amodzi, zinayamba kuyandikira pang'onopang'ono. Zina mwa nyamazo zinayamba kuganiza kuti, "Tsopano nthawi yakwana yoti tibwezere zonse zimene Mkango unatichitira." Ndiyeno Nguluwe inathamanga n'kukagunda Mkangowo. Kenako Njati nayonso inadzambatuka n'kukaubaya ndi nyanga zake. Koma palibe chimene Mkangowo unachita, unangogona pansu kwala! Choncho, Bulu ataona kuti Mkango sungachite kanthu, anapita pafupi ndi Mkangowo n'kuyamba kuvina kwinku akugwedezera mchira wake, ndipo kenako anamenya Mkangowo ndi miyendo yake yakumbuyo. Mkangowo utaona zimenezi unalira modandaula kuti, "Apa ndiye ndifa kawiri ndithu. Zoonu kumenyedwa ndi ana omwe?"

Phunziro: *Ndi anthu amatha amene amalimbana ndi munthu wamphamvu akamatsirizika.*

Mafunso

1. N'chifukwa chiyani nyamazi zinkayandikira pang'onopang'ono?
2. N'chifukwa chiyani nyama zina zinakira Mkango?
3. Mukuganiza kuti n'chifukwa chiyani Bulu anapita komalizira?
4. Kodi kubwezera n'kulakwa?
5. Kodi tikuphunzira chiyani m'nkhanisiyi?

Bulu Komanso Galu

Tsiku lina Mlimi anapita kukaona ana komanso ziweto zake. Pakati pa nyamazi panali Bulu. Ndiye pamene Mlimiyo ankapita kumeneku, n’kuti ali limodzi ndi Galu wake yemwe ankamukonda kwambiri. Galuyo ankadumphadumphha n’kumanyambita komanso kugwira mkono wa Mlimiyo. Kenako Mlimiyo anapisa m’thumba n’kutenga chakudya n’kupatsa Galuyo, ndipo kenako anakhala pansu n’kuyamba kupereka malangizo kwa ana ake. Ndiyeno Galuyo analumphira pamiyendo pa Mlimiyo ndipo Mlimiyo anayamba kumusisita. Bulu uja ataona zimenezi anasilira kwambiri moti anadula chingwe chimene anamumanga nacho n’kuthamangira kwa Mlimiyo kuti nayenso akachite chimodzimodzi. Mlimiyo ataona zimenezi anayamba kuseka ndipo Buluyo ankaganiza kuti zimene akuchitazo zikumusangalatsa. Ndiye kenako anaganiza zoti alumphire pamiyendo pa Mlimiyo n’cholonga choti nayenso amusisite. Koma chifukwa cha kutalika, Buluyo sanakwanepo, moti miyendo yake inagwira m’mapewa mwa Mlimiyo. Ana a Mlimiyo ataona zimenezi anaganiza kuti Buluyo wachita misala, ndipo anatenga ndodo n’kuyamba kumuumbudza.

Phunziro: *Osamangotengera zilizonse zimene ena akuchita.*

Mafunso

1. N’chifukwa chiyani Bulu anaganiza zotengera zochita za Galu?
2. Kodi Buluyo anakumana ndi zotani? Nanga n’chifukwa chiyani anakumana ndi zimenezo?
3. Kodi n’kulakwa kumangotengera zochita za ena, bola ngati tikuona kuti zikuwayendera bwino?
4. Kodi tikuphunzirapo chiyani m’nkhaniyi?

Khoswe Apulumutsa Mkango

Tsiku lina Mkango ukugona, Khoswe anayamba kuukwerakwera. Zimenezi zinachititsa kuti Mkangowo udzidzimuke ndipo unagwira Khosweyo n’kutsegula kamwa lake kuti ungomu ponyera mkamwa n’kumutafuna. Koma Khosweyo anakuwa n’kuuza Mkangowo kuti, “Pepani Mfumu yanga, ndikhulukireni chonde! Ndimvereni chisoni, ndinetu mwana wamasiye! Mutandisiya wamoyo kano kokha, ndikhoza kudzakupulumutsani m’tsogolo.” Mkango utamva zimenezi unafa nalo phwete ndipo unati, “Usandise ketse mkamwa, zoonawo iweyo ungandipulumutse?” Posakhulupirira zimenezi, Mkangowo unamusiyadi Khosweyo. Ndiyeno patapita nthawi, Mkango uja unagwidwa pamsampha, ndipo alenje atauona anaganiza zounyamula n’kupita nawo kwa mfumu yawo. Kenako anaugwira n’kuukwidzinga pamtengo n’kupita kukasakasaka ngolo yoti adzaunyamulire. Alenje aja atangochoka, Khoswe uja anadutsa pafupi ndi pomwe panali Mkango uja. Ataona mmene Mkangowo unkandandaulira, anapita pomwepo n’kuchecheta chingwe chomwe anaumangira chija ndipo chinaduka. Kenako anauza Mkangowo kuti, “Si paja ndinakuuzani kuti ndikhoza kudzakupulumutsani! Mwaonatu, osamachepetsa kolemera.” Kenako ananyamuka n’kumapita.

Phunziro: *Nthawi zina anthu onyozeka ndi amene amathandiza kwambiri.*

Mafunso

1. N’chifukwa chiyani Mkango unasiya Khoswe kuti apite?
2. Kodi Khoswe anathandiza bwanji Mkango? Nanga n’chifukwa chiyani anauthandiza?

3. Pakati pa Khoswe ndi Mkango, kodi mukuganiza kuti ndi nyama iti imene inaphunzirapo kenakake?
4. Kodi tikuphunzira chiyani m'nkhaniyi?

Namzeze Achenjeza Mbalame Zina

Nthawi ina Mlimi anapita kukafesa mbewu ya chamba m'munda wina womwe Mbalame zinkakonda kukatola zakudya zake. Ndiye Mbalame ina yotchedwa Namzeze itaona zimenezi inayamba kuchenjeza mbalame zinzake zomwe zinkatola zakudya m'mundawo. Inati, "Samalani ndi munthu uyo." Mbalame zinazo zinamufunsa kuti, "Chifukwa? Kodi zimene akuchitazo zikutikhudza?" Iye anayankha kuti, "Munthuyu akufesa mbewu yoipa. Musayerekeze kusiya nthangala ngakhale imodzi ya mbewu zimenezi. Mukapanda kutero, mudzaona zakuda." Mbalamezo zinkaona kuti zimene Namzeze anakambazo ndi za kuntchini kwadzaza, moti sizinatsatire malangizowo. Koma patapita nthawi, mbewuzo zinayamba kukula ndipo mbalamezo zinayamba kuthothola masamba ake n'kumakamangira zisa. Kenako, mbalame zosamverazo zinagwidwa zili m'zisa zopangidwa ndi masamba a chamba, omwe zinatenga m'munda uja. Mbalame zambiri zinasokonezeka ndi tsokali ndipo sizinkadziwa chifukwa chimene munthuyo ankatengera zisa zawo. Ndiyeno Namzeze anaziuza kuti, "Ndinakuuzani chiyani ine? Kumachotseratu mbewu yoipa isanamere! Mtsinje wa tinkanenatu unathera mu si izi."

Phunziro: *Kumachotsa mbewu yoipa isanamere, apo ayi mtsogolo imadzabweretsa mavuto.*

Mafunso

1. Kodi mbewu yoipa imene namzeze ankanena inali chiyani?
N’chifukwa chiyani mukutero?
2. Kodi namzeze anauza mbalame zinzake kuti zichite chiyani?
3. N’chifukwa chiyani Mlimiyo ankatenga zisa za mbalamezo?
4. Kodi mungapereke zitsanzo za zinthu zina zoipa zimene ngati titazilekerera zikhoza kutibweretsera mavuto?
5. Kodi tikuphunzira chiyani m’nkhanayi?

Achule Afuna Mfumu

Achule ankakhala mosangalala m’dambo lina lokongola kwambiri. Nthawi zonse ankangokhalira kusewera. Ankati akadzuka m’mawa, ankayamba kuwothera dzuwa komanso kudya, ndipo akamva kutentha, ankakwera pamwala n’kudziponya m’madzi kuti mphava! Ankakhala kukhosi kuli mbee ndipo palibe chimene chinkawavutitsa. Komatu ukakhala pabwino, poipa pamakuitana. N’kupita kwa nthawi Achulewa anayamba kuona kuti moyo umenewu si wabwino, moti ankafuna atakhala ndi mfumu komanso malamulo abwino oti aziyendera. Choncho anaganiza zokapempha kwa mulungu kuti awapatse mfumu yoti iziwalamulira. Iwo anati, “Mulungu wathu wamkulu, titumizireni mfumu yoti izitilamulira komanso kutipatsa malamulo oti tiziyendera.” Mulungu atamva zimene Achulewo ananena, anaseka ndipo anagwetsa chipika chachikulu chomwe chinagwera m’dziwe lomwe linali m’dambo lija. Achulewo anachita mantha kwambiri chifukwa cha phokoso lomwe linamveka pamene chipikacho chinkagwera m’madzi, moti onse anathawa n’kupita kumtunda. Kwa masiku ambiri ankakhala mwamantha ndipo sankayandikira n’komwe chinthu choopsa

chomwe chinagwera m'madzicho. Koma patapita nthawi, achulewo anaona kuti chinthucho sichikutakataka. Ndiyeno Achule ena olimba mtima anapita pafupi ndi chipika chija moti ena analimba mtima n'kuchigwira. Komabe, chipikacho sichinasunthe. Kenako Chule wina, yemwe ankadziwika kuti ndi wolimba mtima kwambiri, analumphira pamwamba pachipikacho n'kuyamba kuvina, ndipo Achule enanso anayamba kuchita zomwezo. Izi zitachitika, Achulewo anatha mantha ndipo anayambanso kukhala monga mmene ankakhalira kale. Anaiwaliratu zoti mulungu anawagwetsera chipika, chomwe chinali ngati mfumu yawo. Achulewo anayamba kuona kuti mfumuyi ndi yatulo ndiponso kuti si yowayenera, moti anaganiza zopitanso kwa mulungu kuti akapemphenso mfumu ina. Anati, "Tikufuna mfumu yeniyeni yoti izitilamulira, osati yomwe ikungoliza nkononoyi!" Zimenezi zinachititsa kuti mulungu akwiye ndipo anatumiza Dokowe. Dokoweyo anayamba kujompha achulewo n'kumawadya. Ndiyeno Achulewo ataona zimenezi, anachita mantha zedi moti anayamba kulirira mulungu kuti awachotsere chilombocho, koma munali m'mbuyo mwa alendo.

Phunziro: Ndibwino kukhala popanda mfumu n'kumakhala bwinobwino kusiyana ndi kukhala nayo, koma n'kukhala yankhanza.

Mafunso

1. Kodi mukuganiza kuti n'chifukwa chiyani mulungu anatumiza chipika kwa Achule aja, m'malo mowapatsa mfumu yeniyeni?
2. N'chifukwa chiyani achule anapitanso kukapempha mfumu ina?
3. N'chifukwa chiyani mulungu anawakwiwira?
4. Kodi tikuphunzira chiyani m'nkhaniyi?

Phokoso la Mapiri

Tsiku lina anthu a m'mudzi wina anayamba kumva phokoso loopsa lomwe linkamveka kuchokera m'Mapiri ena omwe anali pafupi ndi kwawo. Anthuwa ankaganiza kuti Mapiriwo akubereka ana. M'Mapiriwo munkatuluka chiutsi, nthaka inkangoti teketeke, mitengo inkangogwa komanso miyala inkangosweka. Iwo ankaona kuti pakhoza kuchitika chinachake choopsa. Anthuwo anasonkhana pamodzi kuti aone chomwe chitachitike. Anadikira, kudikira n'kudikira, koma palibe chinachitika. Kenako panachitikanso chivomerezi china champhamvu kwambiri moti nthaka inang'ambika pambali pa phiri lina. Anthuwo anayamba kuyang'ana mwachidwi m'phangalo ndipo anapitirizabe kudikira. Kenako anangoona kakhoswe kakang'ono kakuchokera m'phangalo. Kakhosweko kankapukuta mutu wake ndi timiyendo take tating'ono. Kenako kanatuluka n'kumalowera kumene kunali anthu aja. Kungochokera nthawi imeneyo anthuwo anayamba kunena kuti, "Pakakhala chiphokoso chachikulu, zotsatira zake zimakhala zogwetsa mphwayi." Ndipo ena ankati, "N'chifukwa chaketu anthu a kum'mawa amanena kuti, 'chidebe chopanda kanthu chimapanga phokoso kwambiri.' Mpake kuti ena amaganiza kuti, 'anthu omwe sayankhulayankhula ndi amene amaganiza mwaphokoso zedi!"

Phunziro: *Nthawi zina anthu amene amalongolola kwambiri sachita zanzeru.*

Mafunso

1. Kodi Anthu ankaganiza kuti chichitike n'chiyani?
2. Kodi zimene Anthuwo ankayembekezera zinachitikadi?
3. Kodi tikuphunzirapo chiyani m'nkhaniyi?

Akalulu Akumana ndi Mavuto

Nthawi inayake Akalulu ankazunzidwa ndi zilombo zina zosadziwika bwinobwino moti ankasowa kothawira. Zimenezi zinachititsa kuti akangoona nyama iliyonse azithawa n’kukabisala. Akaluluwa anafika potopa ndi zimenezi moti tsiku lina anaganiza zokangodziponya m’madzi n’kufa. Ndiye ataona Njati zikuthamanga, Akaluluwo anathawira kudziwe lina kuti akangodziponya m’madzi n’kulekana nawo moyo wokhala mwamantha. Ndiye atayandikira dziwelo, anadzidzimutsa Achule ena omwe ankaothera dzuwa ndipo nthawi yomweyo Achulewo anadziponya m’madzi. Kalulu wina ataona zimenezo anati, “Aa! akuluakulu, mavuto amene tili nawo ifewa, bola. Taonani anzathuwa! Ndaphunzirapo kanthu. Ukamakumana ndi mavuto, kumakumbukira kuti pali ena omwe akukumana ndi mavuto onenepa kwambiri kuposa ako.”

Phunziro: Ukamakumana ndi mavuto, m’malo mongoganiza zodzipha, ndi bwino kumakumbukira kuti pali enanso amene akukumana ndi mavuto kuposa akowo.

Mafunso

1. N’chifukwa chiyani Akalulu ankafuna kudziponyera m’madzi?
2. N’chiyani chinawapangitsa kusintha maganizo?
3. Kodi ndi nyama ziti zimene mukuona kuti nazonso zimachita mantha kwambiri zikaona Achule?
4. Kodi tikuphunzira chiyani m’nkhaniyi?

Ukakwera M’mwamba Usamatukwane Pansi

Mnyamata wina anakwera padenga la nyumba ndipo atayang’ana pansi, anaona Nkhandwe ikudutsa pafupi ndi nyumbayo. Nthawi yomweyo anayamba kuinyodogola amvekere, “Ndiwe chigawenga komanso kapsala. N’chifukwa chiyani wabwera kuno kunyumba za anthu a mtendere komanso abwino, kodi ulibe manyazi? N’chifukwa chayani umakonda kupita m’ malo amene anthu amadziwa kale makhalidwe ako ochititsa dambisi?” Itamva zimenezi, Nkhandweyo inayankha kuti, “Ukhoza kundinyoza mmene ungathere. Zimakhala zophweka kumadzitukumula komanso kumachita mwano utakwera padenga. Ndikulakalaka kuti tsiku lina uzidzabwebwetuka choncho uli pansipa.”

Phunziro: Osamatha mawu zikakhala kuti zinthu zikukuyendera. Osamachita chipongwe ukakhala malo otetezeka, chifukwa nthawi ina udzachokapo.

Mafunso

1. Kodi mukuganiza kuti n’chifukwa chiyani Mnyamatayu ankanyoza Nkhandwe ali padenga la nyumba?
2. Kodi mukuganiza kuti nthawi zina anthu amachitadi zangati zimenezi? Perekani chitsanzo.
3. Kodi tikuphunzira chiyani m’nkhanayi?

Pansi pa Mtima

Tsiku lina Gondwa anaba nkhu ku pakhomu lina ndipo anakalowa nayo kuphanga lake. Atafika kuphangako anauza ana ake kuti waba nkhu kuyo kukhomo lapafupi. Koma kuti aiwotche, ankafunika moto. Ndiye Gondwayo anaganiza zotuma mwana wake kuti akapale moto kukhomo anaba nkhu ku lija. Anamuuzza kuti, “Ndikufuna ukapale moto uko. Koma popeza nkhu kuyi taba komweko, asakadziwe kuti tikufuna kudzawotchera nkhu ku. Ndiye ngakhale akakukakamize, usakaulule kuti motowo tikudzachitira chiyani. Koma pansi pamtima uzingodziwa iweyo kuti tikufuna kudzawotchera nkhu ku.” Kenako mwanayo ananyamuka n’kupita kukapala moto atatenga chiwaya chake. Atafika kumeneko, anagogoda ndipo ananena chimene wabwerera. Anthu amene anawapeza kunyumbako anayamba kumupanikiza ndi mafunso, amvekere, “Motowo mukufuna mukachite nawo chiyani?” Mwanayo anayankha kuti, “Anandiuzatu kuti ndisadzaulule. Amati ndizingodziwa ndekha, pansi pamtima wanga, kuti tikufuna kukawotchera nkhu ku.” Anthuwo atangomva zimenezi anazindikira kuti nkhu ku yawo waba ndi Gondwa, ndipo anathamangitsa mwanayo mpaka kukafika paphanga lija. Kenako anatenga khasu n’kukumba phangalo ndipo anapha Gondwa ndi ana ake onse.

Phunziro: *Palibe chinsinsi padziko lapansi.*

Mafunso

1. Kodi mwana wa Gondwa ananena chiyani atafunsiidwa chifukwa chimene anapitira kukapala moto?
2. Kodi zimene mwanayo ananena zinali zoonza kapena zabodza?

3. Kodi mwanayu analakwitsa kunena zinthu zina zimene bambo ake anamuuza kuti angozidziwa yekha? Ndiye tinganene kuti kunena zooni si kwabwino?
4. Kodi tikuphunzira chiyani m'nkhanayi?

Njoka Yopanda Pabwino

Chaka china kunazizira kwambiri moti madzi ankatha kuuma gwa ngati mwala. Ndiye munthu wina, yemwe ankachokera kunkhalango, anaona njoka yakuda itagona m'mbali mwa nsewu. Njokayo inkaoneka kuti yangotsala pang'ono kutsirizika chifukwa cha kuzizira. Kenako munthuyo anaichitira chifundo ndipo anaitola n'kuiika mu juzi yake kuti imve kutentha. Atafika kwawo anaiika pafupi ndi moto kuti itenthedwe. Ana a munthuyo ankangoiyang'ana. Kenako Njokayo inayamba kumvako bwino, moti inayambiranso kuyenda bwinobwino. Ndiyeno mwana m'modzi anaganiza zoti aisisite, koma atangochita zimenezi, Njokayo inadzutsa mutu wake kuti imulume. Munthuyo atangoona zimenezo anatenga nkhwangwa yake n'kudula Njokayo pakati. Kenako anati, "Anthu ena alibe pabwino inu! Ukhoza kuwachitira chifundo koma sayamika, moti amalumanso dzanja limene likuwadyetsa. Munthu woti ndamupulumutsa, akufunanso kundiphera mwana?"

Phunziro: *Anthu oipa alibe pabwino.*

Mafunso

1. N'chifukwa chiyani munthu uja anatola Njoka?
2. N'chifukwa chiyani Njokayo inkafuna kuluma mwana wa munthuyo?

3. Kodi nkhanayi ikusonyeza kuti munthuyo anaphunzirapo chiyani pa zimene zinachitikazo?
4. Kodi tikuphunzira chiyani m'nkhanayi?

Ntchentche Yosimbwa

Kalelo kunali bambo wina wadazi. Munthuyu akamaliza kudya nsima, ankakonda kukhala pakhonde kuti aphwetse mkhuto wake. Ndiye tsiku lina kunabwera Ntchentche n'kuyamba kumusokosa komanso kumuluma dazi lake. Kenako Ntchentcheyo inatera pa dazilo ndipo bamboyo anaganiza zoionetsa mbwadza poiphwanya ndi dzanja lake. Koma m'malo moti aphwanye ntchentcheyo, anamenya mutu wake, moti anamva kupweteka kwambiri. Ntchentcheyo inapitirizabe kusimbwa, koma pa nthawiyi, nzeru zinamubwerera bamboyo moti sanalimbane nayo. Anati, "Umangodzivulaza wekha ukamalimbana ndi adani oipa."

Phunziro: *Ukamalimbana ndi munthu woipa, umavutika ndi iweyo.*

Mafunso

1. N'chifukwa chiyani munthuyu anadzimenya m'mutu?
2. N'chifukwa chiyani anaganiza zongosiya kulimbana ndi Ntchentcheyo?
3. Kodi tikuphunzira chiyani m'nkhanayi?

Nkhandwe Ichezera Dokowe

Kalekalelo Nkhandwe inali pa ubwenzi wa ponda apo m'pondepo ndi Dokowe. Ndiye tsiku lina Nkhandweyo inaitana Dokowe kuti akadye nkhomaliro kwawo. Koma Dokowe atafika, anapeza kuti wangomuphikira nsuzi ndipo anauika m'mbale yosalowa. Dokoweyo anayesetsa kuti amwe nsuziwo koma palibe chomwe anaphulapo. Nsuziwo unkangothera pamulomo wake wautali. Analimbana nawo kwa nthawi yaitali ndipo atatopa anangousiya, koma ali ndi njala kwambiri. Ndiye popeza paja amati, kwa eni kulibe mkuwo, mutu wa nkhuu n'chiwalo, dokowe sananene chilichonse. Anazindikira kuti mnzakeyo anachita izi pongofuna kumucheza basi. Kenako Nkhandwe inati, "Pepani kuti ndinakuphikirani nsuzi womwe simumaukonda. Ndikuona kuti udakali nde, mmene unalili." Koma Dokowe anayankha kuti, "Usapepese ambwana, ndathokoza kwambiri chifukwa cha mtima wako wochereza alendo." Kenako ananyamuka n'kuona msana wa njira. Ndiye tsiku lina, Dokowe nayenso anaitana mnzakeyo kuti akadye kwawo. Itangomva uthengawu, nkhandweyo sinachedwechedwe, moti inauyamba ulendo wa kwa mnzakeyo. Itafika, inamupeza akumudikirira ndipo inati, "Ndabwera bwanawe, paja okuluokulu odati kaitana kachita ujeni, ukachedwa ungakakapeze katabopha!" Mnzakeyo anaseka kwambiri ndipo kenako anamulowetsa m'nyumba kuti akadye zakudya zokoma zomwe anamukonzera. Zakudyazo anaziika mumtsuko wa kukamwa kwakung'ono, moti nkhandwe sikadantha kulowetsa mutu wake n'kudya chakudyacho. Nkhandweyo inamva kuwawa mumtima mwake chifukwa cha zimenezi moti inangoyamba kunyambita kunja kwa mtsukowo. Ndiyeno Dokowe anati, "Sindipepesa ndi zimene zachitikazi, mwina ungaphunzirepo kathu. Nkhonya yobwezeratu imawawa?"

Phunziro: *Tizichitira ena zimene ifenso timafuna atatichitira.*

Mafunso

1. Kodi Nkhandwe inachitira bwanji Dokowe chipongwe?
2. Nanga Dokowe anachita chiyani atazindikira zimenezi?
3. Mukuganiza kuti n'chifukwa chiyani tinganene kuti Nkhandwe ndi Dokowe sanali mabwenzi a pamtimadi?
4. Kodi tikuphunzira chiyani m'nkhanayi?

Nkhandwe Itola Chigoba

Tsiku lina Nkhandwe inalowa m'chipinda china chomwe anthu ochita zisudzo ankasungamo zinthu zawo. Mwadzidzidzi, Nkhandweyo inaona nkhope ya munthu ikumuyang'ana ndipo inayamba kuchita mantha. Koma itayang'anitsitsa bwinobwino inaona kuti chinali chigoba chomwe ochita zisudzo ankavala akamachita sewero. Ndiyeno Nkhandweyo inati, "Kani ndi iweyo? Umaonekatu ngati ndiwe munthu weniweni. Koma n'zomvetsa chisoni kuti ulibe ubongo."

Phunziro: *Osamapusitsidwa ndi maonekedwe akunja.*

Mafunso

1. N'chifukwa chiyani Nkhandwe inkachita mantha itaona chigoba?
2. N'chifukwa chiyani Nkhandweyo inauza chigobacho kuti, "N'zomvetsa chisoni kuti ulibe ubongo"?
3. Kodi tikuphunzira chiyani m'nkhanayi?

Timba Atengeka ndi Mbalame Zokongola

Tsiku lina Timba anapita kukawongola miyendo kumalo amene mbalame zina zokongola kwambiri zinkakonda kukhala, ndipo anatola nthenga zososoka za mbalamezo n’kuzimangirira ku chipsepse chake n’kumayenda moyerekedwa, kwinku akulowera kumene kunali mbalamezo. Ndiye mbalamezo zitamuona, zinakwiya kwambiri ndipo zinamugwira n’kumuchotsa nthenga anamanga kuchipsepse zija. Chifukwa cha manyazi, Timbayo anabwerera kumene kunali mbalame zinzake, zomwe zinkaona zimene zinkachitikazo zili chapatali. Anzakewo anamukwiya kwambiri ndipo anamuuzza kuti, “Si kukongola kwa nthengatu kumene kumapangitsa mbalame kukhala yabwino, koma mtima.”

Phunziro: *Maonekedwe akunja sanena zambiri za mtima wa munthu*

Mafunso

1. N’chifukwa chiyani mbalame zokongola zinazula nthenga pa chipsepse cha Timba?
2. N’chifukwa chiyani anzake a Timba anakhumudwa ndi zimene mnzawo anachitazi?
3. Kodi tikuphunzira chiyani m’nkhanisiyi?

Kudzitama Kunaphetsa Chule

Tsiku lina Chule ndi bambo ake anakhala m'mbali mwa dziwe n'kumawothera dzuwa. Chule wamng'ono anauza bambo ake kuti, "Bambo, dzulo ndinaona chinthu chachikulu koopsa. Chinalitu chachikulu, chachikulu zedi ngati phiri. Chinali ndi nyanga ziwiri zikuluzikulu pamutu pake, chimchira chachitali komanso dzimapazi zikuluzikulu." Kenako bamboyo anati, "Takhala chete iwe, imene ukunenayotu ndi Ng'ombe ya mlimi wa pamtundapo. Koma sikuti ndi yaikulu mmene ikuneneramo, ukungokokomeza iwe.

Yangokhala yaitaliko pang'ono poyerekeza ndi ineyo, moti nanenso nditadzifufumitsa ndikhoza kufanana nayo. Dikira uone"

Kenako chuleyo anakokera mpweya n'kudzifufumitsa kwambiri.

Ndiyeno anafunsa mwana wakeyo kuti, "Kodi ng'ombeyo inali

yaikulu chonchi?" Chule wamng'onoyo anayankha kuti, "Ayi, inali yaikulu kuposa pamenepo." Chuleyo anapitirizabe kukokera

mpweya ndipo anadzifufumitsa, n'kudzifufumitsa kenako

n'kudzifufumitsa. Ndiyeno anafunsa kuti, "Nanga bwanji

pamenepo?" Mwanayo anayankha kuti, "Ayi, inali yaikulu, yaikulu kwambiri kuposa pamenepo." Ndiyetu Chule wamkuluyo anakoka

mpweya, kuukoka, n'kuukoka moti anafufuma, kufufuma kenako

n'kufufuma. Ndiyeno anati, "Ndikuganiza kuti Ng'ombeyo sinali

yaikulu kuposa apa" Atangonena zimenezi, nthawi yomweyo anaphulika.

Phunziro: *Kufuna kuoneka wochenjera kumabweretsa mavuto.*

Mafunso

1. N'chifukwa chiyani chule wamng'ono ankaganiza kuti waona chilombo chachikulu koopsa?

2. Mukuganiza kuti n'chiyani chinachititsa kuti bambo a Chuleyo asonyeze mwana wakeyo kuti akhoza kufanana ndi chilombocho?
3. N'chiyani chinapangitsa kuti bamboyo aphulike?
4. Kodi tikuphunzira chiyani m'nkhanayi?

Ubwenzi wa Mkango ndi Kapolo

Tsiku lina kapolo wina anathawa kwawo n'kulowa m'nkhalango ina. Pamene ankayendayenda m'nkhalangomo anakumana ndi Mkango womwe unkabagula. Atangouona anatembenuka n'kuyamba kuthawa, koma anadabwa atazindikira kuti mkangowo sukumuthamangitsa. Kenako anaima n'kubwerera kumene kunali Mkango uja. Pamene ankauyandikira, mkangowo unamuonetsa dzanja lake lomwe linkatuluka magari. Kapoloyo anaona minga yaikulu yomwe inabaya mwendo wa mkangowo ndipo unkamva ululu wosaneneka. Kapoloyo anamva chisoni kwambiri moti anachotsa mingayo n'kumangapo nsanza. Atangomaliza kuchita zimenezi, Mkangowo unadzuka n'kuyamba kunyambita kapoloyo ngati mmene amachitira galu. Kenako unatenga kapoloyo n'kupita naye kuphanga lake ndipo tsiku lililonse unkamubweretsera nyama yoti adye. Koma pasanapite nthawi, Mkangowo komanso kapoloyo anagwidwa ndi anthu a kumudzi anathawa kuja. Chifukwa choti kapoloyo anathawa mbuye wake anaweruzidwa kuti aphedwe pomusiya kuti adyedwe ndi mkango. Kenako anasiya Mkangowo osaupatsa chakudya kwa masiku angapo kuti akadzangoumasura, udzapwepwete ndi mafupa omwe. Mfumu komanso anthu a m'mudzimo anasonkhana pabwalo lina kuti aone zimenezi zikuchitika ndipo asilikali anagwira kapolo uja n'kumapita naye

kumene kunali Mkango kuja. Kenako asilikali anamasula chingwe chomwe anamangira Mkangowo ndipo unayamba kuthamanga ukubangula n’kumapita komwe kunali kapolo uja. Koma Mkangowo utayandikira, unazindikira kuti ndi bwenzi lake lomwe linamusamalira atavulala. Moti unagona pansu pafupi ndi kapoloyo n’kuyamba kunyambita manja ake monga mmene amachitira galu. Mfumu ya mudziwo inadabwa ndi zimenezi ndipo inaitanitsa kapoloyo. Kapoloyo anafotokoza zonse zomwe zinachitika ndipo Mfumuyo inakhululukira kapoloyo. Mkango ujanso unamasulidwa n’kupita kunkhalango.

Phunziro: *Ukamachitira ena zabwino, nawonso amadzakuthandiza zikadzakusokonekera.*

Mafunso

1. N’chifukwa chiyani kapolo anathandiza Mkango?
2. N’chiyani chinachititsa kuti Mkango ndi kapoloyo azigwirizana?
3. Kodi mfumu inaphunzirapo chiyani pamene kapoloyo anafotokoza zimene zinachitika kuti Mkangowo usamudye?
4. Kodi tikuphunzira chiyani m’nkhaniyi?

Mleme Uchenjera Pogona

Pa nthawi ina zilombo zakuthengo ndi mbalame zinayambana moti panakonzedwa zoti pachitike nkhondo. Ndiye mbalame zinayamba kusunghanitsa asilikali ake, nazonso zilombo zinayamba kuchita chimodzimodzi. Koma Mleme unakakana kulowa ku gulu lililonse. Mbalame zinkati zikauuza kuti ukhale msilikali unkati: “Inetu ndili m’gulu la zilombo, siine mbalame.” Komanso zilombo zikauuza kuti, “Bwera udzalowe gulu lathu,” ankayankha kuti, “Inetu ndine mbalame, ndiye ndilowa bwanji m’gulu lanu?” Koma mwamwayi, nkhondo ija inalephereka ndipo mbalame komanso zilombo zakuthengo zinagwirizana zokhazikitsa mtendere. Kenako mbalame komanso zilombo zija zinakonza phwando lokondwerera kuti nkhondoyo yalephereka. Ndiye mleme unaganiza zokasangalala nawo ndipo unapita kumene kunali mbalame koma mbalame zonse zinagwanda. Kenako unauluka n’kupita kumene kunali zilombo zakuthengo. Koma nazonso zinamukana ndipo zinamuuzza kuti akapanda kunyamuka zikuonetsa zakuda. Mlemewo unadandaula kwambiri ndi zimenezi ndipo unati, “Ukakhala kuti suli m’gulu lililonse, umakhala wekha.”

Phunziro: *Osamafuna anzathu pakakhala pamtendere.*

Mafunso

1. N’chifukwa chiyani Mleme unakana kukhala m’gulu la mbalame komanso la zinyama?
2. N’chifukwa chiyani mbalame komanso zinyama zinakana mleme atabwera kuti adzasangalale nawo?
3. Kodi tikuphunzira chiyani pamenepa?

Nkhani ya Mbawala ndi Mlenje

Tsiku lina Mbawala inkamwa madzi ndipo inayamba kugomera chithunzithunzi chake chomwe chinkaoneka m'madzi. Kenako inati, "Ndi ndani winanso amene ali ndi nyanga zokongola chonchi m'nkhalango muno?" Kenako inayang'ana miyendo yake n'kunena kuti, "Ndimalakalaka ndikanakhala ndi miyendo yolongosoka yoti izigwirizana ndi nyanga zamtengo wapatali zomwe zili m'mutu mwangazi. Zimandiwawa kwambiri ndikaganizira kuti miyendo yanga ndi yoonda ngati zotokosera m'mano." Mawu amenewa ali mkamwa, kunatulukira mlenje ndipo anayamba kuithamangitsa. Koma chifukwa choti miyendo yake ndi yo pepuka, Mbawalayo inangotsomphoka n'kuthawa, moti posapita nthawi inali patali kwambiri. Mbawalayo inapitirizabe kuthamanga ndipo inasiya kuyang'ana komwe imapita, moti inalowa m'ziyangoyango. Chifukwa cha kukula kwa nyanga zake, inakanirira m'ziyangoyangozo ndipo mlenje uja anaipeza n'kungoitola. Mbawalayo inayamba kulira ndipo mumtima mwake inkati, "N'chifukwa chiyani timakonda kunyoza zinthu zomwe zimatithandiza kwambiri, n'kumakonda zinthu zomwe zikhoza kutiika m'mavuto?"

Phunziro: *Zinthu zimene zimaoneka zonyozeka m'zimene zimatithandiza kuti tikhale ndi moyo.*

Mafunso

1. N'chifukwa chiyani mbawala inkafuna kukhala ndi miyendo yokongola?
2. Kodi n'chiyani chinachititsa kuti Mbawala igwidwe?
3. Kodi tikuphunzira chiyani m'nkhaniyi?

Njoka Ipsa Mtima

Tsiku lina njoka inalowa m’nyumba ya munthu wina momwe munali zitsulo komanso zinthu zina. Ikuyenda, njokayo inayamba kukandidwa ndi chitsulo chinachake, moti inapsa mtima n’kuyamba kuchimenya. Itaona kuti palibe chimene chimachitika inangosiya kulimbana ndi chitsulocho n’kumapita. Inkaona kuti ikhoza kungotaya nthawi yake kumalimbana ndi chinthu chomwe sichimva kupweteka.

Phunziro: *N’kupanda nzeru kumalimbana ndi chinthu chomwe sichimva kupweteka.*

Mafunso

1. Kodi n’chifukwa chiyani njoka inayamba kumenya chitsulo?
2. Kodi mungapereke chitsanzo cha zimene anthu amachita zomwe zimakhala ngati kulimbana ndi chitsulo?
3. Kodi tikuphunzira chiyani m’nkhanayi?

Mitengo Inadzipweteketsa

Tsiku lina munthu anapita kunkhalango nkhwangwa ili m’manja. Munthuyo ankapita kunkhalangoko kuti akapemphe nthambi ya mtengo woti aike kunkhwangwa yakeyo, ndipo anauza mitengo yomwe anaipeza m’nkhalangomo kuti imuchitire chifundo n’kumupatsa zomwe amafunazo. Mitengoyo itamva dandauloli, inafunsa munthuyo kuti akufuna akachite chiyani ndi nkhwangwayo akaika nthambiyo. Munthuyo anayankha kuti, “Ndikufuna ndikachitire zinthu zofunika kwambiri.” Popeza mitengo inali yachifundo, inapatsa munthuyo zomwe ankafuna. Kenako

munthuyo anatenga mtengowo n'kuika kunkhwangwayo ndipo anayamba kugwetsa mitengo ya m'nkhalangomo. Mitengoyo itaona zimenezi inayamba kudandaula kuti sinaganize bwino popereka kwa mdani wawo chida choti awaphere.

Phunziro: *Osamapereka chida kwa mdani wako chifukwa akhoza kukuphera chomwecho.*

Mafunso

1. Kodi mukuganiza kuti mitengo sinkadziwa chimene munthuyo ankafuna kuchita ndi nkhwangwa yomwe inali m'manja mwake?
2. Kodi mitengo ikanapewa bwanji mavuto amene anabwera pambuyo pake?
3. Kodi tikuphunzira chiyani m'nkhaniyi?

Galu Akumana ndi Nkhandwe

Nkhandwe inali itatheratu chifukwa cha njala pamene inakumana ndi Galu wina yemwe ankangodziyendera. Galuyo anati: “Oo! kodi ndi abwenzi? Inetu ndinkadziwa kuti moyo wanu wosakhazikikawu udzakubweretserani mavuto. Mufa ndi njalatu! Bwanji osamagwira ntchito ngati mmene ndimachitira ine kuti muzipatsidwa chakudya nthawi zonse?” Nkhandweyo inati, “Apo ndiye sindingakutsutse m'bale wanga. Ngati mwayi utapezeka ndikhoza kuchita zomwezo.” Kenako Galuyo anati, “Tiye tipite kwa abwana anga ndipo uzikagwira ntchito imene ndimagwira. Ngati utamakagwira ntchito molimbikira, ukhoza kudzakhala Nkhandwe yodya bwino.” Kenako nyama ziwirizi zinauyamba ulendo wopita kunyumba kwa galu. Koma zili m'njira, Nkhandwe inaona kuti pakhosi pa Galu panali

poperepeseka ndipo inafunsa kuti, “Kodi khosi lakoli linatani bwanawe?” Galuyo anayankha kuti, “Aa, ndi mmene lilili. Pamenepa m’pamene pamadutsa kolala. Pakolala imeneyo ndi pamene amakolekapo chingwe chomwe amandimanga nacho ndikamagwira ntchito usiku. Nthawi zina chimapana pakhosipa ndithu, n’chifukwa chake ubweya wina wasosokapo. Koma aa ndi zazing’ono, ukazolowera monga mmene ndinachitira ineyo.” Kenako nkhandweyo inati, “Umenewotu ndi moyo wovuta, kwathu timakhala mwaufulu ife. Basi tionana, ndikupita kwathu ine.”

Phunziro: Ndibwino kumaonda uli paufulu kusiyana ndi kumanenepa uli kapolo.

Mafunso

1. N’chifukwa chiyani Galu ankafuna kuthandiza Nkhandwe?
2. N’chifukwa chiyani Nkhandwe inaganiza zokana mwayi wa ntchito womwe Galu anamupezera?
3. Kodi pali nthano iliyonse yomwe munaimvapo, yomwe ikugwirizana ndi nkhanayi?
4. Kodi tikuphunzira chiyani m’nkhanayi?

Ziwalo Ziukira Mimba

Tsiku lina ziwalo za thupi zinakwiya kwambiri. Ziwalozi zinkaona kuti zimagwira ntchito yotopetsa, pomwe mimba imangokhala, koma n’kumadya zakudya zonse. Choncho zinachita msonkhano ndipo zitakambirana, zinagwirizana kuti zinyanyale ntchito. Zinanena kuti ziyambiranso pokhapokha mimba ikavomera kuti izigwira nawo ntchito. Ndiyeno kwa masiku angapo, mikono inkakana kunyamula chakudya kupititsa pakamwa. Nalonso kamwa linkakana kulandira chakudya. Zimenezi zinachititsa kuti mano azisowa ntchito yoti agwire. Kenako ntchito zonse zinaimiratu. Koma patatha masiku atatu, ziwalo zija zinayamba kufooka. Manja ankalephera kusuntha komanso miyendo inkalephera kuima. Pamapeto pake ziwalo zinaona kuti nayonso mimba inkagwira ntchito yotamandika zedi, ngakhale inali yosaonekera. Zinaonanso kuti chiwalo chilichonse chimagwira ntchito yaikulu kuti zinthu ziziyenda bwino.

Phunziro: *Mgwirizano umathandiza kuti zinthu ziyende.*

Mafunso

1. Kodi ziwalo zina zija zinkafuna kuti mimba izichita chiyani?
2. Kodi zinachita chiyani pofuna kukakamiza mimba kuti nayonso izigwira ntchito?
3. Kodi ziwalo zinazo zinaphunzira chiyani?
4. Kodi tikuphunzira chiyani m’nkhanisiyi?

Mlimi Agwira Gwape Atabisala

Tsiku lina Mlenje ankathamangitsa Gwape ndipo anam'tengetsa kwambiri moti anangotsala pang'ono kumugwira. Koma Gwapeyo anathawa n'kukalowa m'nkholo la mlimi wina n'kudzikwirira ndi zakudya za Ng'ombe. Miyendo yake yokha ndi imene inkaonekera. Kenako Mlenje uja anafika pakhomo pa Mlimiyo ndipo anafunsa mwana wa pakhomopo kuti, "Kodi unaiona Gwape atadutsa apa?" Mwanayo ananena kuti sanamuone ndipo anayang'anayang'ana m'nkholo komanso malo ena a pafupi koma sanamupeze. Ataona kuti zamuvuta, Mlenjeyo anaona msana wa njira. Kenako Mlimi yemwe anali mwini malowo anatulukira ndipo atayang'ana m'khola la ng'ombelo anaona kuti simukuoneka mmene mumaonekera nthawi zonse. Anayamba kuloza kumene kunali zakudya za Ng'ombe kuja n'kunena kuti, "Kodi mitengo ikuoneka pali zakudya za Ng'ombepo ndi ya chiyani?" Kenako mwana wake uja anapita pamene panali zakudyazo ndipo atakoka mitengoyo anangozindikira kuti akukoka Gwape.

Phunziro: *Chule anadabwa m'madzi muli mwake.*

Mafunso

1. Kodi n'chiyani chinachititsa kuti Mlimiyu agwire Gwape?
2. Kodi n'chifukwa chiyani mnyamata uja komanso Mlenje uja analephera kuona Gwapeyo?
3. Kodi tikuphunzira chiyani m'nkhaniyi?

Nkhandwe M'munda wa Mpesa

Tsiku lina Nkhandwe inkayenda m'munda wina ndipo inafika pamalo ena pomwe panali zipatso za mpesa zomwe zinkaoneka kuti ndi zakupsa, koma kungoti zinali zitayanga pamtengo wautali. Itaona mphesazo, Nkhandweyo inati, “Ndidye mpesazi kuti ndiphe ludzu.” Kenako inabwerera m'mbuyo n'kudumpha, koma sinafike pamene panali mpesazo. Inabwereranso m'mbuyo koma inaphonyanso. Inachita zimenezi kambirimbi, koma palibe chomwe inaphulapo. Kenako inatopa ndipo inanyamuka n'kumapita kwawo itaimika mphuno zake m'mwamba, kwinku ikunena kuti, “Ndikuganiza kuti mphesa zimenezi ndi zowawa.”

Phunziro: *Zimakhala zosavuta kumanyoza zinthu zomwe zakukanika kuzipeza.*

Mafunso

1. N'chifukwa chiyani Nkhandwe inasiya mpesa? Kodi tinganene kuti simazifuna?
2. N'chifukwa chiyani nkhandweyo inanena kuti mphesazo zinali zowawa?
3. Kodi tikuphunzira chiyani m'nkhanisiyi?

Ikakuthawa Imawawa Msuzi

Munthu wina anagwira njiwa ndipo anasangalala kwambiri chifukwa ankadziwa kuti nsima ya tsiku limenelo ikayenda. Koma ali m'kati moganiza zimenezi, njiwayo inamupulumuka n'kuthawa. Munthuyo anapsa mtima n'kuyamba kuikuwira kuiuza kuti, “Iwe, umawawa msuzi!”

Phunziro: *Osamanyoza chinthu chikapita.*

Mafunso

1. Kodi munthuyu ankaganiza zochita nayo chiyani njiwa anagwirayo?
2. N’chifukwa chiyani njiwayo itamupulumuka anaikuwira n’kuiuza kuti imawawa nsuzi?
3. Kodi mukuganiza kuti n’chifukwa chiyani anthu amanyoza chinthu chikapita? Chimakhaladi kuti ndi choipa? Fotokozani.
4. Kodi tikuphunzirapo chiyani?

Hatchi Akhaulitsa Mphoyo

Kalekalelo Hatchi ndi Mphoyo zinayambana, ndiye Hatchi anapita kwa Mlenje n’kumupempha kuti amuthandize kukhaulitsa Mphoyo. Mlenjeyo anavomeradi, koma anati: “Ngati ukufunadi kuti ndikuthandize kukhaulitsa mdani wakoyu, uyenera kumvera zimene nditakuuze. Undilole kuti ndizikutsogolera komanso ndimangirire chingwe ichi pakamwa pako kuti ndikakwera pamsana pakopa ndizichigwira kuti ndisagwe. Komanso ndiike chishalo ichi pamsana pako n’cholinga choti ndisamamve kupweteka ndikakhalapo.” Hatchiyo inagwirizana ndi zimenezi ndipo Mlenjeyo anachitadi zomwe anapanganazo. Zitatero, mothandizidwa ndi Mlenjeyo, Hatchiyo inakhaulitsadi Mphoyo ija. Kenako Hatchi inauza Mlenjeyo kuti, “Popeza zimene timafuna zatheka, tsikatu pamsana pangapa komanso chotsa chingwe wandimanga pakamwachi. Chotsanso chishalo chili pamsanachi.” Koma Mlenjeyo anati, “Osathamanga magazi Hatchi, ndikusangalala kwambiri kukhala pamwamba pano, moti uiwale zoti nditsikapo.”

Phunziro: *Ngati utavomera kuti anthu akugwiritse ntchito pokwaniritsa cholinga chako, nawonso amakugwiritse ntchito pokwaniritsa cholinga chawo.*

Mafunso

1. N’chifukwa chiyani Hatchi inapita kwa Mlenje?
2. N’chifukwa chiyani Mlenje anathandiza Hatchi?
3. Kodi tikuphunzira chiyani m’nkhanayi?

Mbalame Yadyera

Tsiku lina mbalame ina yokongola kwambiri inapita kwa mulungu kukapempha kuti amupatse mawu anhetemya oti azigwirizana ndi kukongola kwake. Mulunguyo atamva pempho la mbalameyi anakana kuichitira zimene inkafunazo. Koma mbalameyi inakakamirabe ndipo inauza mulunguyo kuti amuchitire zimene amafunazo basi. Pofuna kukakamiza mulunguyo kuti achite zimene inkafunazo, mbalameyi inauza mulunguyo kuti amuchitire chifundo chifukwa m’mbuyomo mulunguyo anali atanenapo kuti mbalameyo ndi yokongola komanso yokondedwa kwambiri kuposa mbalame zonse. Koma mulunguyo anaienza mbalameyo kuti, “Uzikhutira ndi zimene uli nazo. Sungakwanitse kupeza chilichonse chimene ukufuna, komanso sungakhale katswiri pa chilichonse. Kusayamika bwanji, kukongolako sikumakukwanira?”

Phunziro: *Palibe munthu amene amadziwa zonse. Palibe munthu amene amakhala katswiri pa chilichonse.*

Mafunso

1. Kodi mbalameyi inkafuna kuti mulungu aichitire chiyani?
2. N’chifukwa chiyani mulungu anakana?
3. Kodi tikuphunzirapo chiyani m’nkhanayi?

Chizolowezi Chimabala Mwano

Nkhandwe ina inamva zoti Mkango ndi woopsa kwambiri komanso kuti ndi Mfumu ya Nyama zonse. Ulendo woyamba umene Nkhandweyi inakumana nawo, inachita mantha kwambiri moti inaliyatsa liwiro n’kukabisala m’nkhalango. Koma itakumananso ndi Mkangowo ulendo wachiwiri, inaima patali n’kumauyang’ana ukudutsa. Koma kenako inatha mantha, ndipo itakumana nawonso ulendo wachitatu, inayamba kuyenda n’kumapita kumene kunali Mkangowo ndipo inaufunsa kuti mkazi ndi ana ake ali bwanji. Inafunsaso Mkangowo kuti, “Kodi tidzakumananso liti?” Kenako inatembenuka n’kumapita, kwinku ikuyendetsa mchira wake mwamwano.

Phunziro: *Ukazolowerana ndi munthu umasiya kumulemekeza.*

Mafunso

1. N’chifukwa chiyani Nkhandwe inachita mantha itakumana koyamba ndi Mkango?
2. Kodi Nkhandwe inkachitanso mantha itakumana ndi Mkango ulendo wachitatu? N’chifukwa chiyani sinkachita mantha? Kodi Mkango unali utasintha?
3. Kodi tikuphunzira chiyani m’nkhanayi?

Munthu Atsutsana ndi Mkango

Tsiku lina Munthu ndi Mkango anakambirana kuti wamphamvu ndi ndani pakati pawo. Munthuyo ankanena kuti anthu ndi amphamvu kwambiri kuposa mikango chifukwa ali ndi nzeru zambiri. Ndiyeno Munthuyo anauza Mkangowo kuti, “Tabwera kuno ndikuonetse chinthu chinachake kuti umvetse zoti anthu ali ndi mphamvu zoopsa.” Kenako anatengana ndi Mkangowo n’kupita nawo pamalo ena ndipo anauonetsa chipilala cha Samisoni akukhadzula kamwa la mkango ndi manja. Kenako Mkangowo unati, “Chabwino, koma zimene wandionetsazi si umboni woti anthu ndi amphamvu kuposa mikango. Si, anthu ndi amene anapanga chipilalachi?”

Phunziro: *Munthu akhoza kukhotetsa nkhani kuti igwirizane ndi maganizo ake.*

Mafunso

1. Kodi mukuganiza kuti n’chifukwa chiyani chipilala chinkasonyeza kuti Munthu ndi wamphamvu kuposa Mkango?
2. Kodi mukuganiza kuti Mkango ukanapanga chipilalacho, chikanakhala chosiyana ndi chimenechi? Nanga bwenzi chikuoneka bwanji?
3. Kodi tikuphunzira chiyani m’nkhaniyi?

Nyerere Yanzeru

Tsiku lina Chiwala chinkadumphadumphu, muluzi uli pakamwa ndipo chinkaoneka kuti sichikudandaula chilichonse. Kenako Nyerere inadutsa itanyamula thumba la chakudya ndipo inali ili thukuta kamukamu. Nyerereyi inkagwira ntchito yolemetsayi chifukwa inkafuna kuti isunge chakudya chambiri kuphanga lake kuti mvula ikadzayamba kugwa isadzavutike. Ndiye Chiwala chinafunsa nyerereyo kuti, “Bwanji osabwera kuti tidzacheze, ukudzizunzirani chotere ngati kapolo? Sunamvepo mwambi wakuti, papsa tonola sudziwa mtima wamoto? Ndani akudziwa ngati mawa titadzukenso?” Nyerereyo inayankha kuti, “Ndikusonkhanitsa chakudya choti ndidzadye mvula ikadzayamba. Nawensotu ungachite bwino kuchitiratu zimenezi nthawi ikadalipo.” Ndiyeno Chiwalacho chinayankha mwamwano kuti, “Ndivutikirenji kusunga chakudya choti ndidzadye mvula ikadzayamba, pomwe panopa chakudya chilipo kutapa kutaya.” Itamva zimenezi, Nyerereyo sidayankhe, inangopitirizabe kututira chakudya kuphanga lake. Pamene mvula inkayamba Chiwala chinalibe kalikonse ndipo pakhomo pake panali galu wakuda. Chiwalacho chinkasirira chikaona Nyerere ikugawana chakudya ndi ana ake ndipo chinati, “Ukakhala ndi zambiri, ndi bwino kumasunga zina zoti udzagwiritse ntchito zikadzakuvuta.”

Phunziro: *Ukakhala ndi zochulukira kumasungako zina kuti udzagwiritse ntchito ukadzakumana ndi mavuto.*

Mafunso

1. N’chifukwa chiyani Nyerere inauza Chiwala kuti chisunge chakudya choti idzagwiritse ntchito m’nthawi yamvula?
2. Kodi tikuphunzira chiyani m’nkhanisiyi?

Mtengo ndi Bango

Tsiku lina Mtengo unauza Bango lomwe linamera pafupi ndi phazi lake kuti, “Mwana iwe, n’chifukwa chiyani suzika kwambiri mizu yako n’kuimika mutu wako m’mwamba ngati mmene ndimachitira ine.” Bangolo linayankha kuti, “Ayi, ndimakhutira ndi mmene ndilili komanso zomwe ndimakwanitsa kuchita. Mwina ndimaoneka wofooka, koma ndimaona kuti ndimatetezeka mwa njira imeneyi.” Mtengo utamva zimenezi, nkhope yake inachita tsinya ndipo unati, “Umatetezeka? Iweyotu ndi woonda kwambiri moti umangokhala ngati uli ndi matenda, kathupi kako kamangoti lobodolobodo. Mphepo ikamawomba umangoti tepatepa. Komansotu ndiwe wosavuta kuzula. Koma taona ifeyo, amunamuna ogona kukhomo kosatseka. Ndani angalimbe mtima kuti andizule ndi mitsitsi yomwe? Komanso ndi ndani amene angalimbe mtima kuweramitsa mutu wanga pansi?” Mawu amenewa ali mkamwa, kunabwera chimphepo champhamvu ndipo mphepoyo inazula Mtengo uja ndi mitsitsi yomwe moti Mtengowo unangoti lambaa, mutu utaloza pansi. Koma Bango lija linangopindikira kumene kumalowera mphepo ndipo mphepoyo itadutsa, linadzukanso n’kukhala tsonga. Kenako linafunsa Mtengo uja kuti, “Waona, tsopano wamphamvu ndi ndani?”

Phunziro: *Kusadziwika kumapangitsa kuti munthu ukhale wotetezeka.*

Mafunso

1. N’chiyani chimene Mtengo unauza Bango?
2. N’chifukwa chiyani Bango linkaona kuti ndi lotetezeka?
3. Kodi tikuphunzira chiyani m’nkhaniyi?

Nkhandwe Yatulo

Tsiku lina Nkhandwe inkacheza ndi Mphaka ndipo inayamba kudzitama n’kumanena kuti imadziwa kuzemba komanso kuthawa adani ake. Inati: “Sungakhulupirire, mwina ndingonena kuti ndili ndi kathumba kosatsegula ka njira zosiyanasiyana zomwe ndikhoza kugwiritsa ntchito pothawa adani anga. M’thumba limenelo muli njira zoposa 100 zomwe ndikhoza kusankha imene ndikufuna kugwiritsa ntchito.” Koma Mphaka anati, “Ineyo ndili ndi njira imodzi basi, komabe imandipulumutsa adani anga akamandithamangitsa.” Nthawi yomweyo panayamba kumveka phokoso la agalu ndipo linkamveka kuti likubwera kumene kunali Nkhandwe ndi Mphaka kuja. Mphaka atamva phokosolo, nthawi yomweyo anathawira mumtengo n’kukabisala, ndipo anauza Nkhandweyo kuti, “Ndimagwiritsa ntchito njira imeneyi. Nanga iweyo ugwiritsa ntchito njira iti?” Kenako Nkhandweyo inayamba kuganizira za njira yoyamba n’kuona kuti sikugwira. Inaganizira za njira ina n’kuonanso kuti sikugwira. Inapitirizabe kuganizira njira zina ndipo panthawiyi agalu aja anali akuyandikira. Kenako Nkhandweyo inasokonezeka ndipo agaluwo anaigwira moti mwini agaluwo anaipha. Pamene zimenezi zinkachitika, mphaka uja ankangoonerera ndipo anati, “Bola kukhala ndi njira imodzi yothandiza, kusiyana ndi kukhala ndi njira zambirimbi zomwe ukungoganiza kuti zikhoza kukuthandiza.”

Phunziro: Ndi bwino kukhala ndi chinthu chimodzi chothandiza, kusiyana ndi kukhala ndi zambiri zomwe sizingakuthandize.

Mafunso

1. Kodi Nkhandwe inauza Mphaka chiyani?
2. N’chifukwa chiyani Nkhandwe inalephera kuthawa agalu?

3. Kodi tikuphunzirapo chiyani m'nkhaniiyi?

Nkhandwe Ivala Chikopa cha Nkhosa

Nthawi ina Nkhandwe inkakhaula ndi njala chifukwa zinali zovuta kuba nkhusa. M'busa wa nkhusazo anali watcheru kwambiri komanso anali ndi galu woopsa yemwe sankanyengerera akaona nyama ina ikuyandikira nkhusa. Koma tsiku lina, Nkhandweyi inatola chikopa cha nkhusa chomwe chinatayidwa, ndipo inavala chikopacho n'kulowa m'gulu la nkhusa zija. Choncho mkazi wa nkhusa yomwe inaphedwayo, anayamba kuchita chidwi ndi nkhandweyo n'kumaganiza kuti ndi mwamuna wake. Ndiye nkhandweyo inayamba kulowera kwina, kuchoka pa gulu la nkhusalo ndipo nkhusa yaikaziyo inkangotsatira. Kenako Nkhandweyo inagwira nkhusayo n'kuidya. M'kupita kwa nthawi Nkhandweyo inazolowera kuba nkhusa mwa njira imeneyi moti inadya nkhusa zambiri m'busa komanso galu uja osadziwa.

Phunziro: *Maonekedwe amapusitsa.*

Mafunso

1. Kodi Nkhandwe inapusitsa bwanji nkhusa?
2. N'chiyani chinachititsa kuti nkhusa yaikazi ija iganize kuti Nkhandweyo ndi mwamuna wake?
3. Mungapereke zitsanzo cha zinthu zina zomwe zimaoneka ngati ndi zabwino koma zili zoopsa?
4. Kodi tikuphunzira chiyani m'nkhaniiyi?

Galu Apezeka Modyera Ng’ombe

Tsiku lina Galu anatopa kwambiri ndipo ankafuna atabako tulo. Ndiye anakalowa m’khola la Ng’ombe n’kudziponya pamene panali zakudya za ng’ombezo. Pasanapite nthawi, Galuyo anayamba kuliza nkonono. Koma pa nthawiyi m’pamene Ng’ombe inatulukira ili ndi njala zedi ndipo sinachedwensu, koma kupita pamene panali zakudya zake. Ng’ombeyo inadzutsa Galu uja n’kumusokonezera maloto ake okoma. Galuyo anapsa mtima ndi zimenezi ndipo anayamba kuuwa. Ng’ombeyo imati ikati iyandikire zakudya zakezo, Galuyo ankauwa kwambiri ndipo ankafuna kuiluma. Kenako Ng’ombeyo inangomusiya ndipo inanyamuka n’kumapita kwinaku ikung’ung’udza kuti, “Aa, anthu ena amakonda kulusira anzawo pa zinthu zomwe sizingawathandize n’komwe.”

Phunziro: Anthu ena amayambana ndi anzawo pofuna kuteteza zinthu zomwe sangazigwiritse ntchito komanso sizingawathandize.

Mafunso

1. Kodi Galu ankagwiritse ntchito bwanji zakudya za Ng’ombe zija?
2. N’chifukwa chiyani Ng’ombe inapita pamene Galu uja anagona?
3. Kodi tikuphunzira chiyani m’nkhaniyi?

Fano Lathabwa

Kalekalelo, anthu ena ankambira miyala komanso mafano. Ankapempha milungu yawoyi kuti iwadalitse komanso iwathandize kupeza zimene akufuna pamoyo wawo. Koma panali munthu wina yemwe anali kwakwatuke wotheratu. Munthuyu ankapempha mulungu wake wathabwa kuti amuthandize, koma palibe chimene chinkachitika. Bambo ake ndi amene anamupatsa fanolo ngati cholowa. Munthuyu samatopa kupempha mulungu wakeyo kuti amupatse mwayi. Anachita zimenezi kambirimbiri, koma zinkangokhala ngati akulimbana ndi mtunda wopanda madzi. Tsiku lina, munthuyo anapsa mtima ndi mulungu wakeyo ndipo anamumenya mwamphamvu ndi chibakera ndipo mulunguyo anagwa panso n'kusweka. Mkati mwa mulunguyo munatuluka ndalama zambirimbiri ndipo zinangoti bwee m'nyumbamo. Munthuyo anangogwira pakamwa chifukwa chosowa chonena, ndipo anazindikira kuti bambo ake ndi amene anaika ndalamazo mkati mwa fanolo.

Phunziro: Kulambira mafano kapena zinthu zina n'kosathandiza chifukwa zilibe moyo. Sizingakuuze ngakhale zitakhala kuti munthu wina wabisa chuma mkati mwake.

Mafunso

1. Kodi munthuyo ankafuna kuti mulungu wakeyo amuchitire chiyani?
2. N'chifukwa chiyani munthuyo anapsa mtima?
3. Kodi tinganene kuti mulungu wakeyo anamuthandizadi?
4. Kodi tikuphunzira chiyani m'nkhanayi?

Msodzi

Tsiku lina Msodzi anatenga chitoliro chake komanso ukonde wake n’kupita kumtsinje kuti akagwire nsomba. Atafika kumeneko, anapemphera kuti nsomba zibwere pamene anaika ukonde wakewo, koma palibe inabwera kapena kuonetsa mphuno yake pamwamba pa madzi. Kenako msodziyo anakokera ukonde wakeyo chakumtunda ndipo anapempheranso. Msodziyo anangoona kuti mu ukondewo nsomba zayamba kuyenda pamwamba pa madzi komanso zina zikuphiriphitha, ndipo anati, “Aa, mwayamba kuvina ine ndikupemphera?” Ndiye nsomba yokalamba pa zonsezo inati, “Ukagwidwa ndi munthu wamphamvu, umafunika kumachita zimene akufuna.”

Phunziro: *Osamachita masewera ndi anthu amphamvu.*

Mafunso

1. Msodziyo atagwira nsomba zija ndi ukonde wake, n’chifukwa chiyani nsomba zinayamba kuchita zimene msodziyo ankafuna? N’chifukwa chiyani mukutero?
2. Kodi nsombazo zinkafunadi kuvina?
3. Kodi tikuphunzira chiyani m’nkhaniyi?

Mnyamata Wabodza

Kalekalelo kunali mnyamata wina yemwe ankaweta nkhusa yekhayekha pafupi ndi nkhalango ina yowirira. Mnyamatayu ankasowa wocheza naye ndipo ankangokhala yekhayekha tsiku lonse. Ndiye tsiku lina anapeza nzeru yomuthandiza kuti azisangalalako komanso kuti anthu azibwera n'kukhala naye pafupi. Anathamanga kumalowera kumene kunali mudzi wakwawo kwinku akukuwa kuti, “Kuli mikango, kuli mikango kuno!” Ndiye anthu a m'mudzimo anathamanga kudzakumana naye ndipo ena a iwo anaima limodzi naye kwa kanthawi n'kumamuyankhulitsa, moti panthawiyi sankasungulumwanso. Zimenezi zinamusangalatsa kwambiri, moti patapita masiku angapo, anachitanso chimodzimodzi. Ulendo umenewunso anthu a m'mudzi uja anabwera ndipo anakhala naye limodzi kwa nthawi yaitali ndipo mnyamatayo anasangalalanso kwabasi. Kenako anadzachitanso chimodzimodzi ndipo anthu a m'mudzi uja anatopa naye ndipo anam'tulukira kuti akungowapusitsa. Koma tsiku lina mikango inatulukadi m'nkhalango ija ndipo inayamba kugwira nkhusa zake. Mnyamatayo anayambanso kukuwa kuti, “Kuli mikango, kuli mikango kuno!” Anakuwa kwambiri kuposa poyamba, koma palibe anabwera. Anthuwo ankaganiza kuti mnyamatayo akungowanamiza ngati mmene anachitira maulendo ena aja. Mikangoyo inadya nkhusa zambiri ndithu, ndipo itakhuta inabwerera m'nkhalango muja. Mnyamatayo anabwerera kumudzi kuja kwinku akulira ndipo atafotokoza zimene zinachitika. Ndiyeno munthu wina wachikulire anamuza kuti, “Anthu sakhulupirira munthu wabodza, ngakhale atakhala kuti akunena zooni.”

Phunziro: *Ukamanama anthu amakuzolowera, moti tsiku lina ukamadzanena zoon, samakukhulupiranso.*

Mafunso

1. N’chifukwa chiyani mnyamatayu ananena bodza?
2. Kodi ndi mavuto ena ati amene akanabwera chifukwa cha bodza la mnyamatayu? Kodi tinganene kuti moyo wake unali pangozi?
3. N’chifukwa chiyani anthu a m’ mudzi uja sanakhulupirire ulendo womaliza womwe mnyamatayu ananena kuti kukubwera mikango?
4. Kodi tikuphunzira chiyani m’nkhanayi?

Mpikisano wa Pakati pa Dzuwa ndi Mphepo

Tsiku lina Mphepo komanso Dzuwa zinkatsutsana kuti wamphamvu ndi ndani pakati pawo. Mphepo inauza mnzakeyo kuti, “Inetu ndi wamphamvu zedi, ndimatha kuyalula denga la nyumba, kuzula mitengo komanso kugwetsa zinthu zikuluzikulu. Nditati ndifotokoze zonse zimene ndimachita, iweyo ukhoza kukalowa n’kutuluka, kenako n’kukalowananso.” Pa nthawiyi Dzuwa linkangomvetsera zimene mnzakeyo ankanena. Kenako anaona munthu akudutsa chapafupi, atavala chipewa. Ndiye Dzuwa linati, “Eya, ndadziwa chochita tsopano. Kutu tidziwedi amene ali wamphamvu, tiye tipikisane. Tione amene angapangitse kuti munthuyo achotse chipewa chimene wavalacho.” Nthawi yomweyo mphepo inasangalala ndipo inati, “Taulutsa zinthuzinthu ife, ndiye pali chiyani apa?” Kenako anagwirizana kuti iyambe Mphepo kuulutsa chipewacho. Koma Mphepo imati ikafuna kuulutsa chipewacho,

munthuyo ankangochigwira n’kuchikhazikanso bwinobwino. Munthuyo ataona kuti Mphepo ikumuvutitsa, anangomanga chipewacho kuchibwano chake ndi chigwe. Mphepo inayesa kuulutsa chipewacho koma inakanika ndipo inatopa kwambiri n’kukhala pansu kuti ipume. Kenako dzuwa linalowa m’bwalo. Ndiye linaomba, n’kuomba ndipo kunja kunatentha zedi. Zitatero munthu uja anamva kutentha kwambiri ndipo anamasura chingwe chija n’kuvula chipewa, ndipo kenako anakaima pamthunzi kuti mutu wake upitidwe mphepo.

Phunziro: *Osamadzitama, mwamuna mnzako ndi pachulu.*

Mafunso

1. N’chifukwa chiyani Mphepo inkaderera mphamvu za Dzuwa?
2. Kodi tinganene kuti n’kulakwa kumadzitama?
3. Kodi pamapeto pake ndi ndani amene anapambana?
4. N’chifukwa chiyani Mphepo inalephera kuulutsa chipewa cha munthu uja?
5. Kodi mukuganiza kuti Dzuwa likuimira chiyani?
6. Nanga tikuphunzira chiyani m’nkhaniyi?

Mnyamata wa Zala Zazitali

Mnyamata wina anagwidwa ataba ndalama zambiri ndipo pofuna kuti ena atengerepo phunziro, mfumu ya m’deralo inalamula kuti aphedwe. Tsiku loti aphedwe litafika, mnyamatayo anapempha anthu omwe ankafuna kumupachikawo kuti amulole kuchita chinthu chimodzi asanaphedwe. Anapempha kuti akufuna auze mayi ake zinazake. Anthuwo anavomera, ndipo mnyamatayo anapita pafupi ndi mayi akewo n’kuwauza kuti, “Ndikufuna

ndikunong’onezeni.” Mayiyo anaperekeradi khutu lake kuti mwana wakeyo amunong’oneze, koma mwanayo analuma khutulo ndipo linangotsala pang’ono kudukiratu. Anthu onse omwe anabwera kudzaonerera kuphedwa kwa mwanayo anadabwa ndi zimenezi ndipo ena ankati mchitidwe umenewu unali wankhanza zedi. Enanso ankanena kuti munthu wabwinobwino sangachite zomwe mnyamatayo anachita. Koma mnyamatayo anati: “Ndachita zimenezi kuti ndiwakhaulitse. Kungoyambira ndili mwana ndinkaba zinthu, koma ndikapita kunyumba, mayiwa ankalandira n’kusunga. M’malo moti andilangize kapena kundipatsa chilango, ankaseka n’kunena kuti ‘palibe atadziwe zimenezi.’ Lero ndiphedwa chifukwa cha iwowa.” Atamva zimenezi, munthu wina wokonda kupemphera yemwe anali pamalopo anauza mayiyo kuti, “Mwanayu akunena zoon. Wafika pamenepa chifukwa inuyo munamulekerera. Pajatu amati, ‘Langiza mwana poyamba m’njira yake, ndipo ngakhale akadzakula sadzachokamo.”

Phunziro: *Kumalangiza komanso kuphunzitsa ana adakali aang’ono.*

Mafunso

1. Kodi mayiwa akanathandiza bwanji mwanayu ali wamng’ono?
2. Kodi mukuganiza kuti chinkapangitsa mayiyu kusapatsa mwana wakeyu chilango chinali chiyani?
3. Kodi tikuphunzira chiyani m’nkhanisi?

Bambo Yemwe Anakwatira Mitala

Kalekalelo, amuna akuloledwa kukwatira akazi ambiri, bambo wina anakwatira akazi awiri. Wina anali wamkulu kwambiri kuposa msinkhu wake, ndipo winayo anali mtsikana. Akazi onsewa ankamukonda kwambiri ndipo aliyense ankafuna kuti mwamunayo azioneka mofanana naye. Wamkulu ankafuna kuti mwamunayo azioneka wachikulire, pomwe wamng'ono ankafuna azioneka wachinyamata. Ndiye n'kupita kwa nthawi, mwamuna uja anayamba kukalamba ndipo tsitsi lake linayamba kuyera. Mkazi wachitsikana uja anayamba kudana ndi tsitsi la imvilo chifukwa linkapangitsa kuti azioneka ngati anakwatiwa ndi mwamuna wamkulu kwambiri, ndipo ankaona kuti anthu azisokoneza n'kumaganiza kuti ndi bambo ake. Choncho tsiku lililonse mwamunayo akamagona, mkaziyo ankapesa tsitsi la mwamunayo n'kuthothola tsitsi lonse loyera. Koma mkazi wamkulu uja ankasangalala akaona kuti mwamuna wake wayamba kuchita imvi ndipo ankaona kuti zimenezi zithandiza anthu kuti asamaganize zoti mwamuna wakeyo ndi mwana wake. Choncho m'mawa ulionse mwamunayo asanadzuke, mkazi wamkuluyo ankathothola tsitsi lakuda lomwe linali m'mutu mwa mwamuna wakeyo. Pamapeto pake, tsitsi lonse la mwamunayo linatha ndipo anasanduka wadazi.

Phunziro: *Ukamangomvera aliyense, umasanduka chitsiru.*

Mafunso

1. N'chifukwa chiyani mkazi wamkulu ankasangalala mwamuna wake atayamba imvi?
2. Nanga n'chifukwa chiyani mkazi wamng'ono ankadana nazo?
3. Kodi bamboyu anakumana ndi mavuto otani?

4. Kodi n'zotheka kukhala wokalamba komanso wachinyamata nthawi imodzi?
5. Kodi tikuphunzira chiyani m'nkhaniyi?

Mayi ndi Nkhandwe

“Ndati utonthole!” Mawu amenewa anayankhula ndi Mayi wina ataima pazenera lotsegula. M’manja mwake munali mwana yemwe ankalira mosatonthozeka. Kenako mwanayo anatonthola ndipo Mayiyo anachenjeza mwanayo kuti, “Ukayambiranso kulira, ndikuponyera pazenerapa kuti nkhandwe ikudye.” Ndiye zinangochitika kuti panthawi imene ankanena zimenezi, Nkhandwe inali ikudutsa chapafupi ndipo inamva zomwe mayiyo ananena. Nkhandweyo inaima pafupi ndi nyumbayo ndipo inayamba kudikira kuti mwanayo alirensa. Inati, “Lerotu ndiye ndachita mwayi. Ndikuganiza kuti alira posachedwapa, ana amakoma kwabasi moti nditsukako mkamwa lero.” Nkhandweyo inadikira kwa nthawi yaitali, koma mwanayo sanalire. Kenako mwana uja anayambiranso kulira ndipo Nkhandweyo inaima pafupi ndi zenera lija kwinku ikugwedezera mchira n’kumadikira kuti mayiyo aponye mwanayo pawindopo. Koma mayiyo anangotseka zeneraro n’kuyamba kumuyamwitsa. Posakhalitsa agalu a pakhomopo anatulukira n’kupeza nkhandweyo ili pafupi ndi zeneraro ndipo Nkhandweyo inayamba kuthawa kwinku ikunena kuti, “Anthu osathandiza, n’chifukwa chiyani nthawi zonse amapereka malonjezo akudziwa kuti sawakwaniritsa?”

Phunziro: Anthu ambiri amalonjeza n’kulephera kukwaniritsa malonjezowo.

Mafunso

1. Kodi Mayiyu ankafunadi kutaya mwanayo pazenera?
2. N’chifukwa chiyani Nkhandwe inakhulupirira zimene Mayiyo ananena?
3. N’chifukwa chiyani tinganene kuti sikuti panali ubwenzi uliwonse pakati pa Mayiyo ndi Nkhandwe?
4. Kodi tikuphunzira chiyani m’nkhanayi?

Msamuko wa Kamba

Tsiku lina Kamba, kapena kuti Fulu, anapeza malo atsopano ndipo inkafuna kusamukira kumalowo. Ndiye anapempha mbalame ina yotchedwa Nkhwazi kuti imunyamule kukamusiya kumalowo ndipo analonjeza kuti aifumbatitsa kenakake. Nkhwaziyo inavomera ndipo inanyamula Kambayo itagwira chigoba chake n’kuuluka. Ili m’mwambamo, Nkhwaziyo inakumana ndi Mphamba. Mphambayo inauza Nkhwaziyo kuti, “Kambatu ndi ndiwo yokoma kwambiri.” Koma Nkhwaziyo inati, “Ukunena zoon, komatu chigoba chakechi n’cholimba ngati mwala.” Ndiyeno Mphambayo inati, “Utangomuponyera pamwala uwo, chigobacho chikhoza kusweka ndipo ife tikhoza kukhwasula vankati.” Nkhwaziyo inamvera zimenezi ndipo inasiya Kambayo kuti akagwere pamwalawo moti chigoba chake chinaphwanyika. Nkhwazi komanso Mphambayo zinasangalala kwambiri ndi nyama yokoma yomwe zinadya patsikuli, moti zinachotsa dalazi.

Phunziro: *Osapereka moyo wako m’manja mwa mdani.*

Mafunso

1. N'chiyani chimene Kamba analakwitsa?
2. Kodi mukuganiza kuti akanachita chiyani kuti akafike kunyumba yake yatsopano?
3. Kodi tikuphunzira chiyani m'nkhaniyi?

Nkhanu ndi Mwana Wake

Tsiku lina kunacha bwino kwambiri ndipo Nkhanu inatuluka m'nyumba limodzi ndi mwana wake n'kupita kukawongola miyendo m'mbali mwa mtsinje. Koma Nkhanuyo itaona mmene mwana wakeyo amayendera inati, “Mwana wanga, mayendedwe ako sandisangalatsa. N'chifukwa chiyani ukuyenda cham'mbali? Mpo funika kuti uphunzire kumayenda mopita kutsogolo. Inetu ndikufuna uziyenda bwinobwino ngati munthu woti kutsogolo ukukuona. Sindikufuna uzindichititsa manyazi ndi mayendedwe ako osalongosokawo.” Koma mwanayo anayankha kuti, “Chabwino amayi, koma muyambe ndi inuyo kuchita zimenezi, kuti ineyo ndizitengera chitsanzo chanu. Anthutu amadabwa akamva munthu akunena kuti akufuna kusintha dziko, chonsecho akulephera kudzisintha yekha!”

Phunziro: *Osamauza ena kuti achite zomwe iweyo suchita.*

Mafunso

1. Kodi mukuganiza kuti Nkhanu yaikuluyo inkayenda mopita kutsogolo?
2. N'chifukwa chiyani mwanayo sanagwirizane ndi zimene kholo lake linanena?

3. Kodi n'zotheka kuthandiza munthu wina kusintha, ifeyo tikulephera kudzisintha tokha?
4. Kodi tikuphunzirapo chiyani m'nkhaniyi?

Bulu Avala Chikopa cha Mkango

Bulu wina anatola chikopa cha mkango chomwe alenje anachiyanika pa dzuwa kuti chiume. Buluyo anavala chikopacho ndipo anayamba kuyendayenda m'mudzi wonse. Anthu komanso nyama zimati zikangomuona, zinkalikumba liwiro, kufuna kupulumutsa moyo. Buluyo ataona fumbi limene linabwera chifukwa cha liwiro la anthu komanso nyama, anasangalala kwambiri ndipo anayamba kukuwa. Nthawi yomweyo anthu komanso nyama zinamuzindikira ndipo mwini buluyo anabwera n'kuyamba kumukutumula. Kenako kunabwera Galu n'kuuza Buluyo kuti, "Ayi ndithu, mtima suvala nsanza. Nthawi zina ngakhale nkhuuza ikhoza kumalota itavala nsapato! Komabe unaita bwanawe, chifukwa unapusitsa ambiri. Koma ukudziwa, anakutulukiratu utangotsegula pakamwa."

Phunziro: Zovala zimapusitsa, koma zonena za munthu m'pamene umadziwa ngati ali wanzeru kapena ayi.

Mafunso

1. N'chifukwa chiyani Buluyo anasangalala pamene anthu komanso nyama zinkathawa?
2. N'chiyani chinachititsa kuti anthu amuzindikire?
3. Kodi tikuphunzira chiyani m'nkhaniyi?

Nkhani ya Mabwenzi a Pamtima

Anthu ena awiri, omwe anali paubwenzi wa ponda apa m'pondepo, anapita kukawongola miyendo kunkhalango ina ndipo mwadzidzidzi anakumana ndi chimbalangondo. Chimbalangondocho chinayamba kupita kumene kunali anthuwo ndipo anachita mantha kwambiri. Munthu m'modzi anali kutsogolo ndipo wina anali m'mbuyo. Munthu anali kutsogoloyo atangoona kuti chilombocho chikubwera, analumphira mumtengo n'kubisala ndipo anasiya mnzakeyo ali pansi pomwepo. Winayo sanalimbanenso n'kuthawa, koma anangodziponya pansi ndipo nkhope yake inalowa m'dothi. Chimbalangondocho chinafika pafupi ndi munthu anagwera pansiyoy ndipo chinatsitsa mphuno yake n'kuyamba kununkhiza mutu wa munthuyo. Mwamwayi chilombocho sichinamuchite kalikonse chifukwa chinkaganiza kuti wafa kale, paja zimbalangondo sizidya kapena kugwira chinthu chomwe chafa kale. Kenako chinanyamuka n'kumapita. Chitazimiririka, munthu anali mumtengo uja anatsika ndipo anafunsa mnzakeyo kuti, “Kodi bwanawe, chimbalangondo chija chimakunong'oneza chiyani?” Mnzakeyo anati, “Chinandiuza kuti ndisamakhulupirire mnzanga amene amandithawa zikavuta.”

Phunziro: *Osamakhulupirira munthu amene amakukonda zinthu zikakhala zikuyenda bwino, koma zikavuta amakuthawa.*

Mafunso

1. Kodi chimbalangondocho chinanong'onezadi munthu anali pansi uja?
2. Kodi munthu anali mumtengo uja akanachita chiyani akanakhala kuti amamukondadi mnzakeyo?
3. Kodi tikuphunzira chiyani?

Mapoto Awiri

Tsiku lina mapoto awiri anasiyidwa m'mbali mwa mtsinje. Poto m'modzi anali wachitsulo ndipo wina anali wadothi. Ndiyeno mtsinjewo unadzadza ndipo mapotowo anayamba kuyandama n'kumapita ndi madzi. Koma poto wadothiyo ankachita mantha ndipo ankayesetsa kusambira kuti asagundane ndi mnzakeyo. Poto wachitsuloyo anayamba kudabwa ndi zimenezi ndipo anakuwira mnzakeyo n'kumuuzza kuti, "Usaope bwanawe, sikuti ndikugundayi!" Koma poto wadothiyo anati, "Ndikuopa kuti ndikhoza kugundana nawe. Inetu ndinapangidwa ndi dothi, moti utati undigunde kapena ineyo nditati ndikugunde, ndingavutikebe ndi ineyo."

Phunziro: *Anthu amphamvu ndi ofooka sangayendere limodzi.*

Mafunso

1. N'chifukwa chiyani tinganene kuti poto wadothi akanaphwanyika mosavuta akanagundana ndi mnzakeyo?
2. Perekani zitsanzo za zinthu zamphamvu ndi zofooka zomwe sizingakhalire pamodzi?
3. Kodi tikuphunzirapo chiyani m'nkhaniyi?

Ng’ombe Zinayi ndi Mkango

Mkango wina unkazembekerera ng’ombe zinayi zomwe zinkadya malo ena. Mkangowo unayesa maulendo angapo kuti ugwire ng’ombezo koma unalephera. Unkati ukafuna kuti uukire ng’ombe imodzi, ng’ombezo zinkalozetsana mbuyo ndipo zinkapezeka kuti mkangowo wakumana ndi nyanga za ng’ombezo. Zikaterere mkangowo unkachita mantha n’kubwerera. Koma kenako ng’ombezo zinayambana ndipo iliyonse inalowera kwake. Zimenezi zinachititsa kuti mkango uja upezerepo mwayi, moti unayamba kugwira ng’ombe imodziimodzi mpaka zonse zinatha psiti.

Phunziro: *Umodzi ndi mphamvu.*

Mafunso

1. N’chiyani chinachititsa kuti mkango usagwire ng’ombe pamene zinkachitira zinthu limodzi?
2. Kodi ng’ombezo zikanatani kuti zisaphedwe ndi mkango?
3. Kodi anthu akagawikana, amakhala amphamvu kapena ayi?
4. Kodi tikuphunzira chiyani m’nkhaniyi?

Mneneri Wabodza

Kalekalelo kunali mneneri wina yemwe ankalosera zam'tsogolo. Ndiye m'nyengo ina ya mvula, mneneriyu anaona nyenyezi yachilendo ndipo anayamba kuuza anthu kuti, "Zaka 100 zikubwera kutsogoloku kudzachitika tsoka loopsa, anthu ambiri adzamwalira ndipo mudzi wonsewu udzatheratu." Mneneriyo ankanena zimenezi akuyang'ana nyenyeziyo ndipo anaiwaliratu zoyang'ana pamene ankaponda. Ndiye mwatsoka pansu panali mwala ndiye anapunthwa n'kugwa, moti nkhope yake inalowa m'matope. Anthu ataona zimenezi anayamba kumuseka ndipo anamufunsa kuti, "Inuyo mumakwanitsa bwanji kumalosera zinthu zomwe zidzachitike zaka 100 kutsogoloku, n'kulephera kudziwa zimene zangotsala pang'ono kuchitikira phazi lanu? Limene mukutiuzalitu ndi bodza lofuka utsi."

Phunziro: Kumayamba kaye wachotsa chitsotso cha m'diso lako kenako cha mnzako.

Mafunso

1. N'chifukwa chiyani anthu aja anayamba kuseka mneneriyu?
2. Kodi mukuganiza kuti ankakhulupirira kuti zimene ananenazo zidzachitikadi? Perekani chifukwa.
3. Kodi tikuphunzira chiyani m'nkhanayi?

Msodzi Agwira Nsomba Yaing’ono

Tsiku lina msodzi wina anapita kogwira nsomba koma sanagwire kathu tsiku lonse. Koma chakumadzulo anagwira kansomba kakang’ono. Kansombako kanayamba kupempha msodziyo kuti, “Ndikhululukireni bwana, ndisiyeni ndizipita. Ineyo ndidakali mwana, ndachepa kwambiri kuti ndidyedwe. Mukandibwezeretsa m’madzimu ndikula, ndipo mukhoza kudzandigwira nditanenepa m’tsogolo. Pa nthawiyo mukhoza kudzandidya ndili wonona kwambiri.” Koma msodziyo anati, “Ayi, ayi, sindilola. Ndagwira iweyo lero. Ndani akudziwa ngati ndingadzakugwiredi m’tsogolomo?”

Phunziro: *Osamawerengera zinthu zomwe sunapeze.*

Mafunso

1. Kodi mukuganiza kuti nsomba yaing’onoyo ikanalola kuti idzagwidwenso ndi msodziyu ulendo wina?
2. N’chifukwa chiyani nsombayo inauza msodziyo kuti amusiye? Kodi inkanena zoonaa?
3. Kodi tikuphunzirapo chiyani m’nkhaniyi?

Munthu Wadyera Komanso Wansanje

Anthu awiri omwe ankakhala moyandikana nyumba anapita kwa mulungu ndipo anapempha mulunguyo kuti awapatse zimene akufuna. Mmodzi wa anthuwo anali wadyera pomwe winayo anali wansanje. Pofuna kuwakhaulitsa anthuwa, mulunguyo anawauza kuti awapatsa zimene akufuna. Anawauzanso kuti aziwapatsa zimene akufuna koma anati azipereka kuwirikiza kawiri zimene m'modzi wapempha. Ndiyeno munthu wadyera uja anapempha kuti amupatse golide wodzaza nyumba yake. Pasanapite nthawi anapezadi golideyo ndipo anasangalala kwambiri. Koma chisangalalochi sichinakhalitse atazindikira kuti mnzake wansanje uja wapeza golide wozadza nyumba ziwiri. Munthu wansanje uja anamvako bwino atazindikira kuti mnzake sakusangalala. Koma ankafuna kuti mnzakeyo akhaule kwambiri, moti anapempha mulungu kuti amuchotse mnzakeyo diso limodzi. Zitatero, mulungu anamuchotsadi mnzakeyo diso limodzi, koma zimenezi zinachititsa kuti iyeyo achotsedwe maso ake onse awiri, moti anakhala wosaona.

Phunziro: *Makhalidwe oipa amabweretsa mavuto.*

Mafunso

1. Kodi ndi ndani amene anapezadi zimene ankafuna?
2. N'chifukwa chiyani anthuwa sankakhutitsidwa ndi golide amene anali naye?
3. Kodi mungatchule makhalidwe ena oipa amene amabweretsa mavuto?
4. Kodi tikuphunzira chiyani m'nkhaniyi?

Khwangwala Waludzu

Tsiku lina khwangwala ankafuna kufa ndi ludzu. Koma mwamwayi anapeza mtsuko wamadzi. Koma atafika pafupi ndi mtsukowo anapeza kuti madzi ake anali ochepa ndipo anali pansu penipeni pa mtsukowo moti sankakwanitsa kuwamwa. Khwangwalayo anayetsa kuti amwe madziwo koma analephera moti kenako anangowasiya n’kutsamira mtsukowo. Koma kenako nzeru zinamubwerera moti anatola mwala n’kuponyera mumtsukomo. Anatolanso mwala wina n’kuponya mumtsukomo ndipo madzi aja anayamba kukwera. Anapitirizabe kuchita zimenezi mpaka madziwo anakwera kwambiri ndipo anamwa n’kupha ludzu lake.

Phunziro: *Nyumba imayamba kumangidwa ndi njerwa imodzi.*

Mafunso

1. Kodi chikanachitika n’chiyani zikanakhala kuti Khwangwalayo anangokhala osachita chilichonse?
2. Kodi n’chifukwa chiyani nthawi zina sibwino kutaya mtima mwansanga?
3. Kodi tikuphunzira chiyani m’nkhanayi?

Munthu Wam’nkhalango

M’nyengo ina yozizira kwambiri munthu wina ankayenda usiku m’nkhalango ndipo anasokonekera n’kumalephera kupeza njira yakwawo. Ndiye pamene ankayendayenda m’nkhalangomo anakumana ndi munthu wina yemwe ankaoneka kuti ankakhala m’nkhalango momwemo. Munthuyo analonjeza kuti amupatsa malo ogona usikuwo komanso kuti kukacha amuthandiza kupeza njira

yakwawo. Kenako munthuyo anamutenga n’kumapita naye kwawo koma munthu anasokonekera uja anaika manja ake pakamwa n’kumapemerera ndi mpweya wamkamwa mwake. Ndiyeno munthu wam’nkhalango uja anafunsa kuti, “N’chifukwa chiyani mukupanga zimenezo?” Munthuyo anayankha kuti, “Manja anga azizidwa ndiye ndikufuna ndiwatenthethese ndi mpweya wochoka mkamwa mwanga.” Kenako anafika kunyumba kwa munthu wam’nkhalango uja ndipo pasanapite nthawi anabweretsa phala lotentha kwambiri kuti mnzake uja adye. Ndiye munthu uja anayamba kudya phalalo ndipo asanaliike mkamwa, ankalipemerera kaye. Ataona zimenezi, munthu wam’nkhalango uja anafunsa kuti, “Nanga mukuchita zimenezo chifukwa chiyani?” Munthuyo anayankha kuti, “Phalali ndi lotentha kwambiri ndiye ndikuopa kuti lindiwaula mkamwa. Choncho ndikumalipemerera ndi mpweya wa mkamwa mwanga kuti lizizire.” Atangomva zimenezi, munthu wam’nkhalango uja anati, “Basi tulukani m’nyumba mwanga muno. Munthu wamtundu wanji wotuluka mpweya wotentha komanso wozizira mkamwa mwake.”

Phunziro: *Mupeze nokha.*

Mafunso

1. Kodi mpweya wa munthuyu unali wotentha kapena wozizira?
2. Kodi kuchita zinthu zimene tinazolowera n’kulakwa?
3. Kodi tikuphunzira chiyani m’nkhanayi?

Mazira Agolide

Tsiku lina munthu anapita pachisa cha tsekwe ndipo anapeza dzira looneka lachikasu komanso lowala. Atalitola anaona kuti dziralo linkalemera kwambiri moti anaganiza zolitaya poganiza kuti munthu wina anaikapo mwala kuti amupusitse. Koma kenako anasinthamaganizo ndipo anapita nalo kunyumba kwake. Atafika kunyumbako anazindikira kuti dziralo linali lagolide. Kenako anayamba kumapita kuchisa cha tsekwe chija m'mawa ulionse, ndipo ankatola dzira limodzi lagolide. Ankati akatola dzira limodzi, ankaligulitsa moti n'kupita kwa nthawi anakhala mponda makwacha. Munthuyo atayamba kulemera, anayamba dyera moti anaganiza zopeza mazira onse a tsekweyo nthawi imodzi. Choncho, anapha tsekwe uja n'kumung'amba pamimba ndipo mkati mwake sanapezemo kanthu.

Phunziro: *Dyera limatayitsa zambiri.*

Mafunso

1. Kodi munthu wadyerayu ankaganiza kuti apeza chiyani mkati mwa tsekwe uja?
2. Kodi anapezadi mazira agolide ambiri atapha tsekweyo?
3. Kodi tikuphunzira chiyani m'nkhaniyi?

Mbalame Yoimba Mokoma

Kafansiyanji wina ankasowa tulo usiku ndipo ankangomvetsera mbalame ina ikuimba usiku wonse. Kaimbidwe ka mbalameyo kanamudolola kwambiri moti usiku wotsatira anagwira mbalameyo kuti izimuimbira nthawi zonse. Kenako anaiuza mbalameyo kuti,

“Ndiye popeza ndakugwira, uzindiimbira nyimbo nthawi iliyonse imene ndikufuna.” Koma mbalameyo inati, “Mbalame za mtundu wathuwutu sizitha kuimba nyimbo ngati zikukakamizidwa komanso ngati zitatsekeredwa m’kanyumba.” Ndiye kenako munthu uja anati, “Ndiye ndikudyatu! Ndinamva zoti mbalame ngati iweyo mumakoma kwambiri mukakazingidwa m’mafuta.” Mbalameyo itangomva zimenezi inati, “Ayi, musandiphe. Ingondisiyani ndipo ndikuuzani zinthu zitatu zomwe zingakuthandizeni kwambiri kuposa kudya kathupi kanga kakang’onoka.” Ndiyeno munthu uja anaimasula n’kuisiya ndipo mbalameyo inaulukira panthambi yamtengo wina n’kunena kuti, “Musadzayerekezenso kumvera lonjezo limene munthu wogwidwa angadzakuuzeni, chimenechi ndi chinthu choyamba. Chachiwiri, osamataya kapena kusiya chinthu chokhacho chimene muli nacho ndipo chachitatu, osamakhalira kudandaula chinthu chimene ngakhale mutatani simungachipezenso.” Mbalameyo itangomaliza kunena zimenezi inauluka.

Phunziro: Osalilira chinthu chimene palibe chomwe ungachite kuti uchipezenso. Osamada nkhawa ndi zinthu zimene sungazisithe chifukwa ungangotaya nthawi yako.

Mafunso

1. Kodi ndi malangizo ati amene mbalame inapereka kwa munthu uja?
2. N’chifukwa chiyani munthuyo analakwitsa kumvera zimene mbalameyo inamuuzaza?
3. Kodi tikuphunzira chiyani m’nkhanayi?

Nkhandwe, Nkhuku Komanso Galu

Usiku wina nkhandwe inkazemberera nkhuku ndipo nkhekukuyo itazindikira zimenezi, inauluka n'kukwera mumtengo moti nkhandweyo inkalephera kuigwira. Kenako nkhandweyo inati, "Musaope a nkhekuku, ndabweratu kuti ndikuuzeni uthenga wabwino. Mfumu mkango yalamula kuti pasapezekenso nyama yodya inzake kuyambira lero. Inati nyama zonse ziyenera kumakhala limodzi mogwirizana, komanso mwamtendere." Ndiyeno nkhekukuyo inati, "Uthenga wake ndi umenewo eti. Chabwino ndamva. Koma pali wina amene mwina mungakondenso mutamuuza uthenga umenewu. Mwina nayenso angasangalale ataumva." Nkhukuyo inayamba kuyang'ana kunyumba komwe inkakhala. Ndiyeno nkhandwe ija inafunsa kuti, "Kodi kukubwera chiyani?" Nkhukuyo inayankha kuti, "Kukubwera galu wambuyanga." Nkhandweyo itangomva zoti kukubwera galu, inatembenuka n'kuyamba kuthawa. Ndiyeno nkhekukuyo inauza nkhandweyo kuti, "Kodi mungamuuzenso galuyo uthenga mwabweretsa uja?" Koma nkhandwe ija inati, "Ndikanakonda ndikanatero, koma ndikuopa kuti galuyo akhoza kundichita zoopsa chifukwa kunalibe pamene mfumu mkango imalengeza zoti pakhale mtendere wa zinyama zonse." Nkhukuyo itamva zimenezi inamwetulira n'kunena kuti, "Nanga ine ndiye ndinaliko?"

Phunziro: Bodza lili ngati matenda, ukhoza kuwabisa koma pamapeto pake ena amadziwa.

Mafunso

1. Kodi nkhekuku inadziwa bwanji kuti nkhandweyo imanama?
2. Kodi nkhekukuyi inaonadi galu wambuyake akubwera?

3. Kodi ndi makhalidwe oipa ati amene nkhandwe inasonyeza m'nkhaniyi?
4. Kodi tikuphunzira chiyani m'nkhaniyi?

Munthu Wamanja Lende

Munthu wina ankayendetsa ngolo yake atanyamula katundu wolemera m'nyengo ina yadzinja. Ngoloyo inkakokedwa ndi abulu awiri. Chifukwa choti kunali matope ambiri, matayala a ngoloyo analowa m'matope n'kutitimira. Ndiyeno munthuyo anayamba kumenya abulu akewo, koma sanakwanitse kuyenda. Kenako anatopa moti anataya chikwapu chomwe chinali m'manja mwake n'kutsika pangoloyo. Ndiyeno anagwada pansu n'kupemphera kwa mulungu kuti amuthandize. Anati, “Ambuye mulungu, ndithandizeni chonde pa nthawi yovutayi.” Koma mulungu anamuyankha kuti, “Ndiwe wopusa kwabasi, tadzuka pamenepo ukakankhe ngolo yakoyo kuti ichoke m'matopemo!”

Phunziro: *Mulungu sangathandize munthu waulesi.*

Mafunso

1. Kodi tinganene kuti mulungu anathandiza munthuyu? Ngati ndi choncho, n'chifukwa chiyani mwatero?
2. Kodi mulungu anauza munthuyo kuti achite chiyani?
3. Kodi tikuphunzirapo chiyani?

Bambo ndi Mwana Wake Apita Kumsika

Bambo wina ankapita ndi mwana wake kukagulitsa bulu kumsika. Ndiyeno akuyenda kupita kumsikako, anakumana ndi munthu wina ndipo anawauza kuti, “Ndinu opusa kwambiri, bwanji osakwera buluyo?” Ndiyeno bamboyo anakweza mwana wakeyo pabuluyo n’kumapitiriza ulendo. Koma kenako anakumananso ndi gulu la anthu ndipo m’modzi mwa anthuwo anati, “Taonani mwana waulesiyu, iyeyo wakwera bulu koma bambo ake akuyenda wapansi!” Bamboyo atamva zimenezi anauza mwana wakeyo kuti atsike ndipo anakwerapo iyeyo. Koma asanapite patali anakumana ndi azimayi awiri ndipo m’modzi anawauza kuti, “Taonani bambo wopanda nzeruyu wakwera bulu, mwana wake akuyenda wapansi.” Zitatero, bamboyo anasowa chochita. Koma kenako anaganiza zoti angokwera pabuluyo limodzi ndi mwana wakeyo. Pamene ankachita zimenezi n’kuti atayandikira kumsika kuja ndipo anthu ena anayamba kuwalozera n’kumawanena chipongwe. Bamboyo anatsika pabuluyo n’kuwafunsa kuti alakwa chiyani. Koma anthuwo anati, “Kodi mulibe manyazi thunthu lonselo komanso mwana wanuyo kukwera pamsana pa bulu wamng’ono ngati ameneyu.” Bambo ndi mwana wakeyo sanakwerenso buluyo ndipo anaima kaye n’kuyamba kuganiza zoti achite. Pamapeto pake anaganiza zodula mtengo n’kumagirira buluyo n’kumunyamula pamapewa awo. Koma anadabwa kwambiri kuti anthu ankangowaseka ngati amisala ndipo posakhalitsa anafika pamlatho wolowera mumsika ndipo mwendo umodzi wa bulu uja unamasuka ndipo buluyo anagwa pansu n’kuthawa, moti sanakwanitsenso kumugwira. Ndiyeno munthu wina wachikulire, yemwe ankayenda pafupi nawo, anawauza kuti, “Mutengerepo phunziro, munthu amene amafuna kusangalatsa onse, sangasangalatse aliyense.”

Phunziro: *Sungakwanitse kusangalatsa aliyense.*

Mafunso

1. N'chifukwa chiyani munthu ndi mwana wakeyu anamanga buluyo pamtengo?
2. Kodi mawu akuti, “Munthu amene amafuna kusangalatsa onse, sasangalatsa aliyense” akutanthauza chiyani?
3. Kodi pali nthano iliyonse imene munaimvapo imene mukuona kuti ikufanana ndi imeneyi?
4. Kodi tikuphunzira chiyani m'nkhanayi?

Munthu Woumira

Kalekalelo panali munthu wina woumira kwambiri yemwe ankabisa ndalama zake pansu pamtengo wam'munda mwake. Mlungu ulionse ankapita pamtengopo n'kukumba ndalamazo, ndipo ankaziyang'ana kwinku akunyadira kuti ali ndi ndalama zambiri. Koma tsiku lina wakuba anamuona akuchita zimenezi ndipo munthuyu atachoka, wakubayo anapita kukakumbapo ndalamazo n'kuthawa nazo. Ndiyeno munthuyu atapitanso kuti akaone ndalama zake, anapeza kuti zonse zabedwa. Zitatero anameta tsitsi lake n'kung'amba zovala zake n'kuyamba kulira koopta. Anthu oyandikana nawo nyumba atamva kulirako, anabwera kuti adzaone chimene chachitika. Munthuyo anawafotokozera zonse. Anawauza kuti anakwirira ndalama zake pansu pamtengowo ndipo ankabwera mlungu ulionse n'kufukula ndalamazo moti akazona mtima wake unkasangalala zedi. Anthuwo anamufunsa kuti, “Kodi munkatengako ndalama zina kuti mukagwiritse ntchito?” Munthuyo anayankha kuti, “Ayi, ndinkangobwera kuti ndidzazione basi. Ndinkamva bwino kwambiri

ndikaona ndalama zanga zochuluka.” Ndiyeno anthuwo anamuuza kuti, “Ndiyetu musasiye. Mlungu ulionse muzibwerabe pamtengopa ndipo muzingoyerekezera kuti ndalama zanuzo zidakalipobe. Zimenezi zikuthandizani kwambiri kuti muzisangalala. Si mwati munkangobwera kudzazona?”

Phunziro: *Kukhala ndi ndalama kapena zinthu zambiri koma osamazigwiritsa ntchito, n’chimodzimodzi osakhala nazo.*

Mafunso

1. N’chifukwa chiyani munthu woumirayu anakakumba ndalama zake nthawi zonse?
2. Kodi akanatani kuti ndalama zake zisabedwe?
3. Kodi akanakhala wanzeru akanachita chiyani ndi ndalama zakezo?
4. Kodi tikuphunzira chiyani m’nkhanayi?

Nkhandwe ndi Udzudzu

Tsiku lina Nkhandwe inali paulendo ndipo itaoloka mlatho wina mchira wake unakodwa m’ziyangoyango moti inkalephera kuchoka. Udzudzu ungapo utaona zimenezi unakondwera kwambiri ndipo unayamba kuyamwa magazi a nkhandweyo popanda kusokonezedwa ndi mchira wake. Kenako kunabwera Chisoni ndipo chinamva chisoni kwambiri ndi Nkhandweyo moti chinapita kuti chikaithandize. Chinauza Nkhandweyo kuti, “Kodi ndingakuthandizeko bwanawe pothamangitsa udzudzu ukukuyamwa magaziwu?” Koma Nkhandweyo inati, “Zikomo kwambiri pondiganizira achimwene anga a Chisoni. Koma musatero ayi. Si mwati mukufuna mungouthamangitsa?” Chisoni

chinavomera ndipo chinafunsa kuti, “N’chifukwa chiyani simukufuna kuti ndiuthamangitse pomwe ukukuvutitsani?” Nkhandweyo inayankha kuti, “Udzudzuwu wangotsala pang’ono kukhuta, ndiye mukauthamangitsa ukaitana unzake wanjala kwambiri, moti ubwera n’kudzapopa magari anga onse.”

Phunziro: *Kumaona patali.*

Mafunso

1. N’chiyani chinachititsa Chisoni kuti chimvere chisoni nkhandwe?
2. N’chifukwa chiyani Nkhandwe inakana thandizoli?
3. Kodi tikuphunzira chiyani m’nkhanayi?

Nkhandwe Yopanda Mchira

Tsiku lina mchira wa Nkhandwe unakodwa pamsampha ndipo pamene inkayesetsa kuti ichoke, mchirawo unaduka. Poyamba Nkhandweyo inkachita manyazi kupita pamene panali anzake poopa kuti azimuseka. Koma kenako inalimba mtima n’kukakumana ndi anzake onse n’kukawauza kuti akufuna kuwauza nkhani yofunika kwambiri. Nkhandweyo inauza anzakewo kuti nawonso adule michira yawo. Nkhandweyi inafotokoza kuti mchira si wabwino makamaka agalu akamakuthamangitsa. Inawafotokozero kuti inaona kuti ndi bwino iwatsine khutu pa nkhani imeneyi. Inanena kuti sikufuna kuti anzakewo azinyamula pathupi lawo chinthu chomwe sichingawathandize koma kuwabweretsera mavuto. Ndiyeno anzakewo anati, “Tamva ndithu bwanawe, amenewo ndi maganizodi abwino. Koma tikuona kuti iweyo sukanaganiza zotiuza kuti tidule michira yathu, yomwe ndi ziwalo zamtengo wapatali,

zikanakhala kuti wako sunaduke. Tikuona kuti ukungofuna tifanane.”

Phunziro: *Osamakhulupirira malangizo ochokera kwa munthu amene alibe chimene uli nachocho.*

Mafunso

1. N’chifukwa chiyani Nkhandwe inkafuna kuti anzake adule michira yawo?
2. Kodi tinganene kuti inkachita zimenezi powafuniradi zabwino?
3. Kodi tingadziwe bwanji ngati munthu akutipatsadi malangizo chifukwa choti akutifunira zabwino?
4. Kodi tikuphunzira chiyani m’nkhanayi?

Kalulu wa Diso Limodzi

Tsiku lina Kalulu anaphulika diso limodzi ndipo kungochokera pa tsikulo, zinkamuvuta kuona chinthu chimene chikubwera kuchokera mbali yomwe diso linaphulikayo. Ndiye pofuna kupewa mavuto, Kaluluyu anakonda kudya pafupi ndi phompho lina lomwe kumunsi kwake kunali nyanja. Ankati akamadya diso lake labwinobwino lija linkakhala kumtunda, pomwe mbali inayo inkaloza kunyanja. Zimenezi zinkathandiza kuti aziona alenje akamabwera kudzamugwira ndipo nthawi zambiri ankathawa. Koma mlenje wina anatulukira kuti Kaluluyo analibe diso limodzi. Ndiye tsiku lina anakwera bwato n’kulowa m’nyanja, panso pachitunda chomwe kalulu ankadyera paja. Kenako anakoka uta wake n’kubaya Kaluluyo. Kaluluyo analira kuti, “Mayo ine. Zoonadi, imfa sithawika.”

Phunziro: *Ngakhale utayesetsa bwanji koma sungathawe imfa.*

Mafunso

1. Kodi Kalulu anatani kuti asaphedwe ndi mlenje?
2. Kodi zimenezi zinathandizadi?
3. N'chiyani chinachititsa Kaluluyu kuganiza kuti akamadyera malo amenewo akhala wotetezeka?
4. Kodi tikuphunzirapo chiyani?

Msonkhano wa Makoswe

Kalekalelo, Mphaka wina ankavutitsa Makoswe kwambiri. Makoswewo anayamba kudandaula ndipo anapanga chimsonkhano cha mnzanga ali pati, kuti agwirizane zoti achite ndi mdani wawoyo. Atakumana, Khoswe wina wodziwa kuyankhula anaimirira n'kunena kuti, “Akuluakulu, Mphakayutu akutisowetsa mtendere, akutizunza kwabasi moti tikulephera kupeza chakudya choti tidyetse mabanja athu. Sindikudziwa kuti tipange bwanji ndi chipsinjo chatigwerachi?” Nkhaniyo inalowa m'bwalo ndipo makoswewo anayamba kupereka maganizo osiyanasiyana. Koma kenako, khoswe wina wamng'ono anaimirira n'kunena kuti, “Mphakayudi akutisowetsa mtendere. Mungandivomereze kuti mdani wathuyu amayenda mochenjera kwambiri moti umangozindikira wakugwira. Ndiye ngati titamamva phokoso lotichenjeza kuti akubwera, tikhoza kumamuzemba, ndipo palibe angagwidwe. Choncho maganizo anga ndi akuti tipeze belu n'kumumangirira m'khosi. Ndiyeno akamabwera, ifeyo tizimumva, tikamumva, tizithawa.” Anzakewo anasangalala kwambiri ndi mfundo anatsitsayi ndipo anayamba kumuwombera m'manja

kwinaku akuimba malikhweru. Kenako Khosweyo anakhala pansi akumwetulira ndipo ankaoneka kuti wakukhutira ndi zomwe wanena. Koma Khoswe wina wachikulire anaimirira n’kunena kuti, “Maganizowa ndi abwinodi. Koma kodi ndi ndani amene angalimbe mtima kuti akamuveke belu?” Makoswewo anayamba kuyang’anizana ndipo palibe anayankha. Kenako khoswe wachikulireyo anapitiriza kunena kuti, “Ndi ndani amene moyo sakuufuna? Maganizo ena amakhala abwino, koma si onse amakhaladi othandiza.”

Phunziro: *Si maganizo onse amene amakhaladi othandiza.*

Mafunso

1. Kodi tinganene kuti maganizo oveka Mphaka belu, anali abwino kapena ayi? Ngati ndi choncho, n’chifukwa chiyani?
2. Kodi mwina n’kutheka kuti Makoswe enawo ananena zotani zomwe zinali zosatheka kuthetsa vutolo?
3. Kodi tikuphunzira chiyani m’nkhanayi?

Mpikisano wa Kalulu ndi Kamba

Nthawi inayake Kalulu ankadzitama kuti ali ndi liwiro kuposa nyama iliyonse. Ankati, “Palibe anayambapo wandiposa kuthamanga. Ndikati ndiliyatse liwiro, ndimachita kukhala ngati mphenzi. Ndipo ndikhoza kukuuzani kuti panopa palibe amene angandipose kuthamanga. Ngati pali wina akutsutsa, abwere tipikisane.” Koma kenako Kamba anayankha kuti, “Chabwino, tiye tipikisane.” Kaluluyo atamva zimenezi anati, “Musandiseketse a kamba! Zoonu inuyo. Kayendedwe kanutu kamakhala ngati ka mbozi, moti ndikhoza kukusiyani kuti muuyambe ineyo n’kupha

kaye tulo. Kenako ndikhoza kudzuka, kukasamba, kudya, ndiyeno n'kuyamba kuthamanga, koma ineyo n'kukakhalabe woyamba kukafika.” Koma kamba anati, “Ukhala chete pambuyo poti ndakuchotsa chimbenene. Tiye tipikisane.” Choncho anapangana mtunda woti athamange ndipo aliyense anakonzekera kuyambapo mpikisanowu. Lipenga la mpikisanowo litangolira, Kalulu anatsomphoka ngati mwala walegeni ndipo posapita nthawi sanaonekenso. Koma atangothamanga pang’ono, anaima kaye kuti abe tulo pofuna kumutsimikizira Kamba kuti akuchepera kaba. Kamba uja analimbikira kuthamanga moti pamene Kalulu ankadzuka, Kambayo anali akudutsa pamzere womaliza ndipo Kalulu sakanakwanitsa kuthamanga n’kumupitirira. Ndiyeno Kamba anati, “Munthu wakhama ndi amene amapambana mpikisano.”

Phunziro: *Munthu wakhama akhoza kuchita chilichonse.*

Mafunso

1. Kodi pakati pa Kalulu ndi Kamba chimathamanga kwambiri ndi chiyani? Ndiye n’chiyani chinapambana pa mpikisanowu, nanga n’chifukwa chiyani?
2. Kodi pali zinthu zinsano zimene munthu amene amachita zinthu modekha komanso mosathamanga angapambane kuposa wachangu kwambiri?
3. Kodi tikuphunzirapo chiyani m’nkhanisi?

Gogo Akumana ndi Imfa

Ukalamba umabwera ndi mavuto ambiri ndipo umapangitsa kuti moyo usamasangalatse. Ndiyeno kalekalelo, munthu wina anafika potopa ndi ukalamba chifukwa ankavutika kugwira yekha ntchito zapakhomo. Ngakhale kuyenda kumene kunkamuvuta kwambiri. Nthawi zonse ankangokhalira kudandaula msana, miyendo komanso kuphwanya kwa thupi. Kuti ayende, ankadalira m'gongosera. Ndiye tsiku lina, anapita kunkhalango kukatola nkhuni zoti aphikire nandolo. Atamaliza kutola nkhunizo, anazimanga kamtolo ndipo anasenza n'kumapita kwawo. Koma kenako nkhunizo zinayamba kumugogoda ndipo anatopa kwambiri. Atalephera kupirira, anaponya mtolo wankhuniwo pansi n'kunena kuti, "Sindingakwanitse kupitirizabe kukhala moyo movutika chonchi! Ndikanakondwera imfa ikanangobwera kudzanditenga." Nthawi yomweyo, imfa inatulukiradi ndipo inati, "Mayi, ndamva mukutchula dzina langa, mukundifuna eti? Tsopano ndabweratu, mukufuna ndikuchitireni chiyani?" Koma gogoyo anati, "Mwachitadi bwino kubwera. Kodi mungandithandizeko kusenza mtolowu? Ndikulephera kuusenza ndekha."

Phunziro: *Zinthu zina zimene timafuna zitachitikadi, sitingazikonde n'komwe.*

Mafunso

1. Kodi munthu wokalambayu ankafunadi kufa? N'chifukwa chiyani mukutero?
2. Kodi vuto lake linali chiyani kwenikweni?
3. Kodi tikuphunzirapo chiyani?

Kalulu ndi Anzake Ambirimбири

Kalulu anali nyama yotchuka kwambiri ndipo anali ndi anzake ambirimбири. Koma tsiku lina anaona Nkhandwe zikubwera ndipo anaganiza zopempha anzakewo kuti amuthandize kuthawa. Ndiye anapita kwa Bulu n’kumupempha kuti amunyamule pamsana pake, koma Buluyo anakana ndipo anamuuzza kuti mbuyake wamuuzza kuti agwire ntchito inayake. Anamuuzza kuti, “Ndikuganiza kuti utapempha Ng’ombe ikhoza kukuthandiza.” Kenako anapita kwa Ng’ombe akumaganiza kuti iopseza Nkhandwezo ndi nyanga zake. Koma ng’ombe nayonso inati, “Pepa m’bale wanga, ndinagwirizana ndi chibwenzi changa kuti tipite koyenda, ndiye ukudziwa kuti mnyamata safuna kukhumudwitsa njole yake. Ndikuganiza kuti utapempha Mbuzi ikhoza kukuthandiza mofanana ndi mmene ine ndikanachitira.” Koma atapitako, Mbuziyo inamuyankha kuti ikuvutika msana moti inadandaula kuti ngati itachita zimene amafunazo ndiye kuti sigona usiku, ingodziputira zina. Kenako inauza Kaluluyo kuti Nkhosa ikhoza kumuthandiza pa vuto lakelo ndipo anapitadi kwa Nkhosa. Koma Nkhosayo inamuuzza kuti, “Ndikanakuthandiza m’bale wanga, koma kungoti vuto lakoli landikulira. Ndakhala ndikumva kuti Nkhandwe zikumadya Akalulu ndi Nkhosa zomwe. Ndiye ndikuopa kuti nanenso ndikhoza kusiyana nalo dziko lapansi.” Kenako Kalulu anapita kwa mnzake womaliza amene ankaganiza kuti akhoza kumuthandiza. Mnzakeyo anali Tonde. Koma Tonde nayenso anakana kumuthandiza poganizira kuti anzake akuluakulu a Kaluluyo anali atakana kumuthandiza. Tonde ananena kuti kuvomera ntchitoyo chikanakhala chipongwe kwa nyama zinazo, zomwe zinali anzake aponda apa m’pondepo a Kaluluyo. Pa nthawiyi n’kuti Nkhandwe

zija zitayandikira ndipo Kaluluyo anangoti, phazi thandize, ndipo mwamwayi anapulumukadi.

Phunziro: *Munthu amene ali ndi anthu ambirimbiri ocheza nawo sakhala ndi anzake enieni.*

Mafunso

1. Kodi nyama zomwe Kalulu ankaona kuti anali anzake a pamtima, zinalidi anzake enieni?
2. N'chifukwa chiyani nyamazi sizinkafuna kuthandiza Kalulu?
3. Kodi tikuphunzira chiyani m'nkhaniyi?

Mkango Ugwa M'chikondi

Nthawi ina Mkango unagwa m'chikondi ndi mtsikana wina wokongola kwambiri ndipo inapita kwa makolo ake kukafunsira ukwati. Koma anthu a kwawo kwa mtsikanayo sanadziwe choti anene. Iwo sankafuna kuti mwana wawo akwatiwe ndi Mkango. Komabe, ankaopa kuukwiyitsa. Ankadziwa kuti ngati atachita zinthu mosasamala akhoza kuphedwa. Kenako bambo a mtsikanayo anati, “Tikuona kuti ndi mwayi waukulu kuti mwabwera kwathu kuno kudzafunsira banja monga inuyo Mfumu ya Zinyama zonse. Koma tikuona kuti mwana wathuyu ndi wamng'ono kwambiri. Ndiye popeza muzikakhala naye, mukhoza kukamuvulaza ndi zala komanso mano anuwo. Ndiye timafuna tikupempheni kuti muwenge zala zanuzo komanso muzule mano anu akuluakuluwo. Kenako mudzabwere kudzatenga mtsikanayu kuti akhale mkazi wanu.” Popeza Mkangowo unakonda kwambiri mtsikanayo, unachitadi zimene makolowo anapempha. Unawenga zala zake komanso unachotsa mano ake akuluakulu. Koma utapita kwa makolo a

mkazi uja, anthu anayamba kuuseka chifukwa cha mmene unkaonekera komanso chifukwa choti siunkaopsanso.

Phunziro: *Chikondi chikhoza kusintha munthu woopsa.*

Mafunso

1. Kodi Mkango ukanatani kuti ukwatire mtsikanayo popanda kuwenga zala komanso kuchotsa mano ake?
2. Kodi mukuganiza kuti makolo a mtsikanayo analola kuti Mkango ukwatire mwana wawo, mkangowo utawenga zala komanso kuzula mano ake? N'chifukwa chiyani mukutero?
3. Kodi tikuphunzirapo chiyani?

Kamtolo ka Mitengo

Bambo wina anadwala kwambiri. Atatsala pang'ono kufa, bamboyu anaitanitsa ana ake kuti awauze mawu omaliza. Zimadabwitsa kuti anthu ambiri amadikira kaye kuti atsale pang'ono kutsirizika n'kumanena mawu omaliza, pomwe anali ndi nthawi yambirimbi yoti akanachita zimenezo. Mwina amachita zimenezi popeza paja amati, mawu oyankhulidwa ndi munthu yemwe akutsirizika ndi omwe amatsakamira m'khutu. Ndiye bamboyu anauza wantchito wake kuti abweretse kamulu ka mitengo komwe anakamanga pamodzi ndipo anauza ana akewo kuti, "Tathyolani." Mwana woyamba anayesetsa kuti athyole koma analephera. Mwana wachiwirinso anayesa koma analephera. Ndiyeno bamboyo anauza anawo kuti, "Tsopano masulani mitengoyo. Ndipo aliyense atenge kamtengo kamodzi." Anawo atachita zimenezi, anawauza kuti, "Thyolani." Anawo anathyola timitengoto mosavuta ndipo bamboyo anati, "Mwaona zimene zachitika? Mtengo suvuta kuthyola

ukakhala wokha, koma ikakhala yambiri, imakhala yolimba kwambiri moti munthu sungaithyole. Nanunso muphunzirepo kanthu. Dziwani kuti ngati mutayamba kukangana aliyense n’kuyamba kuchita zake, zinthu sizidzakuyenderani bwino. Nanunso mukapanda kusamala anthu adzakuthyolani ndipo mafupa anu adzalira gobede.”

Phunziro: *Mu umodzi muli mphamvu.*

Mafunso

1. Kodi n’chifukwa chiyani zinali zophweka ana aja kuthyola mtengo umodzi umodzi?
2. Kodi tinganene kuti ana a bamboyo anali ngati mitengo imeneyi chifukwa chayani?
3. Kodi tikuphunzirapo chiyani?

Mawu Omaliza a Mkango

Nthawi ina Mkango unadwala mwakayakaya ndipo utatsala pang’ono kufa, unaitana nyama zonse kuti uziuze mawu omaliza. Unanena kuti izilowa nyama imodzi imodzi kuphanga lake. Choncho Mbuzi inapita kuphanga la Mkango ndipo inamvetsera kwa nthawi yaitali mawu omaliza a mkangowo. Kenako Nkhosa inakalowa ndipo kenako Ng’ombe nayonso inalowa kuti ikamve mawu omaliza a Mfumu ya Zilombo zonse. Phangalo silinkadziwika kuti ndi lalikulu bwanji chifukwa munali m’dima wa tsokomola ndingakuponde. Komabe nyamazo zinapitiriza kulowa m’phangalo. Koma kenako, Mkango uja unayamba kuchira moti unadzuka n’kuima pakhomo la phanga lake ndipo unaona Nkhandwe ikudikira panja paphangalo. Ndiyeno unafunsa Nkhandweyo kuti, “N’chifukwa chiyani

sukubwera kudzamva mawu anga omaliza?” Koma poyankha Nkhandweyo inati, “Pepani mfumu yanga, pansipa pakuoneka mapazi a nyama monga Mbuzi, Nkhosa komanso Ng’ombe, ndipo zikuoneka kuti nyamazi zalowa m’phanga lanulo. Koma sindikuona mapazi a nyamazi zikutuluka. Zimenezi zinandisokoneza mutu kwambiri, moti ndinayamba kuchita mantha. Mantha amenewa akhoza kutha ngati mutatulutsa nyama zonse zomwe zalowa m’phanga lanulo. Ngati mutatero ndiye mukhoza kundimasura moti nanenso ndikhoza kubwera kuti ndidzamve mawu anu omaliza.”

Phunziro: *N’zosavuta kugwera m’manja mwa adani koma zimakhala zovuta kutulukamo.*

Mafunso

1. Kodi chinachitika n’chiyani ndi nyama zomwe zinalowa m’phanga la Mkango lija?
2. Kodi mukuganiza kuti Mkango unkadwaladi? N’chifukwa chiyani mukutero?
3. N’chifukwa chiyani Nkhandwe inkakayikira zoti Mkango umadwaladi mwakayakaya?
4. Kodi tikuphunzira chiyani m’nkhanisiyi?

Ubongo wa Mbawala

Tsiku lina Mkango unagwirizana ndi Nkhandwe kuti zipite kosaka. Mkangowo unali utatumiza uthenga kwa Mbawala woiuza kuti nkhandwe ikufuna kukhazikitsa mtendere ndi Mbawalayo. Ndiyeno Mbawala itafika pamalo omwe anagwirizana kuti akakumane, inasangalala kwambiri kuona kuti Mkango nawonso wabwera monga mkhalapakati wa mgwirizanowu ndipo inaona kuti yalemekezedwa kwambiri ndi Mfumu ya Nyama zonse. Mbawalayo inati, “Ndafika kalekaletu pano, paja a mvula zakale anati kambalame kolawira ndi kamene kamatola mphutsi.” Nkhandwe itamva zimenezi inamwetulira n’kunena kuti, “Komatu khoswe wachiwiri ndi amene amadya zomwe zili pamsampha! Woyamba amafa atavuvutidwa ndi msamphawo.” Ali mkati mokambirana zimenezi, Mkango uja unagwira Mbawalayo n’kuipha ndipo unauza Nkhandwe ija kuti, “Chakudya chathu chalero ndi chimenechi. Ndikufuna kuti uziyang’anira nyamayi, ineyo ndikabe kaye tulo pang’ono. Ndiye popeza ukudziwa zimene ndimachita ndi anthu osamvera, usayerekeze n’komwe kugwira nyamayi.” Mkangowo unachokadi ndipo Nkhandweyo inkayang’anira nyamayo. Koma patapita nthawi, Nkhandweyo inayamba kumva njala. Ndiye itaona kuti Mkango sukubwera, inaganiza zochotsa ubongo wa Mbawalayo n’kuudya. Posapita nthawi, Mkango uja unatulukira ndipo utayang’ana bwinobwino, unazindikira kuti ubongo wa Mbawalayo wachotsedwa. Kenako unafunsa Nkhandweyo mwaukali kuti, “Kodi ubongo wa nyamayi wausiya kuti?” Koma Nkhandweyo inayankha kuti, “Mbawalayitu inalibe ubongo, chifukwa ikanakhala kuti inali ndi ubongo, sikanabwera pano. Ikanayamba yaganiza kaye kuti zinachitikapo liti Mbawala kupanga mgwirizano ndi Nkhandwe, mkhalapakati wakenso n’kukhala Mkango.”

Phunziro: *Munthu wanzeru sasowa choyankha.*

Mafunso

1. Kodi nzeru za Nkhandwe zinamuthandiza bwanji zoyankha?
2. Kodi mukuganiza kuti Mkangowo unangoisiyasiya Nkhandweyo?
3. Kodi tikuphunzira chiyani m'nkhaniiyi?

Nkhwazi Ibayidwa ndi Muvi

Tsiku lina Nkhwazi inkauluka ndipo mwadzidzidzi inangozindikira kuti yabaidwa ndi muvi moti inavulala kwambiri. Kenako inayamba kugwa pansu ndipo magari ankangochucha kuchokera pamene inabaidwapo. Itayang'ana pamene inabaidwapo inaona kuti muviwo unali utamangiriridwa ndi nthenga yake. Ndiye pamene inkafa inanena kuti, “Nthawi zambiri timapereka kwa adani athu chida choti atiphere.”

Phunziro: *Nthawi zina timapereka kwa adani anthu chida choti atiphere.*

Mafunso

1. Kodi ndi chiyani chimene mwina n'kutheka Nkhwazi inapereka kwa mdani wake chimene chinaiphetsa?
2. Kodi mdani wa Nkhwaziyi ndi ndani?
3. Kodi tikuphunzirapo chiyani m'nkhaniiyi?

Kuwerengera Madzi a Mphutsi

Tsiku lina mtsikana wina ananyamula mtsuko wodzadza ndi mkaka pamutu pake kuti akagulitse kumsika. Koma ali m'njira, anayamba kuganizira zomwe atachite ndi ndalama zomwe angapeze akagulitsa mkaka womwe anasenzawo. Anati, “Ndikangougulitsa, ndikagula nkukhu kwa Angozo. Nkhukuzo zikakula, zidzayamba kuikira mazira ambirimbi ndipo akadzachuluka, ndidzawagulitsa kwa a Nankhoma. Ndalama zomwe nditadzapeze ndidzagula diresi yokongola komanso mpango woti ndizidzavala kumutu. Ndikuganiza kuti ndikamadzayenda nditavala zimenezi, anyamata onse azidzangondilondola. Sindikukayikira kuti Nachisale akadzaona zimenezi adzachita nsanje. Koma aa, ndizidzangokhala ngati sizikundikhudza. Ndizidzangomuyang'ana cham'mbali kwinku ndikuyendetsa mutu wangawu chonchi . . . ” Nthawi yomweyo mtsuko unali pamutu uja unagwa pansu n'kusweka ndipo mkaka wonse unataika. Zitatere anabwerera kwawo akulira n'kukawauza mayi ake zomwe zinachitika. Atamva zimene mwana wawoyo ananena, mayiwo anati, “Mwana wanga, osamawerengera zinthu zimene sunazipeze.”

Phunziro: *Osamawerengera madzi a mphutsi.*

Mafunso

1. N'chifukwa chiyani mtsikanayu ankaganiza kuti mkaka wodzadza mtsukowo umuthandiza kuti adzagule diresi komanso mpango?
2. Kodi akanatani kuti asagwetse mtsukowo?
3. Kodi tikuphunzirapo chiyani?

Hatchi ndi Bulu

Tsiku lina Hatchi ndi Bulu zinkayendera limodzi. Hatchi inali ikuyenda mwamatama pomwe Bulu anali atanyamula katundu wambirimbi moti anali ataledmedwa zedi. Bulu anadandaula kuti, “Ndimalakalaka ndikanakhala ngati iwe. Sugwira ntchito iliyonse, koma umapatsidwa zakudya zambiri komanso zonse zimaoneka kuti zimakuyendera bwino.” Ndiyeno tsiku lotsatira kunayambika nkhondo, ndipo Hatchiyo inatengedwa n’kupita kunkhondo moti ili kumeneko inavulala kwambiri n’kutsala pang’ono kufa. Bulu uja atamva zimene zinachitikazo anati, “Inetu ndimadzinamiza. Kuli bwino kumakhala movutika uli pamtendere kusiyana n’kumadya bwino moyo wako uli pachiswe.”

Phunziro: *Moyo ndi wofunika kwambiri kuposa chilichonse.*

Mafunso

1. N’chifukwa chiyani Bulu ankachitira nsanje Hatchi?
2. Bulu ananena kuti Hatchi sinkachita chilichonse. Kodi ankanena zoonza? Ngati sankanena zoonza, kodi Hatchi inkagwira ntchito yanji?
3. Kodi tikuphunzirapo chiyani?

Woliza Lipenga

Tsiku lina munthu woliza lipenga kunkhondo anayandikira kwambiri adani ndipo anamugwira. Atangotsala pang'ono kumupha, munthuyo anapempha anthuwo kuti amuchitire chifundo. Anati, “Inetu sindimenya nawo nkhondo, ndipo sindinyamula chida chilichonse. Ndimangonyamula chitolilochi. Nanga chimenechi ndingaphere munthu ngati? Ndiye ndichitireni chifundo, musandiphe, chifukwa nanenso sindipha anthu.” Koma anthuwo anati, “N’zoona kuti sumenya nawo nkhondo, koma umalimbikitsa komanso kutsogolera asilikali kuti amenye nkhondo, ndiye tikupha pa chifukwa chimenechi.”

Phunziro: Tikhoza osachita nawo zoipa, ngati zonena zathu zimalimbikitsa ena kuchita zimenezo, n’chimodzimodzi kuti nafenso timachita zinthuzo.

Mafunso

1. N’chifukwa chiyani woliza lipenga ankaganiza kuti adani akewo samupha?
2. Koma kodi woliza lipengayo akanapangitsa bwanji kuti adani ake akumane ndi mavuto?
3. Kodi tikuphunzirapo chiyani?

Katswiri Wolira Nyama Zosiyanasiyana

Pachikondwerero china, katswiri wina woyerekeza kulira kwa zinyama anaseketsa anthu kwambiri pamene ankalira nyama zosiyanasiyana. Pomaliza munthuyo analira ngati nkhumba ndipo anthu anasangalala kwambiri moti ankaganiza kuti ikulira ndi nkhumba yeniyeni. Ndiyeno munthuyo anaima kaye n’kunena kuti, “Kumeneku ndi kulira kwa nkhumba. Ngati mukukayikira kuti ndimaliradi ndi ineyo, mawa mudzakhale pomwepo kuti mudzamve kulira kwa nkhumba yeniyeni.” Anthuwo atamva zimenezi anaseka kwambiri ndipo tsiku lotsatira munthu uja anabweranso. Koma pa nthawiyi anabisa mwana wankhumba ndipo anawerama n’kumamukoka khutu. Mwana wankhumbayo anayamba kulira ndipo anthuwo atamva kulirako anayamba kumugenda n’kumauza munthuyo kuti asiye. Munthuyo anati, “Ndinu wopusa kwabasi. N’chifukwa chiyani mumasangalala munthu akamayerekeza kulira kwa nyama n’kumadana ndi kulira kwa nyama yeniyeniyo?”

Phunziro: Anthu amasangalala ndi kuyerekezera chinthu chinachake n’kumadana ndi chinthucho.

Mafunso

1. Kodi katswiriyu ankapanga chiyani chomwe chinkaseketsa anthu?
2. N’chifukwa chiyani anthu aja anakwiya ataona kuti imene imalirayo inali nkhumba yeniyeni?
3. Kodi tikuphunzirapo chiyani?

Nkhandwe ndi Mbuzi

Tsiku lina Nkhandwe inkayendayenda m'nkhalango ndipo mwatsoka inagwera m'mbuna ndipo inkalephera kutulukamo. Ndiyeno zinachitika kuti Mbuzi inkadutsa pafupi ndi mbunayo ndipo Mbuziyo itaona nkhandweyo inafunsa kuti, “Kodi mukutani m'menemo?” Nkhandweyo inayankha kuti, “Chaka chino kukhala chilala choopsa moti madzi azisowa. Ndiye ndikukumba chitsimechi kuti chilalacho chikamafika, ndikhale ndili ndi madzi okwanira. Nawenso dumphira momwemuno tithandizane kuti tizidzamwera limodzi madziwa.” Mbuziyo itamva zimenezi inaona kuti umenewo ndi mwayi wake, moti inalumphiradi m'mbunamo. Kenako Nkhandwe ija inalumphira pamsana pambuziyo n'kutuluka m'dzenjemo ndipo inati, “Tionana bwanawe. Kuyambira lero usadzayerekezenso kumvera malangizo ochokera kwa munthu yemwe wapanikizidwa ndi mavuto.”

Phunziro: Osamakhulupirira malangizo ochokera kwa munthu amene wapandikizika, akhoza kukhala kuti akungofuna njira yothawira mavutowo.

Mafunso

1. N'chifukwa chiyani Mbuzi inadumphira m'dzenje muja?
2. N'chifukwa chiyani Nkhandwe inkafuna kuti Mbuziyo igwere m'dzenjemo?
3. Kodi tikuphunzirapo chiyani?

Nsikidzi ndi Ana Ake

Munthu wina atatopa kulumidwa ndi Nsikidzi, anaganiza zotereka madzi kuti azikhaulitse. Kenako anatenga bulangete lakelo n’kuliika munkhali n’kutenga madzi obwadamuka n’kuwakhuthulira momwe munali bulangetelo kuti nsikidzizo zikhaule. Ndiye zimenezi zitangochitika, Nsikidzi yomwe inali m’bulangetemo inauza ana ake kuti, “Ana anga, muyenera kukhala opirira, chifukwa chilichonse chotentha, pamapeto pake chimazizira. Vuto lingatenthe bwanji, limakhala ndi mapeto ake.”

Phunziro: *Chilichonse chotentha, pamapeto pake chimazizira. Mavuto angakule bwanji, amakhala ndi polekezera.*

Mafunso

1. Kodi munthu anatani Nsikidzi zitamuvuta zedi?
2. N’chifukwa chiyani Nsikidzi inauza ana ake kuti “chilichonse chotentha, pamapeto pake chimazizira”?
3. Kodi ndi zoonse kuti vuto lililonse limakhala ndi pothera?
4. Kodi tikuphunzirapo chiyani?

Nyani ndi Mwana Wake

Nthawi inayake, padziko lapansi panachitika mpikisano woonetsa ana okongola kwambiri. Ndiye Nyani atangomva za mpikisanowu, nayenso anatenga mwana wake n’kuthamangira komweko. Malamulo a mpikisanowo anali akuti, usanayambe kuchita nawo mpikisanowo unkafunika kukaonetsa wochititsa mpikisano mwana wakoyo. Ndiye wochititsa mpikisanowo ataona mwana wa Nyaniyo anaseka koopsa, ndipo anafunsa Nyaniyo kuti, “Mayi, mwabweretsachi n’chiyani?” Nyaniyo anayankha kuti, “Mwana, bwanji?” Wochititsa mpikisanowo anati, “Nanga bwanji mphunozi?” Akuti ankaseka mphunozo chifukwa zinkangooneka ngati zochita kuboola ndi tchizulo. Kenako anapitirizabe kuseka mwachipongwe kwambiri. Koma kenako Nyaniyo anati, “Inuyo mukhoza kuseka mmene mungathere. Koma dziwani kuti kwa *ineyo*, padziko lonse lapansili palibenso mwana wina wokongola kwambiri kuposa wangayu.”

Phunziro: Mwana sanyansa mayi wake. Anthu ena akhoza kumamuona kuti ndi wonyansa, koma kwa mayi wake ndi wokongola kwambiri.

Mafunso

1. Kodi tinganene kuti Nyani ankaonadi kuti akhoza kupambana mpikisanowo?
2. N’chifukwa chiyani wochititsa mpikisanowu anaseka ataona mwana wa Nyaniyo?
3. Kodi nyaniyo anayankha zotani?
4. Kodi wochititsa mpikisanowu analakwitsa chiyani?
5. Kodi tikuphunzirapo chiyani?

Nkhuku ndi Mwala Wamtengo Wapatali

Tsiku lina Tambala ankayendayenda kwinaku akusaka chakudya. Kenako anafukula kanthu kenakake kowala pakati pazinyalala. Ndiyeno anati, “Ho! ho! Mulungu sapatsa pamanja.” Kenako anakachotsa pazinyalalapo ndipo anazindikira kuti ndi kamwala kamtengo wapatali. Ndiyeno anati, “Ukhoza kukhaladi wamtengo wapatali kwa anthu amene amakuona ngati mwala wapadera. Koma kwa ineyo, chinthu chamtengo wapatali ndi deya kapena misere imene imandithandiza kuti ndikhale ndi moyo.”

Phunziro: *Chinthu chimakhala chamtengo wapatali malinga ndi mmene munthu akuchionera.*

Mafunso

1. Kodi mukuganiza kuti tambala ankaganiza kuti wapeza chiyani?
2. Kodi chinthu chamtengo wapatali chimene tambalayu ankafunafuna chinali chiyani?
3. Kodi tikuphunzirapo chiyani?

Khoswe ndi Msampha

Bambo wina makoswe anamuvuta zedi ndipo amati akagula chinthu, makoswewo ankamubera n’kukalowetsa kuuna wawo. Tsiku lina makoswewo anamusautsa kwambiri chifukwa ankaongoyendayenda padenga moti tulo sadatione. Zinafika pomukwana kwambiri makoswewo atamuboolera zovala zake ndipo anaganiza zothana nawo. Anayesa kuwathirira tameki, koma palibe ndi m’modzi yemwe amene anadya. Kenako anaganiza zotchera misampha. Anaika misampha ingapo m’nyumbamo ndipo pa msampha uliwonse anaika chakudya chomwe makoswewo ankachikonda kwambiri. Makoswewo ataona zimenezi, anakopeka kwambiri moti khoswe wina anati, “Tiyeni tikasangalale ndi chakudya.” Koma mnzake anamuuzza kuti, “Taima kaye, wadziwa bwanji kuti tikasangalala. Kodi munthuyu anayamba wachitazo zimenezi? Mwinatu akufuna atikole.” Koma khoswe wina wadyera kwambiri sanaupeze mtima, moti anaganiza zotenga chakudya chomwe chinali pamsampha wina. Atangochigwira, msamphawo unafwamphuka ndipo unamukang’antha pamimba. Khosweyo anayamba kulira ndipo anauza anzakewo kuti, “Chakudyachi ndilibe nachonso ntchito, mukhoza kuchitenga. Chomwe ndikufuna panopa ndi kuchoka pamsamphawu.”

Phunziro: *Kumaganizira zotsatira za zomwe mukuchita.
Osamangotengeka ndi chilichonse.*

Mafunso

1. Kodi khoswe wadyera anatengeka ndi chiyani?
2. Kodi ananena chiyani atapanidwa ndi msampha?
3. Kodi tinganene kuti sankachifunadi chakudyacho? N’chifukwa chiyani anasintha maganizo?

4. N’chifukwa chiyani tiyenera kumaganizira mavuto amene tingakumane nawo tisanachite chilichonse?
5. Kodi tikuphunzirapo chiyani?

Nkhani ya Kutha kwa Dziko

Kagiso anali ndi mbuzi ndipo panthawiyi n’kuti itakula ndithu. Ndiye tsiku lina kunabwera anzake omwe ankakhala moyandikana nawo nyumba n’kumuuza kuti aphe mbuziyo. Atawafunsa chifukwa chake, anthuwo anamuuza kuti, “Nkhosa yakoyitu yanenepa. Tiye tikaiphe kumtsinje. Popeza kunjaku kwatentha, tikaiphere kumtsinje kuti tikakatenthedwa tizikangolowa mumtsinje n’kumasambira.” Koma Kagiso anawayankha kuti, “Ayi, sindikufuna kupha mbuzi yanga.” Koma wina anamuuza kuti, “Kodi sunamve? Dzikolitu likutha mawa!” Kagiso anadabwa ndi zimenezi ndipo ataona kuti akhoza kufa asanadye mbuzi yake, anavomera zoipha ndipo anaigwira n’kumapita nayo kumtsinje. Atafika kumeneko anaipha ndipo anayamba kuisenda chikopa. Azinzake aja atayamba kumva kutentha anavula zovala zawo zonse n’kuyamba kusambira. Koma Kagiso ankangoti jijirijijiri kukonza mbuzi ija. Atamaliza kuikonza, anakoleza moto ndipo anayamba kuiwotcha. Pa nthawiyi n’kuti anzake aja akupanga chipako cham’madzi. Patapita nthawi, kafungo kabwino kanayamba kumveka ndipo anzake aja anatuluka m’madzi muja n’kumuuza kuti, “Koma ndiye utipha ndi fungotu, tigawireko titsuke mkamwa.” Koma atayang’ana pamene panali zovala zawo anaona kuti palibe ndipo anamufunsa kuti, “Kodi zovala zathu wazisiya kuti?” Kagiso anayamba kuzimbaitsa nkhaniyi amvekere, “Inetu ndimadabwa anthu akamanena kuti *zovala*. Ndimaona kuti munthu akavula zimene anavala n’kuziika poteropo,

sizikhalanso zovala, koma *zovula*.” Anzakewo atamva zimenezi anakwiya kwambiri ndipo anamuuzza kuti, “Usatitayitse nthawi iwe, zovala zathu wazisiya kuti?” Ndiyeno Kagiso anayankha kuti, “Ndazikolezera moto.” Atamva zimenezo anzakewo anapsa mtima kwambiri ndipo anati, “Zoonu ungakolezere moto zovala zathu?” Koma Kagiso anayankha kuti, “Ee, pali vuto? Si paja munati dziko likutha mawa, ndiye mukufunanso zovala zantchito yanji?” Anzakewo anangoti kukamwa yasa, ndipo anayamba kuganizira mmene angayendere kuti akafike kwawo.

Phunziro: *Nthawi zina ukamapusitsa mnzako, umakhalanso ukudzipusitsa wekha.*

Mafunso

1. Kodi zimene anzake a Kagiso ankanena, zoti dziko likutha mawa, zinali zoonu? N’chifukwa chayani mukutero?
2. N’chifukwa chiyani Kagiso anakolezera moto zovala za anzakewo?
3. Kodi tikuphunzirapo chiyani m’nkhanayi?

Nkhani ya Kalulu ndi Nkhandwe Yatulo

Iyi ndi nkhanu ya achikulire a Kalulu ndi nkhandwe. Tsiku lina Kalulu ankafuna kupusitsa nkhandwe ndipo anaima pafupi ndi mwala wina. Mwalawo unaima ngati ukufuna kugwa ndipo kalulu ankaukankhira m’mwamba. Nkhandwe itaona zimenezi inafunsa Kalulu kuti, “Achikulire, mukutani pamenepo?” Ndiyeno Kalulu anaiuzza kuti, “Tabwera mwansanga bwanawe, mwalawutu ukugwa. Taugwira kuti ineyo ndikatenge mtengo tidzauimikire.” Nkhandweyo inavomeradi ndipo Kaluluyo ananyamuka n’kumapita n’kuisiya

Nkhandwe itagwira mwalawo. Nkhandweyo inachita zimenezi kwa nthawi yaitali zedi koma Kalulu uja sanabwererenso. Nkhandweyo inayamba kuitana Kalulu uja ndipo inkati, “Kodi simunaupezebe mtengowo, mwalawutu ukundilemera.” Koma kunali zii. Nkhandweyo itatheratu, inaganiza zosiya mwalawo ndipo inasiya mwalawo n’kuchokapo mwachangu kuti usaigwere. Koma itachoka, inaona kuti mwalawo sunasunthe. Tsiku linanso Kalulu anapita kukamwa madzi padziwe lina ndipo m’madzi munkaoneka mwezi. Apa anaganizanso zopusitsa nkhandwe ija ndipo anaiitana n’kuiuza kuti, “Taona m’madzimo, pansi pamadzipo, chimenechotu ndi chakudya.” Ndiyeno Nkhandweyo inati, “Ee, ndachiona, ndi chakudya chanji?” Kaluluyo anayankha kuti, “Ndi mtanda wa nsima. Kuteroko ineyo ndayamba kale kumwa madziwa n’cholinga choti aphwe. Ndiye popeza ndiwe wamkulu, ukhoza kumaliza madzi atsalawa, kuti kenako titenge nsimayo tidye. M’bale wanga, tamwa madziwa kuti timeze kadaunda madzi.” Nkhandwe yatuloyo inavomeranso zimenezi ndipo inayamba kumwa madzi aja. Sinazindikire kuti chimene chimaoneka m’madzicho si nsima koma mwezi. Kenako kalulu uja anatsanzika n’kumapita. Nkhandweyo inamwa madziwo mpaka mimba yake inangoti nguu, kukhuta. Itaona kuti sakuthapo, inangonyamuka n’kumapita kwawo ndipo usiku wa tsiku limenelo sinatione tulo chifukwa cha kupweteka kwa mimba yake.

Phunziro: *Osalola kuti munthu akupusitse kawiri.*

Mafunso

1. Kodi Kalulu anapusitsa bwanji Nkhandwe?
2. N’chiyani chikusonyeza kuti Nkhandweyo inali yatulo?
3. Kodi tikuphunzirapo chiyani?

Anyamata Awiri Akumana ndi Munthu Wokalamba

Kalekalelo panali anyamata awiri a pachibale. Anyamatawa anaganiza zoyamba kuyendayenda padzikoli kuti akafunefune mwayi komanso chisangalalo. Ali m'njira anaona bambo wina wachikulire akuyenda patsogolo pawo. Bamboyu anali ndi ndevu zowirira zedi. Ndiyeno mnyamata wamkulu anati, “Wamuona bambo uyo? Alitu ndi ndevu zoti ndikhoza kuzendewera. Ndevu zopangitsa mwana kufunsa kuti, ‘Ababa pakamwa mpati?’ Mwina mwachidule ndingoti ali ndi ndevu za ponya mtedza upaone.” Anyamatawo ankachita chidwi ndi ndevuzo moti bamboyo anaima n’kuwafunsa kuti, “Mukupita kuti?” Anyamatawo anamufotokozera chimene ankafuna ndipo bamboyo anati, “Ndikhozatu kukuthandizani.” Kenako anapisa m’thumba n’kutulutsa kajumbo kodzadza ndi ndalama. Kenako anafunsa anyamatawo kuti, “Ndani amene akufuna ndalamazi.” Nthawi yomweyo mnyamata wamkulu uja anayankha kuti, “Ndipatseni ine.” Bamboyo anamupatsadi ndipo kenako anapisanso m’thumba n’kutulutsa mwala wamtengo wapatali ndipo anafunsaso kuti, “Ndani akufuna mwala wamtengo wapataliwu?” Nthawi yomweyo mnyamata wamkulu uja anayankhanso kuti, “Ndipatseni ine.” Bamboyo anamupatsadi. Koma mnyamata wamng’ono uja sanalandire kanthu. Ndiyeno bambo wachikulireyo anatula thumba limene ananyamula n’kupempha anyamata awiriwo kuti, “Ndani amene atandinyamulire thumbali kuti akandisiyire kwathu?” Atamva zimenezi, mnyamata wamkulu uja anangoti duu. Koma wamng’ono uja anapinda malaya ake n’kusenza thumbalo n’kuuza munthu wachikulireyo kuti, “Tiyenitu muzinditsogolera.” Bamboyo anangomwetulira n’kumuuza kuti, “Tenga thumbali mwana wanga, ndakupatsa kuti likhale lako. Utengenso zonse zimene zili m’katimo.” Mnyamatayo atamva

zimenezo anati, “Ayi, musatero, ndikungofuna kukuthandizani basi.” Koma bamboyo anamuuzza kuti wamupatsa monga mphatso. Mnyamatayo atatsegula thumbalo, sanakhulupirire zimene anaona. Anapeza kuti thumbalo linali lodzadza ndi miyala yamtengo wapatali!

Phunziro: *Khalidwe labwino ndi limene limapangitsa munthu kupeza mwayi.*

Mafunso

1. Kodi anyamata awiriwa ankafuna chiyani?
2. Kodi anyamatawa anali osiyana bwanji?
3. Ndi uti amene anali wakhalidwe labwino? N’chifukwa chiyani mukutero?
4. Kodi khalidwe labwino linathandiza bwanji mnyamata wamng’ono uja kupeza mwayi?
5. Kodi tikuphunzirapo chiyani?

Chisoni Chinaphetsa Nkhwali

Kalekalelo njoka inkafuna kuwoloka mtsinje wina. Ndiye popeza palibe chimene ikanachita kuti iwoloke yokha, inapempha nkhwali kuti aithandize. Nkhwaliyo inamva chisoni zedi ndi mmene njokayo inkaonekera ndipo inavomera kuti ichitadi zimene njokayo inkafuna. Inauza njokayo kuti, “Zizengereze m’khosi mwangamu.” Kenako inanyamuka n’kuuluka. Itafika kutsidya, nkhwaliyo inauza njokayo kuti, “Bwanawe, tafikatu. Tsopano ukhoza kutsika kuti uzipita.” Koma njokayo inakana kwamtuwagalu kuti sichoka. Pamapeto pake, nkhwaliyo inaona tsoka la nkhuku, lopita kumanda nthenga zokha.

Phunziro: *Chisoni nthawi zina chimapweteketsa.*

Mafunso

1. N'chiyani chinachititsa kuti njoka ipemphe thandizo kwa nkhwali
2. Kodi njokayo inayamikira zimene mnzakeyo anamuchitira?
3. N'chifukwa chiyani tinganene kuti nkhwali sinaganize bwino povomera kuthandiza njoka?
4. Kodi nkhwali inakumana ndi zotani pamapeto pake?
5. Kodi tikuphunzirapo chiyani?

Chisoni Chinaphetsa Wosema Mitondo

Nthawi ina alenje anavumbulutsa gondwa ndipo anayamba kumuthamangitsa. Alenjewe anamupezeketsa gondwayo moti anangotsala pang'ono kumugwira. Gondwayo anayesetsa kukoka phazi koma sizinam'thandize moti anaganiza zopempha thandizo kwa munthu wina yemwe ankasema mitondo m'nkhalangomo. Atatoperatu, gondwayo anapempha wosema mitondoyo kuti, "Ndithandizeni chonde ndagwira mwendo wanu. Alenjewa akufuna moyo wanga, chonde ndipulumutseni!" Wosema mitondoyo anamva chisoni kwambiri ndipo anauza gondwayo kuti amubisa. Koma popeza panalibe malo pafupi pomwe akanamubisapo, wosema mitondoyo anangoganiza zomubisa mkamwa. Alenjewe atafika anafunsa wosema mitondoyo kuti, "Mwaona gondwa atadutsa apa?" Koma wosema mitondoyo anapukusa mutu posonyeza kuti sanamuone. Ndiyeno alenjewe atachoka, munthuyo anauza gondwa uja kuti, "Alenje ajatu apita, ukhoza kutuluka tsopano." Koma

gondwayo anayankha kuti, “Tadikirani kaye, muli kenakake kokoma muno.”

Phunziro: *Kumaona anthu owathandiza, ena akhoza kungokubweretsera mavuto.*

Mafunso

1. N’chifukwa chiyani wosema mitondo anaganiza zothandiza gondwa?
2. Kodi gondwa anayamikira zimene munthuyo anamuchitira?
3. Mukuganiza kuti chinamuchitikira munthuyu n’chiyani?
4. Kodi nthanoyi ikufanana bwanji ndi ya mutu wakuti, “Chisoni Chinaphetsa Nkhwali”?
5. Kodi tikuphunzirapo chiyani?

Azimayi Anzeru

Kalekalelo, mfumu ina yamphamvu kwambiri inalanda mzinda wina. Mfumuyi inalamula kuti amuna onse a m’udziwo apedwe, koma akazi anauzidwa kuti akhoza kuthawa. Anauzidwanso kuti akhoza kutenga chilichonse chimene angakwanitse kunyamula. Azimayiwa atamva izi, anangolowa m’nyumba zawo n’kukaika amuna awo kumbuyo n’kumathawa nawo. Mfumuyo itaona zimenezi inafunsa azimayiwo kuti, “N’chifukwa chiyani mukuchita zimenezi? Si paja ndinakuuzani kuti muthawe nokha?” Koma azimayiwo anayankha kuti, “Pajatu munati tikhoza kutenga chilichonse chimene tingakwanitse kunyamula! Ndiye kwa ifeyo katundu ofunika kwambiri ndi amene tanyamulayu.” Mfumuyo inaona kuti zimenezi n’zomveka, moti inalola azimayiwo kutenga katundu ananyamulayo, ndipo amuna onse a m’udziwo anapulumuka.

Phunziro: *Osamaiwala zinthu zofunika kwambiri.*

Mafunso

1. N'chiyani chikusonyeza kuti azimayiwa anali anzeru?
2. Kodi ndi zinthu zina ziti zimene akanakwanitsa kunyamula, kupatulapo amuna awo?
3. Kodi anagwiritsa ntchito bwanji mawu a mfumu kupulumutsa amuna awo?
4. Kodi tikuphunzirapo chiyani?

Mwana Wosamvera

Mayi wina anali ndi mwana wosamvera, mwanayu sankamva ndi pakamwa pokha, koma am'menye basi. Nthawi zina amati akamuuzza kuti asachite zinazake, ankakhala ngati wamva, koma zomwe ankachita pambuyo pake, zinkasonyeza kuti zimene wauzidwazo zangolowera khutu ili n'kutulukira linalo. Ndiye tsiku lina mayiyo anauza mwanayo kuti, "Kunjatu kwacha kalekale, nyamuka uzipita kusukulu, ukachedwatu aphunzitsi akakubweza!" Koma mwanayo sanamvere ndipo anapitirizabe kumuuzza kambirimbi, koma ayi ndithu ankangozikankhira kunkhongo. Ankachita zinthu ngati kuti kusukuluko anakaphunzirira mayi akewo. Koma akakhalanso pakhomo ankawatopetsa mayi ake chifukwa anakana kugwira ntchito. Chinthu chimene ankachidziwa kunali kudya basi. Ndiye mayiyu atatopa ndi khalidwe la mwanayu, ananyamuka n'kupita kwa chikwapu. Atafika anachiuza kuti, "Mwana wanga akuvuta, kodi mungakamukwapule kuti apite kusukulu?" Koma chikwapucho chinakana. Zitatero mayiyo anaganiza zopita kwa moto. Anaufotokozera kuti akufuna

kuti motowo ukawotche chikwapu chifukwa chikukana kukwapula mwana, ndipo mwana akukana kupita kusukulu. Koma nawonso moto unakana. Mayiyo anakhumudwa kwambiri ndi zimenezi moti anaganiza zopita kwa madzi. Atafika kumeneko anawafotokozera kuti, “Pepanitu a madzi. Ineyo ndikufuna thandizo lanu. Ndikufuna mukazimitse moto chifukwa ukukana kuwotcha chikwapu, chikwapu chikukana kukwapula mwana, mwana akukana kupita kusukulu.” Koma nawonso a madzi anakana. Kenako mayiyo anapita kwa ng’ombe. Anaifotokozeranso nkhanu yonse koma nayonso inakana. Zitatero, anaganiza zopita kwa m’busa wang’ombe. M’busayo anawamvetsa mayiwa chifukwa nawonso anali ndi mwana wovuta ndipo ananyamuka n’kuyamba kuthamangitsa ng’ombe. Ng’ombe itaona kuti zavuta, inayamba kuthamangira kumene kunali madzi. Madzinso ataona kuti amwedwa, anaganiza zokazimitsa moto. Moto utaona kuti uzimitsidwa, unaganiza zokawotcha chikwapu. Ndipo chikwapu chitaona kuti zinthu sizili bwino, chinayamba kukwapula mwana ndipo mwana anapita kusukulu.

Phunziro: *Osamamva nkhwangwa ili m’mutu.*

Mafunso

1. N’chifukwa chiyani mwana anakana kupita kusukulu?
2. Kodi zimene anakachitazi zikanakhudza bwanji tsogolo lake?
3. N’chiyani chinachititsa kuti apite kusukulu?
4. Kodi zimachitikadi kuti mayi apemphe chikwapu kuti chikwapule mwana?
5. Kodi nkhaniyi ikusonyeza kuti kulanga mwana n’kofunika bwanji?

Mwana Wamwano

Pamudzi wina panali mwana wosamvera komanso waulesi. Makolo ake amati akamutuma ankakana, apo ayi ankangochokapo n’kupita kukabisala. Ndiye tsiku lina anamukakamiza kuti apite kumunda ndipo atafika kumundako, mwanayo anakwera mumtengo n’kubisala. Mumtengomo munali njoka ndipo njokayo inamuluma moti anafera pompo. Makolo ataona kuti mwana wawo sakuoneka, anayamba kumufunafuna ndipo anamupeza pansi pamtengo atafa. Atayang’ana mumtengo, anaona njoka ndipo anadziwa kuti ndi imene yamuluma. Makolowo ataona mwana wawoyo anati, “Mwana wathuyu wafa chifukwa cha mwano. Akanamvera zimene timamuuza, sakanafa.”

Phunziro: *Mwana womvera amakhala ndi moyo wautali.*

Mafunso

1. Kodi mwanayu anali ndi mavuto otani?
2. Kodi mukuganiza kuti n’chifukwa chiyani atafika kumunda anakwera mumtengo?
3. Kodi anakumana ndi mavuto otani?
4. Kodi akanatani kuti apewe mavuto amenewa?

Bambo ndi Mwana Wake

Tsiku lina bambo wina anakwera sitima limodzi ndi mwana wake. Sitimayo itangoyamba kuyenda, mwanayo anayamba kulongolola m'sitimayo ndipo amauza bambo ake kuti, “Ababa, taonani mitengo ikuthamanga! Taonaninso nyumbazi, zikuthamangatu ngati mphenzi!” Bambo akewo anangogwedezera mutu n’kumusiya. Anthu ena ataona izi anafunsa bamboyo kuti, “Kodi mwana wanuyu n’koyamba kukwera sitima?” Koma bamboyo anapukusa mutu. Kenako mwana uja anayamba kufuntha m'sitimayo, amati akaona chinthu, amachiyandikira kuti achionetsetse ndipo anthu ena anayamba kusowa naye mtendere. Ndiyeno munthu wina anauza bambo a mwanayo kuti, “Kodi mwana wanuyu mutu wake umagwira? N’chifukwa chiyani akungokhala ngati anadya matakoko a galu?” Ndiyeno bamboyo anayankha kuti, “Si bwino kupupuluma kuweruza munthu wina usakudziwa nkhani yonse. Pali mawu akuti, ‘osamaweruza munthu kuchokera pamene iweyo waima, koma kuchokera pamene munthuyo waima.’ Mawuwa amatanthauza kuti kumakhala kulakwa kumaweruza munthu pongotengera zimene ukuona. Pepani kuti mwana wangayu akukusowetsani mtendere, koma ineyo ndikumumvetsa. Mwanayutu anabadwa wosaona. Kuteroko panopa tikuchokera kuchipatala komwe anakamuchita opaleshoni ya maso moti wangoyamba kumene kuona. Chilichonse ndi chachilendo kwa iyeyu moti n’chifukwa chake akumangodabwa ndi chilichonse. N’chifukwa chakenso ineyo sindinamuletse. Ndimaona kuti akatopa asiya yekha.” Atamva zimenezi, anthuwo anagwira pakamwa.

Phunziro: *Osamafulumira kuweruza ena usakudziwa nkhani yonse.*

Mafunso

1. Kodi vuto la mwanayu linali chiyani?
2. Kodi tinganene kuti mitengo yomwe ankaona inkathamangadi?
3. N’chifukwa chiyani anthu ena anayamba kudabwa naye?
4. Kodi pamene bamboyo anagwedezera mutu ankatanthauza chiyani? Nanga bwanji pamene anapukusa mutu?
5. Kodi tinganene kuti anthu a m’sitima ija analakwitsa kuganiza kuti mutu wa mwanayo sugwira?
6. Kodi mukuganiza kuti akanatani kuti adziwe vuto la mwanayo popanda kunena zachipongwe?
7. Kodi tikuphunzirapo chiyani?

Kupulumukira Mkamwa mwa Mbuzi

Tsiku lina anyamata awiri anapeza mbuzi itamangidwa pamtengo wina ndipo anaganiza zoti aibe. Atangoyamba kumasula chingwe cha mbuziyo, mwini wake anabwera ndipo anawafunsa kuti, “N’chifukwa chiyani mukumasula mbuzi yanga?” Anthuwo anayamba kuchita mantha. Koma m’modzi anati, “Tinaona kuti pano palibe msipu wabwino, ndiye tinaganiza zoti tikaimangirire pamtengo uwo. Taonani msipu wake ukungoti biriwiribiriwiri, kukongola. Zoonambuziyo ife ndi njala msipu uli m’khonde?” Mwini mbuziyo atamva zimenezi anawakhulupiriradi. Koma mbuziyo inkadziwa kuti anthuwo akunama. Ndiye chifukwa choti sitha kuyankhula, akubawo anapulumukira mkamwa mwa mbuzi.

Phunziro: *Anthu ena amapulumuka chifukwa cha bodza.*

Mafunso

1. Kodi cholinga cha anyamatawa chinali chiyani?

2. Kodi ankanena zoonu pamene ananena kuti amafuna kumangirira mbuziyo pamene panali msipu wabwino?
3. Kodi anyamatawa anapulumukira pati?
4. Tiyerekeze kuti munthu wina wapulumuka mwamwayi galimoto ikufuna kumugunda, kodi kungakhale kulondola titanena kuti wapulumukira mkamwa mwa mbuzi?

Kodi Wochimwa Anali Ndani?

Pa nthawi ina alimi 10 anali paulendo. Ali paulendowo kunayamba chimvula champhamvu komanso cha ziphaliwali. Alimiwo ataona kuti mvulayo ikhoza kuwapweteka, anaganiza zobisala m'kanyumba kena. Koma atafika m'kanyumbako, anaona kuti chiphaliwali china chinkangozungulira kanyumbako. Pamalopo panali chiphokoso choswa makutu, moti alimiwo anayamba kunjenjemera. Kenako anayamba kuganiza kuti n'kutheka zoti pakati pawo pali munthu wina wochimwa kwambiri, yemwe chiphaliwalicho chikufuna kuti chimuphe. Ndiye anaganiza zopezeka munthuyo kuti amutulutse panja n'cholinga choti chiphaliwalicho chikamusasanthe. Anachita zimenezi chifukwa samafuna kuti chiphaliwalicho chiphetse anthu osalakwa. Alimowo anakambirana zoti akoleke zisoti zawo pamalo enaake ndipo munthu amene chisoti chake chitauluke ndi mphepo, ndi amene ali wochimwa. Anachita zimenezi, chisoti cha mlimi wina chinauluka ndipo alimi enawo atangoona zimenezi, anamugwira n'kumuponyera panja mopanda chifundo m'pang'ono pomwe. Koma munthuyo atangotuluka panja, chiphaliwalicho chinasiya kuzungulira kanyumbako ndipo chinamenya denga la kanyumbako moopsa kwambiri moti alimi 9 anatsala aja anafera momwemo. Pamene pa m'pamene zinadziwika kuti, mlimi anamutulutsa uja ndi

amene anali wabwino, ndipo chifukwa cha munthuyo chiphaliwalicho chinkangozungulira nyumbayo osaiomba. Ndiye pamene alimi 9 otsala aja anatulutsa mlimiyu, chiphaliwalicho chinaona kuti mpulumutsi wawo wachoka, ndipo chinalanga alimi oipa mtimawo mwa kuwapha. Chinawalanga chifukwa anatulutsa mnzawo paja, osamuchitira chifundo ngakhale pang'ono.

Phunziro: Usanayambe kuloza kuipa kwa munthu wina, kumayamba kaye wayeza kuipa kwako.

Mafunso

1. N'chifukwa chiyani alimiwa anaganiza kuti pakati pawo pali munthu wina wochimwa amene chiphaliwalicho chinkamufuna?
2. Kodi atamugwira n'kumuponyera panja chinachitika n'chiyani?
3. Kodi tinganene kuti wochimwa anali ndani kwenikweni?
4. Kodi mukunganiza kuti chikanachitika n'chiyani, akanamulola mlimiyu kukhalabe nawo limodzi?
5. Kodi tikuphunzirapo chiyani?

Mtsuko Wochucha Ndalama

Kalekalelo kunali munthu wina wochakachika, yemwe anapeza mtsuko waukulu m'munda mwake. Kenako anayamba kuukumba ndipo atatero anautenga n'kupita nawo kunyumba kwake. Atafika anauza mkazi wake kuti autsuke. Koma mkazi wakeyo atangotsiramo sopo, mtsukowo unayamba kuchucha sopo wambirimbi. Amati akakhuthula sopoyo, sopo winanso amatuluka n'kudzaza mtsukowo. Bamboyo anayamba kugulitsa sopoyo ndipo mtsukowo unapitirizabe kutuluka sopo wambiri moti bamboyo

ankapeza ndalama zosaneneka. Koma tsiku lina, mwangozi, ndalama inagwera mumtsuko uja ndipo mtsukowo unasiya kuchucha sopo n’kuyamba kutuluka ndalama. Amati akazichotsamo, zina zimatulukanso, moti banjali linakhala ndi ndalama zankhaninkhani, n’kulemera. Ndiye munthuyo anali ndi bambo ake okalamba kwambiri, womwe ankakhala kumudzi wina. Bambo akewo analibiretu mphamvu zoti angadzisamalire, moti mwana wawoyo anawatenga n’kumakhala nawo. Koma atakhala kwa kanthawi, munthuyu anayamba kuona kuti bambo akewo ndi aulesi moti anawauza kuti azigwira ntchito yochotsa ndalama mumtsuko uja. Koma chifukwa cha ukalamba, bambowo zinkawavuta kuchita zimenezi ndipo mwana wawoyo anapsa mtima n’kuyamba kuwalalatira amvekere, “Ndinu munthu wamanja lende. N’chifukwa chiyani mukulephera kugwira ntchito yophwekayi? Pakhomo panotu timayendera mawu akuti wosagwira ntchito asadye. Ndiye ngati simukufuna kugwira ntchito, mudziwa chochita.” Zitatere gogoyo anakhumudwa kwambiri poona kuti mwana wake weniweni wayamba kumunyoza chifukwa choti ndi wopeza bwino. Kenako anangotembenuka ali pintchapintcha kuti atuluke panja. Koma atangotero, anapunthwa n’kugwera mumtsuko muja ndipo anafera momwemo. Nthawi yomweyo mtsuko uja unayamba kutulutsa mitembo yambirimbi. Amati akachotsa ina, inkatulukanso ina. Ndalama zonse zomwe zinatuluka mumtsuko uja zinathera kuika maliro a bambo ake ndipo ankati akaika lero maliro, mawanso amakaika ena. Kenako munthuyo anafika potopa ndi kuika maliro a bambo akewo, moti anaswa mphikawo ndipo pamene ankauswa n’kuti ali kwakwatuke wotheratu, wosowa ndi ya mchere yomwe.

Phunziro: *Ukakhala pabwino, usamanyoze ena.*

Mafunso

1. N'chiyani chinathandiza munthu wotchulidwa m'nkhaniyi kutuluka mu umphawi?
2. Kodi anatani atazindikira kuti bambo ake sangakwanitse kudzisamalira okha?
3. N'chifukwa chiyani anakwiya ataona kuti bambo akewo amalephera kuchotsa ndalama mumtsuko uja?
4. Kodi mapeto ake anali otani?

Mphamvu Zobwereka

Nthawi inayake, nkhandwe inakumana ndi kambuku. Kambukuyo atangomuona anatulutsa dzimano zake, n'kutulutsa dzala zake n'kuyamba kuthamangira kunali nkhandwe kuja kuti aidye. Koma nkhandweyo inati, "Pepani achimwene, taimani kaye.

Osamafulumira kuganiza kuti m'nkhalango muno amphamvu ndinu nokha. Mphamvu zanutu zikulenga, tikaziyerekeza ndi zanga. Tiyeni tiyendere limodzi, ndipo inuyo muziyenda pambuyo panga. Ndiye anthu akandiona koma osachita mantha, inuyo mundidye. Koma akandiona n'kuchita mantha, basi mundileke." Kambukuyo anagwirizana ndi zimenezi ndipo nkhandweyo inayamba kuyenda kulowera kwina kwake, kambukuyo akutsatira pambuyo. Kenako anakumana ndi gulu la anthu ndipo ataona kuti kukubwera nkhandwe, koma kumbuyo kwake kuli kambuku, nthawi yomweyo analiyatsa liwiro la mtondo wadooka. Kenako nkhandwe ija inati, "Waonatu, ndinali patsogolo ndine, koma anthu atandiona anachita mantha kwambiri moti anangotsala pang'ono kudziipitsira!"

Kambukuyo ataona zimenezi anaona kuti mnzakeyodi ndi patali, moti ananyamuka n'kuyamba kuthawa. Ankaganiza kuti anthu aja

amathawadi nkhandweyo, osadziwa kuti mphamvu zake zinali zochita kubwereka. Nkhandweyo inali itabwereka mphamvu za kambukuyo, yemwe anthu aja anamuona akubwera pambuyo pake.

Phunziro: *Osamaopa mphamvu zochita kubwereka.*

Mafunso

1. Kodi nkhandwe inachita chiyani pofuna kudzipulumutsa?
2. Kodi anthu aja ankathawa chiyani kwenikweni?
3. Kodi tikuphunzirapo chiyani?

Anzeru Omwe Anali ndi Vuto Losaona

Kalelo kunali anthu ena asanu ndi awiri omwe anali ndi vuto losaona. Anthuwa anali anzeru kwambiri moti anthu ankawatayira katsatsa akamva zimene zinkatuluka pakamwa pawo. Ndiye tsiku lina anthuwa anaganiza zopita kumalo ena kuti akaone zinyama. Atafika kumeneko, anapita pamalo ena pomwe panali njovu. Ndiye anthu anayi anagwira miyendo ya njovuyo, m’modzi anagwira chimulomo cha njovuyo, wina anagwira pamimba ndipo wina anagwira mchira. Ndiye yemwe anagwira chimulomo uja anayamba kuuza anzakewo kuti, “Ine ndiganiza kuti njovu imaoneka ngati njoka.” Koma mnzake amene anagwira kumchira uja anamutsutsa n’kunena kuti, “Iyayi, imaoneka ngati chingwe.” Ena amene anagwira miyendo aja anagwirizana chifukwa anati, “Nonsenu mukunama, njovu imaoneka ngati mtengo.” Koma amene anagwira pamimba uja anayamba kunena anzakewo kuti ndi wopanda nzeru ndipo anati, “Nonsenu ndi a ziwala m’maso, njovutu imaoneka ngati phiri.” Kenako anthu onsewo anayamba kukangana moti zinthu zinafika poipa kwambiri. Munthu wina yemwe ankangoonerera

zimene zinkachitikazo anafika pamalowo ndipo anawauza kuti, “Aliyense wa inu wangogwira mbali imodzi ya njovuyi, moti mukanaphatikiza zomwe nonsenu mukudziwa, mukanatha kudziwa kuti njovu yonse imaoneka bwanji.”

Phunziro: *Palibe amadziwa zonse.*

Mafunso

1. N’chifukwa chiyani anthuwa ankatsutsana?
2. Kodi onsewo ankanama?
3. Kodi akanatani kuti adziwe mmene njovu imaonekera?
4. Kodi tikuphunzirapo chiyani?

Nkhuku ndi Nkhunda

Kunyumba kwina kunabwera alendo mwadzidzidzi. Ndiyeno paja kulandira alendo kumaonekera m’mbale, anthu a pakhomopo anaganiza zowaphikira nsima. Ndiye popeza anali ndi nkhunda komanso nkhuku, anayamba kukambirana kuti aphe chiyani. ena amati aphe nkhuku pomwe ena ankati aphe nkhunda. Nkhuku itamva zimenezi inayamba kukuwa kuti, “Koma nkhundayooooo!” Ndipo nkhunda inkati, “Mulungu ngwamkulu, mulungu ngwamkulu, mulungu ngwamkulu!” Nkhuku ija inkasokosa kwambiri moti anthu aja anaiona. Ndiyeno wina anati, “Bwanji tiphe nkhuku, chifukwa tikapha nkhunda, tipha zambiri.” Nkhukuyo inapitirizabe kukuwa kuti, “koma nkhundayooooo!” Ndiye basitu, anthu aja anayamba kuthamangitsa nkhuku ija ndipo ataigwira anaipha, moti maliro ake, alendo aja anadyera nsima.

Phunziro: *Osamakankhira anzako mavuto, chifukwa zimatha kutembenuka.*

Mafunso

1. Kodi zimene nkhuku ndi zimene nkhunda imanena m'nkhaniyi kutabwera alendo zikufanana ndi mmene zenizeni zimalirira?
2. N'chifukwa chiyani eni khomo anaganiza zopha nkhuku?
3. Kodi nkhuku inakankhira bwanji makala pamalaya a mnzake?

Mankhwala a Banja

M'mudzi wina munali mayi wina, yemwe nthawi zonse ankangokhalira kudandaula kuti banja lake silikuyenda bwino. Ankasirira kwambiri akaona anzake amene anakwatira ndi kumbuyo komwe, akusangalala ndi mabanja awo. Banja lake linali ndi vuto limodzi. Mwamuna wake ankangokhalira kumukutumula ndipo iye ankaona kuti amayesetsa kumusamalira komanso kuchita zonse zofunika. Ankati akapita kwa alangizi, ankangomuza kuti, “Banjatu n'kupirira, ndiye kaya mwamuna wanu akumakukunthani, muzingopirira basi. Banja ndiye limenelo!” Ndiye atatopa ndi nkhanza zimene mwamuna wake ankamuchitira, anaganiza zopita kwa munthu wina wodziwa zitsamba kuti akamupatse mankhwala achikondi. Atafika kwa munthuyo, anamufotokezera zonse ndipo munthuyo sanachedwechedwe koma kulowa m'tchire n'kukathyola kamtengo kenakake. Anamupatsa mayiyo n'kumuza kuti, “Mukakakangofika kunyumba kwanu, musakayankhule chilichonse. Mukangoika kamtengo aka mkamwa mwanu n'kukhala chete. Musakayerekeze kutsegula pakamwa, chifukwa mukakatero, mankhwalawa akasuluka.” Mayiyo

anauyambadi wakwawo ndipo atafika anatsatira malangizo anapatsidwa aja. Mwamuna wake atabwera, anamuphikira nsima n’kukamupatsa, ndipo mwamunayo anati, “Ndinakuza kuti ndili ndi njala?” Mkaziyo atamva mawu osayamikawo anapsa mtima kwambiri, koma chifukwa choti anauzidwa kuti asatsegule pakamwa, sanayankhe chilichonse. Mwamuna uja anadabwa kwambiri ndi zimenezi, moti anangotenga nsimayo n’kuyamba kudya. Kungoyambira tsiku limenelo mwamuna wakeyo sanamumenyenso ndipo patapita masiku angapo, mayiyo anapitanso kwa munthu wazitsamba uja kuti akamuthokoze, ndipo anamufotokoze kuti mankhwala anamupatsa aja akuthandizadi. Koma munthuyo anati, “Sikuti ndi mankhwalawo amene akukuthandizani. Ndi mtengo wachabechabe womwe ndinathyola m’thengomo. Vuto lanu mayi ndi kulongolola! Mpofunika muphunzire kuweta lilime lanulo.”

Phunziro: Mavuto ambiri amene timakumana nawo amayamba chifukwa cha pakamwa.

Mafunso

1. Mukuganiza kuti n’chifukwa chiyani banja la mayiyu silinkayenda bwino?
2. Kodi vuto la mayiyu linali chiyani?
3. Kodi mankhwala amene munthu wodziwa zitsamba uja anamupatsa ndi amene anathandiza kuti banja lake liziyenda bwino?
4. N’chifukwa chiyani tiyenera kusamala ndi pakamwa pathu?

“Ndifera Manyazi Mkazi Wanga”

Tsiku lina Aphiri anauza akazi awo kuti, “Mkazi wanga, zinthu ndiye zativuta. Tipange bwanji kuti tipeze ufa? Sindingalole kuti ana angawa afe ndi njala ine ndikuona. Koma ndisanameyi, palibe chimene ndikuona kuti ndingachite.” Kenako anapukusa mutu wopanda nyanga. Mkazi wakeyo anavomerezadi zimene mwamuna wake ananena ndipo anawalimbikitsa kuti asadandaule. Kenako mwamunayo anati, “Mkazi wanga, ndaganiza pulani. Bwanji ineyo ndinyengezere kumwalira? Ndiye uike mbale pamsewupo. Anthu akamaponya ndalama zachipepeso, iweyo uzipita kukazichotsamo n’kukazibisa.” Koma mkaziyo anafunsa mwamuna wakeyo kuti, “Nanga bwanji anthu akayamba kubwera pakhomo pano? Kodi ndiwauza chiyani akanena kuti akupititseni kumotchale? Mukafa ndi kuziziratu inu?” Bamboyo anati, “Usadandaule ndi zimenezo, ineyo ndichita zinthu zoti asazindikire kuti ndili moyo. Koma akanena kuti andipititse kumotchale, iweyo ukane. Ungowonetsetsa kuti ndalama zomwe zikuponyedwa m’mbale zikuyenda bwanji. Ineyo ndidzuka mawa anthu asanaganize zotulutsa maliro panja.” Mkaziyo anagwirizana ndi maganizowo ndipo mwamunayo ananamiziradi kumwalira ndipo mkazi wakeyo anayamba kulira. Mbale inaikidwadi pamsewu ndipo anthu anayamba kuponyamo. Posakhalitsa anthu ena anayamba kuyenda m’midzi n’kumatolera ufa, nkhuni komanso ndalama ndipo akabwera nazo ankazipereka kwa mayi uja. Ndiyeno m’mawa kutacha, anthu anasonkhanadi ndipo ena anakagula bokosi n’kunyamula Aphiri n’kuwaikamo. Koma atawaika m’bokosimo, Aphiri tulo tidawatenga. Mkazi uja ankayembekezera kuti mwamuna wake adzuka. Koma ataona kuti sakudzuka, anapita pafupi ndi bokosilo n’kuyamba kulira amvekere, “Inu bambo a Pofera tadzukani! Tadzukani inuuu! Ndimayesa

munati mudzuka inu?” Azimayi anabwera n’kudzamutonhoza mnzawoyo poganiza kuti chisoni chamugwira. Pamene bamboyo ankadzuka n’kuti pakhomopo pali namtindi wa anthu ndipo Aphiri atamva phokoso la anthuwo komanso nyimbo zachisoni zikuimbidwa, anachita manyazi kuti adzuke. Mkazi wawo uja anapitirizabe kulira mouza mwamuna wakeyo kuti adzuke, koma Aphiri anangoti zii. Amati akamva mkazi wawoyo akulira ankangonena chapansipansi kuti, “Ndifera manyazi mkazi wanga!” Posakhalitsa kunabwera adzukulu kuchokera kumanda ndipo anatenga misomali n’kuyamba kukhoma bokosilo. Amati akati khoo! Mayi uja amalira mosatonthozeka, “Amunanga inu dzukani, chonde tadzukani. Nditani nawo ine anawa?” Kenako anakhomanso wina kuti khoo! mpaka anamaliza. Anthu ankangoganiza kuti mayiyo akuyankhula zimenezo chifukwa cha chisoni, osadziwa kuti akunena nkhaninkhani. Pamapeto pake anthu ananyamula bokosi lija ndipo Aphiri anakaikidwa m’manda chifukwa cha manyazi.

Phunziro: *Osalola kulowa m’mavuto chifukwa cha manyazi.*

Mafunso

1. Kodi Aphiri ataona kuti zinthu zavuta panyumba pawo anapanga pulani yotani?
2. Kodi mukuganiza kuti anawerengera mtengo wake?
3. N’chifukwa chiyani Aphiri ankachita manyazi kudzuka?
4. N’chifukwa chiyani anthu sanadabwe ndi mawu amene akazi a Aphiri ankanena akamalira?
5. Kodi tikuphunzira chiyani m’nkhaniyi?

Atambwali Sametana

M'mudzi wina munali atsinzina n'tole awiri. Wina dzina lake linali Paguza ndipo wina anali Saguza. Tsiku lina Paguza anatenga thumba la mpunga n'kuikamo mchenga ndipo pamwamba pa mchengawo anaikapo mpunga n'cholinga choti thumbalo lizikhala ngati lodzadza mpunga okhaokha. Nayenso Saguza anatenga mtsuko n'kuthiramo madzi ndipo pamwamba pamadziwo anathirapo mafuta. Madziwo ankangoti ndengundengu ngati mafuta ndipo anasenza mtsukowo n'kumapita nawo kumsika. Atafika kumeneko, atambwaliwa anakumana ndipo anagwirizana kuti angosinthana zinthuzo. Paguza anauza mnzakeyo kuti, "Uwu ndi mpunga wopunthapuntha, wabwino kwambiri moti simungapezenso wina yemwe angakugulitseni mpunga ngati umenewu.

Mukakauphika uzikangotuluka umodziomodzi." Saguza atamva zimenezo anaona kuti wapeza munthu watulo, moti sanachedwe koma kuvomera zoti asinthane ndi mnzakeyo mtsuko wamafuta. Aliyense anangosenza katundu anapatayo n'kuuyamba wakwawo. Koma atafika kunyumba anazindikira kuti apusitsana. Paguza ataona kuti mnzakeyo wamugulitsa madzi anayamba kumusakasaka ndipo atamupeza anamufunsa kuti, "N'chifukwa chiyani wandipusitsa?" Mnzakeyonso anamufunsa kuti, "Nanga n'chifukwa chiyani wandigulitsa mchenga?" Atazindikira kuti zawo n'zimodzi, anayamba kugwirizana kwambiri. Tsiku lina anapangana kuti apite kukaba kwa mfumu yam'mudzimo. Atambwaliwa anamva zoti mwana wa mfumuyo, yemwe anali kutheba, wabwera ndi chikwama chodzadza ndalama ndipo wapatsa bambo ake. Atamva zimenezi mitima yawo inkangoti dyokodyoko, ndipo anagwirizana kuti akumane pakati pa usiku n'cholinga choti akasowetse chikwamacho. Kenako anauyamba wa kunyumba kwa mfumuyo.

Mwamwayi pakhomo la mfumuyi panalibe zifuyo zaukali, moti Paguza anakwanitsa kulowa m'nyumba ya mfumuyo aliyense osadziwa. Kenako anayenda monyang'ama n'kukanyamula chikwama chachikulu chomwe chinali kumutu kwa mfumu yomwe inali tapatapa ndi tulo. Ndiyeno anafika nacho pazenera la nyumbayo n'kupatsira Saguza, yemwe anaima panja pa nyumbayo. Saguza atangolandira chikwamacho anayamba kuthawa nacho. Atafika kunyumba kwawo, anasonkhanitsa mudzi wonse ndipo anauza anthu a pakwawopo kuti ali ndi chikwama chodzadza ndalama. Koma anawauzanso kuti, "Pali vuto limodzi. Munthu winawake akundilondalonda. Akufuna atatenga chikwamachi." Kenako anawauza kuti, "Ndalamazi zikhoza kupangitsa kuti aliyense pamudzi pano akhale mponda makwacha. Ndiye mulola kuti munthu ameneyu atenge ndalamazi?" Anthuwo atamva zimenezi anapukusa mitu yawo n'kunena kuti, "Ayi." Koma Saguza anati, "Ndikufuna kuti tibise chikwamachi, ndiye Paguza akabwera, mudzamuuze kuti ndamwalira." Anthuwo anagwirizana nazo zimenezo ndipo posakhalitsa anthu anayamba kubuma amvekere, "Mayi wawaye, tilowera kuti ife, achimwene athu atsogolaa." Pakhomopo panayamba kumveka chiphokoso chachikulu ndipo posapita nthawi panyumbapo panadzaza anthu. Ndiyeno m'mawa kutacha, Paguza anatulukira ndipo anafunsa anthu a pakhomopo kuti, "Wamwalira ndi ndani?" Anthuwo anamuyankha kuti, "Mnzanu ujatu anatipeza m'bandakucha ndipo amanena kuti sakumva bwino moti kenako anakomoka, basitu ulendo unali womwewo." Koma Paguza atamva zimenezi anayamba kukayikira ndipo anati, "Anthuwa akundiuza kuti Saguza wamwalira. Amwalira bwanji atathawa ndi chikwama chandalama. Akufuna kundiyenda pansi ameneyu!" Kenako anauza anthu a pakhomopo kuti, "Ndingakaone mtembo wake?" Anthuwo anamutengadi

n’kumulowetsa m’chipinda chimene munali mtembowo. Kenako anayamba kuyankhula ndi mnzakeyo kuti, “Bwanawe, dzuka kuti tingokambirana bwinobwino?” Koma mnzakeyo anangoti zii. Kenako Paguza anauza azimayi ena kuti, “Nditerekereni madzi, awire ngati ososolera nkhuku.” Azimayiwo anachitadi zimenezo, mosadziwa kuti akufuna achite nawo chiyani. Madziwo atabwadamuka, azimayiwo anawatenga n’kupita nawo kwa Paguza. Paguza analandira madziwo n’kupempha kapu yake yotungira. Ndiyeno anayamba kuuza mtembowo kuti, “Ambwana, dzuka zinthu zisanafike poipa! Koma mnzakeyo sanayankhe. Kenako anatunga madzi otentha aja pang’ono, n’kumutsira pamwendo kuti chwaa! Koma mnzakeyo anapirira ndipo sanatekeseke. Kenako anatunganso ena n’kumuthiranso kuti chwaa! koma ayi ndithu Saguza sanasunthe. Ndiyeno Paguza anati, “Bwanawe, dzuka. Uvulalatu!” Koma Saguza sanayankhe. Kenako Paguza anati, “Nanga mtembo umamva kuotcha ngati? Kutu nditsimikizire kuti mnzangayu wapitadi, ndingomukhuthulira madzi onsewa.” Ndiyeno anangotenga mtsuko uja n’kukhuthulira mnzakeyo ndipo Saguza analephera kupirira. Anadzambatuka kwinku akulira ndipo mnzakeyo anati, “Ndinakuuzatu ine, ukanangodzuka nthawi yomwe ija sukanavutika chonchi.” Pa nthawiyi Saguza n’kutu atayamba kukupuka m’miyendo ndi m’mikonomu. Zitatero Paguza ndi Saguza anagwirizana kuti agawane ndalamazo mofanana, ndipo anakatenga chikwama chija kuti ayambe kugawana. Koma atangochitsegula, anapeza kuti munali mapepala opanda ntchito.

Phunziro: *Utambwali umabweretsa mavuto.*

Mafunso

1. Kodi Paguza ndi Saguza anali anthu otani?

2. N’chifukwa chiyani anayamba kugwirizana?
3. N’chiyani chikusonyeza kuti onsewa anali adyera?
4. Kodi pali chilichonse chimene anapindula?
5. Kodi tikuphunzirapo chiyani?

Mutu Wodwala Kansire Adatema Kadzidzi (Yochokera m’buku la Ulendo Series, Mtunda 8)

Kalekale pakati pa mbalame zonse, panali kambalame kena kakang’ono kotchedwa Kansire, enanso amati Tchala. Kambalameka kankalemekezedwa ndi mbalame zonse chifukwa mbalamezo zinkati Kansire ndi mbalame ya ku mizimu, kapena mbalame yomvana ndi mizimu.

Kansire amati zipatso ndi zakudya zina zikasowa, iye amaulukira kumanda kotchedwa makololo n’kuyamba kulira. Posapita nthawi m’mitengo yonse kumandako zipatso zimvekere kuti mbwee! kholophethee! Nthambi za mitengoyo kuti petaa! kulemedwa ndi zipatso zikuluzikulu.

Tsopano zimati zikatero, phokoso la mbalame limachita kuti, buu! Panali mbalame ina imene inkamveka kwambiri ndi phokoso. Mbalameyi inali yotchedwa Pumbwa. Pokondwerera zipatso zija mumtengo wa Kachere imati, “mbwe, mbwe, bzolo, bzolo, zanchulukira! zanchulukira!” Tsopano mbalamezo zikakhuta, zimatera pansu n’kuyamba kuyamika mbalame ija yotchedwa Kansire. Kuyamikako inkatsogolera ndi mbalame ija yomveka kwambiriyi, Pumbwa. Mbalameyo imati “bzoli! bzoli! zanchulukira!” Ife tiyamika inu Kansire. Lero ife laponda lamphawi diwa. Tinali padzuwa koma inu Kansire mwatitoletsa nkhwangwa ndi mpini

womwe. Popanda inu Mfumu Kansire, ife sitikanasambira m'nkhali monga tachitiramu. Mwa ichi tiyamika, taphuka chifukwa cha inu mfumu yathu Kansire,” Anatero Pumbwa poyamika Kansire. “Mawa tibwera ndi mitolo ya nsembe kuti mupereke kwa mizimu ya makolo athu,” anatero poyamikira Kansire.

Pumbwa anapitiriza motere, “Pano tifuna kukutsimikizirani kuti ndinu mfumu yathu. Enawa timangowaona chimwendo kong'akong'a, kotalika chikhosi apoo, kusololokera m'mwamba, koma palibe chimene adatichitirapo, koma kumangotigogomola ndi kutinzonzomola pamitu!”

Nthawi yomweyo panamveka mawu ozaza, “Iwe Pumbwa! thula! Bwanji ukuchitira chipongwe ine? Kodi kotalika mwendoko ndidakumanani ndine?” Anatero Nthiwatiwa ali kupalasila ndi ukali, masaya atatupikana ndi mkwiyo. Mbalame zonse zinangoti maso pa Nthiwatiwa, yuuu! n'kumangoinyodogola cha mumtima zili “Ho! Tamuonani gudu wogudukira zinthu za eni ake. Tachionani chimwendo kotalika ngati mitengo ya m'masano.” Mmene zimateromo zimatunguluza maso, lilime lili pamtunda, milomo zitapambanitsa kupitiriza kunyodola a Nthiwatiwa aja. “Ine ndinenetsa!” a Nthiwatiwa anatero, “Mbalame zonse ndinu opusa kwambiri. Mudzaleka liti kugodomala kotere? Simungatchule kamwana aka ka Kansire kuti ndi mfumu. Kodi simukudziwa kuti mfumu ndine Nthiwatiwa? Kodi n'chilungamo kumalemekeza Kansire, muleka ife amuna ogona kukhomo kosatseka? Kodi simudziwa kuti Kansire ndi nthumbidwa? Kodi Kansire ndi ine titati tipandane angafe ndani?” Anatero Nthiwatiwa poonetsa kunyada. “Ndiponi mutalemekezako a Mphungu awo, kaya a Ng'ongwe awo, a Namng'omba kaya a Namntchichi awo, kapenanso a Kadzidzi awo chifukwa chokula mutuwo . . .”

“Ine ndikuthilira ndemanga mawu amenewo!” anatero a Namn’gomba, “Mbalame nonsenu muli ndi kaduka kachinangwa! Si zaulemu kumalemekeza kafinye aka ka Kansire kamene ife timakatchula kuti kandakhuta kale ayi!” a Namng’omba anatero powonjezera ndemanga.

“Zoonadi,” anatero Ng’ongwe ali kutsokomola, chithokomiro cha pakhosi chili tugwaa! kutupikana ndi ukali. “Ine ndili kuvomereza Namng’omba. Kamwana aka ka Kansire sikangakhale mfumu a Nthiwatiwa ali pompano ayi. Kodi ufumuwo alandirira chifukwa cha ulosi wokhawokhawo? Kodi chidadza ndi yani choti munthu akakhala wa kumizimu, wotiitanira mvula tsono, n’kumatinso yemweyo akhale mfumu?” anatero Ng’ongwe pofunsa mbalame zonse zija. Mmenemo n’kuti atawatunguluzira maso ali pamtunda ngati maso a njoka ija yotchedwa mamba, pam’mero pali dyokhodyokho chifukwa cha ukali. Mbalame zonse zija zinangotinsu maso pa Ng’ongwe kuti yuu!

“Mwaona nokha palibe woyankha kutsimikiza kuti sindikunena zambwerera ayi!” anatero Ng’ongwe. Nthawi yomweyo Ng’ongwe anapisa mutu wake mphiko lakumanzere. Potulutsa mutu wake, mbalame zonse zija zinadodoma poona kuti kukamwa kwake kunali ndudu ya fodya ili fuubaa! utsi umenewo. Utsi wina unali kutulukira mphuno.

“Kansire ntchito yake ndi ulosi basi osatinso za ufumu zizimvekera pa dzina lakenso, izo takana kwamtuwagalu.” Anatero Ng’ongwe ndudu ija atayamba waitula pansu, koma utsi wina ukutulukabe m’mphuno pamene anali kuyankhula.

“Kambalame kena ngati Pumbwa, kasasokoneze Kansire ayi. Mulekeni iye azingolingalira njira zabwino zomvanirana nazo ndi

mizimu ya makolo athu amene adafa kale basi. Amfumu anthu a Nthiwatiwa ndiwo amene azilinganiza za ufumu wawo monga zokonzekera za kumeta unamwali pa nthawi ili kubwerayi ya zinamwali za anyamata ndi asungwana,” anatero Ng’ongwe popumulira kuyankhula kuja. Ng’ongwe anatolanso ndudu ija ya fodya ndiye tsopano kudangooneka kuti, toloooo! Utsi umenewo mapiko ake ali kuwombetsa m’ mimba kuonetsa ukali, m’menemo n’kuti maso ali psuu! Ngati wopemereredwa ndi utsi ku dzenje.

“Chimene tiyenera kumakumbukira n’choti tisamaiwale sing’anga wathu Mleme kumuitana kuti nayenso adzadye nawo phwandoli. Taonani ife zithokomiro zili tugwa! chimkhuto chimenecho. Nanga bwanji taiwala ng’anga yathu? Amfumu Nthiwatiwa akankhe mthenga kwa Mleme kuti abwere adzadye nawo ufulu talandirawu . . . azimu atigwera m’mbale . . . atigwera m’mitengo yathuyi kumasano kuno,” anateronso Ng’ongwe fodya ali fubafuba utsi uli kutulukira m’mphuno.

“Wayankhula bwino iwe Ng’ongwe!” anatero Nthiwatiwa. “Nonsenu musamvere zija amanena Pumbwa zija ayi. Zija ndi zoyankhula akapasule okhaokha. Pumbwa sadziwa kuti dziko ndi mafuwa achita kuchilikiza. Zoyankhula za Pumbwa ndi zochotsa mafuwa kuti dziko ligwe. Motero, zimene zija wayankhula Pumbwa zija aliyense angozithira kunkhongo. Woyamwa yekhayekha ndiye amene amayankhula zokhuta ngati zimene zija,” Nthiwatiwa anateronso ali kupenyetsa Pumbwa uja. “Motero tonse tiyenera kumwazikana koma tonse nthawi ya m’ mawa dzuwa likutuluka tikumane pano kudzapitiriza kudya madyelerowa.”

M’ mawa kutacha dzuwa likutuluka, mbalame zonse zinali zitasonkhana kale kumasano kuja koma zonse zinali zitatera pansu

zili kwangopenyetsetsa zipatso m’mitengo muja. Zinali kudikira ulamuliro wa mbalame ija ya kumizimu yotchedwa Kansire. “Nanga Kansire ndi Chiuzimbi ali kuti?” Anafunsa motero a Nthiwatiwa.

“Ife sitikudziwa mfumu,” anatero Kadzidzi chimutu chake chachikulu chija chili nguninguni kugwedezeke, masaya ali kweevee! ngati wodwala matenda a kadukutu. “Tonse tabwera, mphachi (kupatula) awiri mwatamulawo,” anawonjezera motero Kadzidzi.

Dzidzidzi! Mbalame zonse zinamva kukwapulitsa kwa mapiko a mbalame kuti phururu! phururu! Posachedwa zinaona Chiuzimbi atatulukira ali kutera pansu, Chiuzimbi chachitali ngati chimchira cha Nkhwere chili vwandaa! Chilinunda ngati cha kunzi ya ng’ombe chili pholi! pamsana. “Suyo Chiuzimbi uja mfumu!” anatero Kadzidzi.

“Eya, ndamuona,” Nthiwatiwa anatero.

“Pepani mfumu ndachedwa kufika!” Anatero Chiuzimbi.”

“Chifukwa?” Nthiwatiwa anafunsa, maso ali psuu! mutu uli njenjenje ndi ukali.

“Pepani mfumu ndiye kuti . . . ” anangoyamba motero Chiuzimbi. “Ndiye kuti chiyani? Kodi iwe Chiuzimbi umanyadira chimthenga chako chachitalichi? Kapena umanyadira linundali basi n’kumadziyeseza kuti ndiwe ng’ombe eti? Ife sitingadikire iwe pano kutchedwetsa phwando lathuli limene adatipatsa mlosi wathu Kansire. Kansire pomvana ndi mizimu ya makolo athu taona m’mitengomu zimene Chisumphu, kaya Chauta, kaya Mphambe anatipatsa. Kodi umadziyesa ng’ombe iwe eti?” Anatero Nthiwatiwa podula pakamwa Chiuzimbi.

“Zachisoni mfumu Kansire wafa?” anatero Chiuzimbi kuti zonena zake zimveke msanga.

“Ukuti chiyani? Kansire wafa?” Nthiwatiwa anafunsa. Nthawi yomweyonso panamveka kubuma maliro a Kansire. Dothi lonse pamalo onsewo linali madzi khathikhathi ndi misozi yochokera m’maso a mbalame zija. Nthiwatiwa sanathenso kuyankhula chifukwa cha phokoso lachisokonezo motere: “Bzolibzolo, bzoi, mbwembweembwe, gulululu, khurururu, fwakafwaka, kweefu, mbirombiro!”

“Nena bwino, ukuti chiyani za Kansire?” Nthiwatiwa anafunsanso.

“Kansire zoonadi,” anatero Chiuzimbi, “wadwala pafupi imfa.”

“Khalani chete,” Nthiwatiwa anatero. Chifukwa cha mawu wotsirizira aja a Chiuzimbi, panali bata kwangoti ziii. “Ndikuti Kansire wadwala pafupi imfa. Usiku anakomoka katatu.”

“Chabwino, iwe yemwe Chiuzimbi pita kwa sing’anga wathu Mleme ku Chinsiro ukamuze za matendawo. Nonse mubwere pamodzi kuti tonsefe tipitire limodzi kwa Kansire. Wamva bwino?” anatero Nthiwatiwa.

“Zikomo mfumu,” anatero Chiuzimbi ali kuuluka kupita kwa ng’anga ija.

“Zikomoo,” anatero Chiuzimbi.

“Eyaa,” anatero Mleme.

“Koma musavutike n’kundikonzera pokhala ayi. Ndikhala pa chikuni ndatera pano,” Chiuzimbi anatero.

“Kodi n’kwabwino?” Mleme anafunsa.

“Ayi sikwabwino.”

“Chavuta n’chiyani?”

“Matenda kwathuku.”

“Wadwala ndani?”

“A Kumizimu a Kansire.”

“Tsono zikatero n’cho chiyani, atilosere zinthu ndani?”

“Ndimu taonera. Mutu ndithu udawayamba dzana. Ngakhale amayenda kwangoti munthu uja ngolimba. Mwinanso kuchepa thupi kuwombola. Usiku anakomoka katatu. A mfumu a Nthiwatiwa atamva ndiwo amene anandikankhira nkhangongo kunowa, ali basi muzikabwerera limodzi.”

“Zikomo ndamva. Ine bwenzi n’tabwera ndithu popeza madzulo ndinalandira mthenga woti kuli phwando, wosadziwanso kuti n’kumamva zoteronso. Chabwino dikira pomwepo nditenge lumo lakuthwa loti tikatemere mankhwala kuti mnzathuyo achire msanga. Komatu zina leku zina kambu, ine dzinali ndimangolimva koma titakumana m’malunje, ayi ndithu sindingawadziwe, mpang’onoponse.”

“Aaa! zoonadi?”

“Zoonadi pali agogo kumanda.”

“Tiyeni mukawadziwa lero.”

“Ndakondwanso podzandiitana ine. Koma dzuwa lisanalowe, Kansireyo akhala atachira.”

“Zoonadi zimenezi?”

“Eee, ine ndimanena zoonza zokhazokha. Palibe ng’anga yoopsa ngati ine m’dziko lonse lino. Ndili ndi mankhwala anga owopsa kwambiri.”

“Mudakatenga kuti mankhwalawo?”

“Kwathu kudziko la mbewa.”

“Kodi inu ndimayesa kuti kwanu ndi kwathu kudziko la mbalame. Kodi inu sindinu m’bale wathu?”

“Ndine m’bale wanu.”

“Nanga bwanji mukuti kwanu ndi kwa mbewa?”

“Inenso ndikufunsi. Kodi inu kwanu n’kuti?”

“Ndakuuzani kale kuti kwathu ndi kwa mbalame.”

“Osati kwa ng’ombe?”

“Chifukwa?”

“Nanga inu mwadabwa ndi chiyani poti muziti ndikati kwathu ndi kwa mbewa mudodoma. Inenso ndili kudodoma poti mukuti kwanu n’kwa mbalame pamene ndili kuyesa kuti kwanu n’kwa ng’ombe.”

“Chifukwa chiyani?”

“Achimwene ndikuuzeni. Inu kwanu n’kuwiri: kwa ng’ombe ndiponso kwa mbalame.”

“Mwaneneranji zimenezi?”

“Taonani chilinundacho. Ine kwathu n’kwa mbewa ndi mbalame. Tonsefe ndife ofanana tilibe kwathu kwenikweni ayi. Izi tinazivala mosasankha ayi, tinangopezeka monga tililimu ndiponso . . . ”

“Pepani sing’anga tiyeni tingakapeze maliro.”

Dzidzidzi, mbaleme zonse ku makololo kuja zidangoona a Chiuzimbi ndi a Mleme ali kutera pansi koma maso a Mleme anali pa Kadzidzi gaa, chifukwa adaona kuti mutu wake unali wotupa. Mleme mumtima mwake anaganiza kuti mbalame ija yotchedwa Kansire ndi Kadzidzi uja, poona kutupikana kwa mutu.

Nthawi yomweyo anatulutsa lumo lakuthwa kwambiri pamodzi ndi mankhwala ake. Posachedwa mbalame zonse zinaona kuti mutu wa Kadzidzi watemedwa kale magazi ali psuu, mankhwala ali kupakidwa.

“Pepani sing’anga, ine sindikudwala ayi,” anatero Kadzidzi.

“Kodi wodwala mutuyo sindiwe?” anafunsa Mleme.

“Ayi sindine.”

“Nanga ndani?”

“Kansire.”

“Ali kuti?”

“Kuchisa chake.”

“Nanga iwe sukudwala?”

“Ayi.”

“Nanga mutuwu unatupa n’chiyani?”

“Siwotupa, ndi mmene ndinabadwira basi, monga momwe mulili inumu. Mumaoneka ngati mnzathu mbalame, komanso ena amati ndinu mbewa. Kodi zikatero chikhale chifukwa choti ife tikutemerani mankhwala kuti umbewa muli nawowu ukuchokeni?”

“Aaaa, . . . chipongwe choopsa, ndizo m’mandiyitanira?” anatero

Mleme ali kuuluka kuthawira m'malunje, mbalame zonse zili maso yuu, kumupenya koma chimutu cha a Kadzidzi chili magari psuu.

Angozo ndi Mwana Wawo

Bambo: Iwe Joni, kodi pulezidenti woyamba m'Malawi muno anali ndani?

Mwana: Joyce Banda.

Bambo: (Phwaaa! anamuswa khofi) Uzikhala siliyasi ndi maphunziro ako!

Mwana: Oo! pepani, ndimaona ngati mumafunsa pulezidenti woyamba wachizimayi.

Bambo: Khala chete chimwana chopanda nzeru iwe! Ngati zikukuvutani zakupulaimale, ndiye zakusekondale mukaphula kanthu inu?

Mwana: Chabwino, nanga inu bambo, Abengo ndi ndani?

Bambo: Mlimi wa fodya.

Mwana: (Phwaaa! naye analipulumutsa lake khofi) Abengo ndi chibwenzi cha amayi! Muzikhala siliyasi ndi banja lanu inu!

Bambo: Mwanawe ndiuze zambiri.

Mwana: Khalani chete. Ngati mukulephera kudziwa za akazanu musanakalambe, nanga mukadzakalamba ndiye zidzakhala bwanji?



Bonwell Rodgers

Ndimaona kuti nthawi zina si bwino kunena zambiri zokhudza zimene unachita. Ndimakhulupirira kuti anthu amene sayankhula zambiri zokhudza iwowo ndi amene amakhala ndi luso komanso ndi amene amaganiza mwaphokoso zedi. Werengani bukuli kuti muone zimene ndikutanthauza.

This book is dedicated to my beloved brother, Brian. I love you little brother and am always by your side.

If I could save time in a bottle, the first thing that I'd like to do is to save every day till eternity passes away, just to spend them with you.

If I could make days last forever, if words could make wishes come true, I'd save every day like a treasure and then again, I would spend them with you—Jim Croce.